


BUFWĪKÍGWE 4

 Nkundwe Neville, kangi pamūsi panunu, namayolo, ndigi, ku bīnītu abapala, uswe tuli basangalufu ukugomokela kuno nkipānga ikilo iki. Kulūngwīle panini, kangi popāpo uswe tukugelaga ukuya bēngo itolo nakalinga mūmo tubagilīle, ukubūka itolo ukutalula mu Ndumi.

Ikyākwānda, uswe tuli nafyo fimo ifyakufumusya ukuti tubōmbe, kangi u—u busūme ubwa palubafu. Une ndinabo abakalata bīnu nkati kunyuma kula, aba bapēgígwe, kangi ugwa kalumbu uyu ikwīpilika umwēne ali ni lyūlu mu bōngo. Kangi ālipo uyīngi mu Louisville; kangi uyūngi unkundwe gwa ndumbulili, u gwīse ali nukutikigwa kwa ndumbula; kangi balipo bingi, bingi abāndu ababine nkīsu umwīsyūgu. Bingi bikukōléla mula kangu uswe nalōli tukwīputīla abēne ni ndumbula syītu syōsa, ukuti Kyāla isakututūlāga uswe.

Kingi kifuki malongo-mahano-na-mana-na-bana mwa mia bwa butumigwe bwāngu bo bwīla ikyo, ukwīputīla ababine, umwe muketile, lōli une—une itolo nāli mu luko lwakuya—mu luko lwakuya nubukētelo ukuti. . . Une ngāli ngwīputīla ababine, lilino, kumbukilāga ikyo. Ikyo kikubūka kulakula nkyēni ni kyēne. Lōli, o, linga uswe tubagīle ukukitwāla i—i kipānga kūko kikwitūgasyāga mbuyo, polelo, nukukitwāla ndubātiko ukuti uswe tubagīle ukubūka ku mbombo, umwe muketile. Ukubagile ukuya bipānganie, muketile, ukubūka filifoyosa palikimo.

Ikindukimo ikingi itolo kitikīle indumbula yangu, akabalilo kanini aka kakindilepo. Ako ko kabalilo kāko unnini ugwaiyolo unnyambala umfumakubwīte, lumo lwa ngongi syāke kifiku ukutusuliligwa, ikilūndi kifuki ukutusuliligwa. Umwēne akaya apa mma ukupilikisya kwa une itolo lilino. Lōli u nsōka gwanaloliloli gwa mwīnitu, ni ngamu ya Roy Roberson, kangi yumo gwa bakyungakyuma apa pa kipānga, kangi yumo unnunu unnyāmbāla Nkristi. Umwene ākatile amakato itolo pala, kangi alinkuti, “Nkundwe Branham, komma ukummwibwa u Pulezidenti.” Alinkuti, “Ikyēne kyālimbelīle ukwīpilika ukuya nsulumanie akabalilo kāko umwēne akataga amakato,” āketile pa senema, “umwēne ikusuluka pa makato ga ndēge, amāsosi gikusuluka mmasaya gāke, kangi undomo gwāke kuniongalila mūmbafu.” Umwe mumenye, umwēne ali palapala ukukilania kula na Roy na bala, nkati mula—mula mbwīte.

Kali linga ugwe kukīndāna nagwe mu ndyāli, umwēne pōpe yo Pulezidenti gwītu. Ena, nkulumba. Kwa une, une—une ngaya muDemocrat pamo muRepublican. Une ne Nkristi. Lōli une—une ngukubūla ugwe, une naloliloli nāli nu luyīndiko kwa—kwa

Pulezidenti Dwight Eisenhower. Nkulumba, umwēne naloliloli afumile pakuya nnyāmbála unkulumba, mu njila yāngu iya—iya kwino gonela. Linga umwēne ikusasaniaga kāngi, kāngi une nayaga kukusala, une angali ngunsala umwēne kāngi. Uko ko kotalusya. Une ndikupāsya linga umwēne āli—linga umwēne āli ni fyīnja mia yumo, une angali ngāli ngunsalaga umwēne, panongwa yakuti une nūngānile umwēne. Kangi unko uswe tunkūmbukile umwēne mu nyīpūto syītu ikilo iki.

J. T., une naloliloli ngupālisya ulukomano ulununu lula, mwēsa umwe, umwe nu Nkundwe Willard twāli nalo undungu ugu. Linga une nālīngīle nkati ukufuma pānja, umwe mwēsa mwāyobīle, “Umma ndaga, Nkundwe Branham lilino, ugwe umenye, *gwakuti-na-gwakuti*.” Lōli ikyēne kinunupo itolo ima pānja nukupilikisya kwa umwe, ngimba umwe mutikukēta? Umma ndaga. Popāpo, kinunu fiyo.

Une ndinako ukusūma kwa fipānga fimo, linga umwe mwēsa mukulōnda ifyēne, linga umwe mwītendekisye ukubūka ukuya ntīmi lilino, linga umwe muli nako ukumanyisigwa. Kangi, iki, une ngwītīka umwe muli nako, kāngi musēngēme mōsa pāsi. Une ndinako kumo mu Oregon, fimo mu Washington, California, kāngi Arizona, amabuyo amakīndānekīndāne. Kangi linga ugwe kulōndamo siku ukwēga ikipānga pamo kalikōsa, fiki, papapa apa bo buyo ubununu ukwāndilapo, papapa apa. Kangi gilipo imyōyo gikukūta kulikōsa, kōpe ku bukyūngaji bwa Bamwēnye kāngi kilikyōsa iki ugwe kulōnda ukubūkako. Itolo unko uswe tumanye, panongwa yakuti une ngwītīka ukuti umwe balumiana muli ni ngimu lilino. Uko ko kotalusya. Une itolo nkuganile ukubakēta abēne bikubōmba ikyo.

Pala alipo Nkundwe Ruddell pamwanya pala pa nsebwe. Ngubūka kula ukuya nu lukomano panongwa ya mwēne, mmasiku amanandi aga gakwīsa. Ikuyaga nu lusanano, Nkundwe Ruddell ikuyaga. Kangi une—une ngukūmbukila une nālīsibīle ukungūta umwīnitu unnini yula ukusyūngutīla kulikōsa, ukugela ukumbika umwēne pānja mu liyōko ukulūmbilīla. Umwene ali ilāmwāga fiyo. Umwene āyobāga, “Une ngabagila ukuyoba.” Ugwe kufimbilisigwa ukumpilika umwene. Amenī. Muketile? Ugwe ukamanya iki ugwe ubagīle ukubōmba linga ugwe kummwītīkīsyā u Mbepo Mwikemo ukukubōmbēla ugwe. Uko ko kotalusya.

Kangi Nkundwe Graham Snelling mu Utica, kāngi Nkundwe Junior Jackson pāsi pala. Uswe—uswe tukubēga bōsa ba bēne fyītu ifinini ifipānga filūmbu, itolo na uswe. Uswe twēsa tuli palikimo. Uswe tutikutātīkāna pa manyisyo syītu, pamo isūbīlo syītu ni fyākulōnda, imanyisyo syītu, sili lumolwēne. Uswe tukwīma palikimo, itolo kilikyōsa palikimo. Uswe tuli itolo kipānga kimokyēne. Kangi uswe naloli tukulōnda ukuya nafyo ifyēne fibalanīle mōsa; uswe tuli nafyo fima mu Africa, fimo mu

India, kangi ukusyūngutíla mōsa, ukukilania nkísu. Uko ko kúko uswe tukulōnda ifyēne, ukubalamisania i Nongwa.

Kangi une ngukēta abīnitu abakeke aba bikufyūka, ngati Nkundwe J. T. Parnell apa, kangi—kangi Nkundwe Willard na bēne, akabalilo kāko abēne bikufyūka, abīnitu abakeke, akabalilo kāko une ngukāngálapo. Linga aliko kilābo, abēne bisakuyaga bo banyāmbala bala aba kilābo. Une ndikulōnda i Ndumi iyi ukuti nasiku yingaffwāga. Iyēne itolo yikabagíla. Iyēne yikufīmbilisígwa ukukīndilíla nu būmi. Kangi une ndikwītika uswe tuli na kabalilo akatalipo ukuyitwāla Iyēne.

U mwāna unnini uyu abēne bātigi āyága pakufwa, une ngukēta umwe muli nako akēne nkipānga ilisiku lyōsa umwīsyúgu, kalūmbu. Ikyo kyo kinunu fiyo. Uswe tukupālisya u Ntwa panongwa ya ikyo, ukuti u Ntwa yo gwaipyāna, iswīle ni kisa. Itolo umilisyága ukwītika iki kyābūligwa ugwe papapa apa, muketile, akēne kikuyaga kanunu mōsa.

Lilino, ngimba umwe mukwīkyéla ukumanyisya? Umwe mukuganile ukumanyisya? [Ikilūndílo kikuyoba, “Ameni.”—Nsimbi] O, une—une—une naloliloli ngwīnogóna ukwēne kukubōmba uswe ubununu. Ikyēne kikutupapo uswe ubutūsyo ubunīni ukufuma kukwīputíla ababine, ni mboniboni, kangi ulubūbulusyo Lwamwakyāla. Ena, lilino, ikilo iki uswe. . . Ukufuma pa lukománo, uswe twīsakwīpūtíla ababine kangi, ikilo iki. Uswe akabalilo kōsa tukulōnda ukubōmba ikyo, ukōsya aligwesa akabalilo kalikōsa.

Balinga bikukūmbukila akabalilo kāko une nakētēsyaága isāmba sya magesi? Ena, une nēndíle itolo ukukilania isāmba sya magesi, utubalilo twīngi, ngufīmbilisígwa ukwēnda amamailosi malongo matatu pīsiku ukukīnda mmatēngéle. Une nāli na mamailosi bamia babili na malongo lwele ukwēnda pāsi. Une nālisibile ukwēnda ukukīnda mula, ishāti mmaboko gāngu, kangi o, ngatēle fiyo, ukwēnda ukukīnda mmatēngele gala, kangu ukutumula imifya igyandeka. Ukwāgána nu ndimi unkāngále nukwītūgāsya pāsi pa mpiki nukuyoba ku mwene ukufwána nu kōsígwa mu Ngamu ya Ntwa Yeso. Umwene abagile ukuyoba, “Mulimosa, une akabalilo kosa nālōndága ukōsígwa.”

Une ndikuti, “Ukwēne kukaya kutali fiyo ku kasōko.” Kangi umwēne āyobága. . .

Kangi une nēgíle bīngi ba bēne kulakula pāsi kula nukubōsya abēne mu Ngamu ya Yeso. Ukwēga kulakula pāsi ukukōnga ulusāmba, itolo nubukafu na mūmo une nābagile ukubūka. Uko ko kutalusya. Akabalilo kīngi mu fyakufwāla fyangu ifyaiyolo ifyākūmbombo, ukumōsya yumo, bo une mfumile itolo ukufuma pa mbānda. Nītūgēsye pamwanya pala ngubōmba ukukilania i mbānda; une nāli nnyāmbala gwa sāmo, kangi, ngubōmba ukukilania i mbānda, nu nnyāmbála, nguyoba

ku mwēne isya Ntwa. Umwēne āyobága, “Fiki, Billy, limo mwa masiku aga une ngwisakwisa ku kipānga kyāko nukósígwa.”

² Une nāyobága, “Nongwa ya fiki ugwe kulōnda ukugúlíla mpaka akabalilo kala? Uswe tuli papapa apa pa kisōko, galipo amísi ga mīngi papapa apa.” Ukubakola abēne papapa lilino. Uko ko kutalusya. Ako ko kabalilo. Filipu āyobíle. . .

³ Umfuligwe alinkuyoba kwa Filipu, “Apa galipo amísi, kyo kiliku kikutukānisya uswe?” Uko ko kutalusya. Nakimo. Linga ugwe gwītēndekísye, ako ko kabalilo. Komma ukundeka u mōhési ukuya nu lusako ukwingisyāmo ikindukimo nkati mula. Komma ukubíkíla kwa kilābo ifindu ifi ugwe gwābagíle ukubōmba umwísyúgu. Kilābo lūmo atikwisa kuli ugwe. Une ngukūmbukíla akabalilo kamo une nābōmbíle ikyo, nāmanýísígwe, kyālimmanýísye une akakukumanyílápo. Une nākibíkíle ukuya kyakilābo ikindukimo iki une nābagíle ukukibōmba ilisiku limo, kangi ilisiku ilikōnge ukwēne kwāli kwílíle fiyo.

⁴ Lilino, naloliloli une ndinkulōnda ukubakoleléla umwe akabalilo kōsa. Lōli une itolo nguya fiyo—fiyo ndabanísígwe mōsa, kangi, une ndikumanya, une ngwípilika itolo kanunu fiyo mpaka une itolo ngufuluganikana nimwēne, kifuki. Une itolo ngwípilika kanunu fiyo.

⁵ Lilino unko uswe twinamisye imitu gyitu itolo pakabalilo ku Lisyu.

⁶ Tāta gwītu Gwakumwanya, Ugwe gwe Kyāla gwabūmi, gwābumi akabalilo kōsa. Ilisūba ili itolo língíle, ilisūba lilalíla, Danieli ālikētíle ilyēne akabalilo kāko ilyēne lyālingíle, Yeremiya ālikētíle ilyēne likwíngíla, Adam ālikētíle ilyēne likwíngíla, Yeso ālikētíle ilyēne likwíngíla. Kangi ikyēne kyo kisu kilakila iki abēne bālimo nu būmi nu kwēndamo, kangi Ugwe ukāli gwe Kyāla yulayula.

⁷ Ikilo ikifilipo ifyākusúma fíngi. U nnyāmbála ni lyūlu mu bōngo, u kalūmbu ikutíla ikindu kilakila. Ugwe gwe lusúbílo lwēne, Ntwa, ulu lulipo pa kila. Ilyūlu lila lísile ukuya likubalanila, kikayapo nakimo kibagíle ukwímíkígwa. Ilyēne lilikubutali kubusita kufíkila na maboko ga ngānga. Lōli ikilo iki uswe tukubūka ni fyāta yitu innini, ukukōnga akang’osi akanini kala, ukukatwāla akēne kāngi ku kibaga kya Tāta. Mu Ngamu ya Ntwa Yeso uswe tukutalusya inyīpúto syītu ukuyigoga ingalamu, ilyūlu, ububāle, nubuponoseso ukubatwāla abēne ku kibága.

⁸ Kangi uswe, Kyāla, kumbukilaga ikilo iki u Pulezidenti gwiitu unganigwa, nkundwe, ugwiitu Dwight Eisenhower. Umweene alongwisye ikiisu, Ntwa, umwene agelile ukutupiinga uswe ukufuma ku bwiite. Umweene aafiingile u bwiite bwa ku Korea bukumalikaga linga umwene aali ni ni njila yiliyosa iyi umweene aabagiile. Umweene aafiingile ku ba mama

bala umweene ikubatwalaga abalumiana bala ukugomokako. Loli umwene aayobile, “Kuli une ukuti mboombe ikyeene, une ngabagila ukuboomba ikyeene. Une mbagiile ukubiika ukugela kwaangu, loli Kyala mweene isakufiimbilisigwaga ukuboomba ikyeene.” Kangi Ugwe gwaali nu mweene, Ntwa, kangi lilino ubweene bumaliike. Nongwa ya fiki abeene baatoligwaga ukukibona ikyo ukwanda nukwaanda itolo? Kyala, une ngusuuma ukuti Ugwe kuntuulaga umweene. Sayaga u moyo unkifu gula, Ntwa. Kangi uswe tukusuma ukuti Ugwe kutusalilaga uswe undoongosi uyu ikuyaga nkōnge. Ukusūnguligwa-ngaani kwisakuboombigwa, Ntwa.

⁹ Loli Yula yuuyo uswe tufumbilwe fiyo ikilo iki, palubafu lwa fyaakuboomba fyaakikolo fyitu, yo unkulumba ugwalwimiko Yula uyu ikwiisa ukupaangania i Kitangalala iki kitisakuya nu bumalikisyo, u Ntwa Yeso, u Mwanundumiana Gwako. Polelo abeene bisakuluundika ifilwiilo, inyiimbo sisakukubigwaga kangi kula kutisakuyako ubwiite kangi mma. Abeene bisakubyaalaga imiguunda gya mipesa nukulya ifipaso ukufuma mu gyene. Abeene bisakuyeengaga inyumba, ukwiingilamo isyeene. Kangi kula kutisakuyamo kangi mma ulutamio polelo ukufuma pala.

¹⁰ Sayaga uswe lilino bo uswe tukusegelela i Lisyu. Kangi, Tata, Ugwe umeenye inongwa iyi une ngusegelela i Lisyu ukufuma ku Lisimbo lilili ili pa. Iyeene yo nongwa yakuti une—une ngwiipilika ukuti Ugwe kuloonda une ukuboomba ikyeene mu njila iyi, ukuti ubweene bo bwiigane Bwaako Mwabunyakyala, ubweene bo bulagili Bwaako, ubweene bo...ubweene bo bulagili bwa lisiku, ukubaleka abaandu aba ukwaaga pabenenapabene ukubwaaga ubuyo bwaabo nukwiiteendekesya ku sala ya bwiite. Bo muumo unkundwe gwiitu aayobile mu lwiiputo kwa Ugwe pakaya patali mma, “O, ugwe utumanyisye uswe akabalilo katali, Ntwa.” Lilino, Tata, tupaga uswe amabuyo giitu. Tubiikaga uswe paanja pala ku iki uswe tubagilile ukuboomba, ukuti uswe tubagiile ukuya ukufwana ni mbombo ya Tata. Kabuno uswe tukusuma ikyene mu Ngamu ya Yeso, Mwanundumiana Gwako. Amen.

¹¹ Naali na pamuusi apanunu pamusi ugu, nguyoba ku ngaanga umfumuke mu Louisville, u naasi gwaake. Abeene baapilike isya findu fyaalwiimiko ifya Ntwa. Kangi ugwiise aali ngaanga. Kangi umweene aalisileko kuno nukwituugasya nkyumba kyaangu pamusi pakabalilopo, itolo ukwiisamo mula, ukwisamo itolo. U mūndu unnunu; unkafupo panini ndigi, umwe mumenye, luko lwa nkafupo, gwa Presbeteri gwanalolili ukwaanda itolo, loli alinkusookamo na maasosi gikusulula mmasaya gaake. O, une...Kyaala ali nabo abeene biimikiigwe kulikoosa, mmabuyo gakubombela mbombo bagaanga, mu baanaasi. Une ndikusubila alipo naasi mu Nkipatala kya Bonywa kya Norton uyu une ngayobileko ku beene isya kuya

nu Mbepo Mwikemo, nukunsuma umweene linga umweene aalyoosigwe mu Ngamu ya Yeso. Nayumo ungaanga uyu une naagenemo nagwe, kulikosa, pamo nakim- . . . Muketile?

¹² Ukubabula abeene ukufwana ni Kyene. Uswe tukaya akabalilo kamo mma, nkundwe. Kali ikyeene kikuboneka kikafu bulebule apa, itolo guulila ugwe kukilania umūyi ugwabumalikisyo lula pisiilya nukukēta, polelo ugwe kwisakwiganaga angali ugwe uboombile ikyēne. Ena, nkulumba. Komma ukugūlila mpaka akabalilo kala, unko uswe tuboombe ikyēne lilino. Iyi yo sala. O, abēne babagīle ukukānikana, nukusōka ilyōsi nukūmana panini isya ikyēne, loli abeene batikusanusya ikyēne. Looli abēne naloliloli batikusanusania ikyēne. Abēne—abēne—abēne bali kanunu. Abēne bikukiindilila ukuumana kwa ugwe, itolo—itolu kumbukilaga, abēne—abēne naloliloli batikusanusya ikyēne mma. Abēne batikusanusya ikyēne. Abēne itolo lumu bamanyiisiigwe ikindukimo kangī abēne itolo bikwiibanilila ku kyēne, popāpo—popāpo ugwe ubagiile ukukēta ifuundo yaabo. Komma ukuumana nabo abeene mma, komma ukuumana na aligweesa, loli itolo baganaga abeene itolo mu Kyēne. Polelo biiputilaga abeene.

¹³ Ena, une gwiinogona uswe twaafikile paasi ku linandi lya 9, une ngasisimikisya mma. Uko ko kubutali ukufuma kuntu gwa 3, bule ukwene, banyaambala? Loli o, Ulwēne lo luuki mu lyalabwe, kwa une! Uswe twaayobaga lilino, kumbukilaga, ukuti uswe tubagiile ukufika ku lwālo ulunini kangī. Kangī lilino, Nkundwe Neville, ugwe—ugwe ngwaabe une panini itolo lilino linga une ngutoligwa ukukēta akabalilo kakumalika, ukuti une mbagiile ukuya nu lwiiputo kuli ababine. Uswe tukuloonda ukwaga akapatu kalikoosa uswe tubagiile. Kangī ikilo iki une nguloonda ukukoolela kwa pakigemo. Une . . . Ngumaliisya pa iki kiikyo une mbagiile itolo ukubalala aga gasyeele aga ikyeene.

¹⁴ Loli ifuundo ya iki, yo, ukububona ubuyo bwaako mwa Kristi, ukukeeta ukuti ikyeene kikaya kindukimo ikyakuti ugwe kugwiilamo itolo, pamo ikindukimo iki lumu kyaali . . . ugwe gwaboombiile imbombo pabuyobumo, looli ikyeene kyo iki Kyala aaboombelile ugwe, Mweene. Komma ukuti ugwe gwaali nnunu fiyo mpaka ugwe gwaabuukile ku kipanga ikilo kimo, ukuti unkundwe umpelakisa yumo aakuloongoliile ugwe ku kigemo. Kangī ikyeene kikaali ikyo mma. Ikyeene aali Kyala, bo lukaaligwa ulwaalo lwa kiisu, aakubiikile ngaani ugwe ku Bumi Bwasyepwa. Akabalilo kaako ugwe kufika kula ilisiku lila, kisita kuswiiga amalongo mana . . . abakulumba malongo mabili na bana balinkufuula ingiga syaabo, aligwesa alinkufuulila paasi ingiga syaabo, aligwesa alinkugwisya paasi ifisyo fyaabo, abeene bakaali nako na kamokene akakuyoba, undumbilili nayumo, unkulumba nayumo, nakimo umma. Ulutuufyo loosa kwa Kang'osi! Kyala isakubuungania mwa Umweene ifindu

fyoosa ilisiku lila. O, linga uswe tukumanyangamo siku nu kummwaagania Yuyo yula aali Yuyo abeene bakomeliile. Lilino pa . . .

15 Uswe tukwaanda pa linandi lya 8, ukweega ulwaalo lunini.

Mulamula umwene abombile ukwiisusya kubwa uswe mahala goosa na mahala;

Bo umweene atumanyisye kwa uswe ifyakubutitu fya bwiigane bwiitu, . . .

16 “Iyakubutiitu kya bwiigane Bwaake.” Kangi kumbukilaga muumo uswe twasyeete pa ikyo? Balinga baali apa ulubunju ulu, unko uswe tukeete. Mumo uswe twasyeete pa ikyo, “ikyakubutiitu kya bwiigane Bwaake.” Lilino, ikyeene kikaya itolo akaandu akanini, polelo ikyeene kyo kyakubutiitu. U bwiigane bwa Kyala bo kyakubutiitu. Kangi umuundu aligweesa ikufimbilisigwa ukuloondesya u bwiigane bwa Kyala pa mwene unnyambala pamo pamwene unkiikulu, ikyakubutiitu kya Kyala.

17 Ngimba uswe tukusyaagania bulebule? Pauli, ikyeene kyamanyisiigwe ku mweene. Umweene aayobile ukuti umweene akaalaalusiisye ku muundu aligweesa, nagumo umbili pamo ililopa. Umweene akaabuukile ku sukulu nayimo, iseminale nayimo. Umweene akaali nakyo nakimo ukuboomba ni kyeene. Loli umwene. . . Ikyene kyaasetuliigwe ku mwene na Yeso Kristi, Uyu aalyagene nagwe pa nsebwe gwakubuka ku Damaska, nkati mu—mu Lumuli ngati Mbanda ya Moto, kangi Ulwene lulinkunkoolela umweene. Kangi umweene alinkubuuka ku Arabia, kangi kula umweene alinkwituugasya ifyiinja fitatu. O, ngimba ugwe utikwinogonela kala kaali kabalilo kamo, Nkundwe Egan? Ifyiinja fitatu Pauli paasi kula mu Arabia, iyasimile akayumba kamo akanini pa buyobumo, ikweenda kweenda pa kipaalo, ni finienga fyoosa ifyaiyolo. Abeene bakaali nafyo ifipya; Pauli yo aasimbile ifyeene, fiyofiyoyi. Mulamula mu finienga ifi, mumo fikuti Kyala, ku bwaandilo, aatubiikiile ngaani uswe ku Bumi Bwasypwa. Mumo fikuti Umweene ayaga pakutuma Yeso, ukuti ukwisila mu Likemo ili uswe tweesa tukuyaga nu bwaabuke ku Mpiki gwa Bumi. “Bala baabo Umweene aabamanyiile ngaani, Umweene alinkukoolela; bala baabo Umweene aakoolile, Umweene atalile aalitikisye; bala baabo Umweene aalitikisye, Umweene atalile iimiike.” Kyala, ukufuma ku bwaandilo bwa kiisu, aatubiikiile ngaani uswe ku bwiimikigwe bwa banabalumiana. Lilino ikipeligwa kyoosa kikukoloma, ukuguulila ku bubonekelo bwa banabalumiana ba Kyala. O, une mbagiile ukwinogonela Pauli aali na kabalilo akanunu. Une ngunyonywa angali ndinagwe kula nu mweene. Bule ugwe?

18 Lilino umweene alinkuyoba, “Umweene aateendike ukuti tumanye uswe ikyakubutiitu.” Ega u Mbepo Mwikemo pa

ugwe akabalilo kamo, kangi anda ukubopesya Ikyo kangi keetesya muumo Ikyeene kikubukilaga. Pamusi apa une naali, o, kifuki amaminiti malongo matatu ukufuunda, itolo ukukeetesyaamo ikimanyilo kabilikosa; lumo mma, une nguyobaga sinda gwa ikyo, amaminiti kalongo na mahano pakati pa tubalilo uto. Kangi une ndinkwaanda ukubopesya, kangi une ndinkwinogona, “Ikyakubutiitu, kyo kyakubutiitu bule!” Kangi i Lisimbo lilinkumbimba une ukugomokela mu Lwitikano Ulukulu, polelo ukugomokela mu Lwitikano Ulupya; ndikupinya ikindukimo palikimo, ukukeeta ikyakubutiitu kya Kwisa Kwaake, ikyakubutiitu kya bwiigane Bwaake, ikyakubutiitu kya uswe ukwituugasya palikimo. Kumbukilaga, ikyeene kikabagila ukumanyisigwa mu sukulu ya seminale. Ikyeene kyo kyakubutiitu. Ugwe ukabagila ukukimanya ikyeene nu bumanyi, nu bufundakyala. Ikyeene kyo kyaakubutiitu iki kyaafisigwe ukufuma ku lwaalo lwa kiisu, kikuguulila ububonekelo bwa banabalumiana ba Kyala.

¹⁹ Mbula une, nkundwe gwangu, mbula une, kalumbu gwangu, ngima ko kabalilo kaki aka abanabalumiana ba Kyala bayangamo siku ukubonekela panja pa kabalilo aka lilino? Ngimba ko kabalilo kaki aka kaalimo siku mu syaambukulu, abeene bayaga pakubonekela akabalilo akakuponesya ikipeligwa kyoosa? Ikipeligwa, ikipeligya kyeene kikukoloma, kikuguulila ku kabalilo ka bubonekelo. Fiki, bo ubohumbe bukateendekigwa, bo u Mbepo Mwikemo akoneleligwamo siku panja, bo loosa u—loosa u Lwitikano Ulukulu, ukukiindilila paasi pala, kula kukaabagiile ukuyako ububonekelo. Ubweene bulinkufimbilisigwa ukuguulila akabalilo aka. Lilino ifindu fyooosa fitwaaligwe, fikwiisa, fikwibuumbila mmwanya ku libwe lya pantu, ku bubonekelo bwa banabalumiana ba Kyala ukwisa kangi, kangi u Mbepo gwa Kyala ikwisa mu bandu aba, nubupelelesye fiyo, mpaka ubutumigwe bwaabo bwisakuya kifuki fiyo ngati bwa Kristi mpaka ubweene bwisakuluungisya ku Mweene ni Kipanga palikimo.

²⁰ Balinga bafundilemo siku isyambukulu sya ma piramidi? Une ngusakikisya unkiikulu yumoyweene apa aafyuusisye ikiboko kyaake. Umma ndaga.

²¹ Kyala aasimbile ama Baangeli matatu. Limo lya gene lyaali yo Zodiaki mmwanya, ilyo lyo i Baangeli lyakwaanda. U muunde aali gwakuti akeetege mmwanya ukusyaagania ukuti Kyala yo ikufuma mmwanya. Konga u Zodiaki, ngimba umwe mufundilemo siku ikyeene? Ikyeene kikupa ni ngulilo yoosa, yope ni ngulilo ya kansa. Ikyeene kikupa u bwaandilo, ikyakwa-...ukupaapigwa kwa Kristi. Ngimba ikifwani ikyakwanda kyo fiki mu Zodiaki? U mfunde. Ngimba ikifwani kya bumalikisyo kyo fiki? Leo i ngalamu. U Kwisa kwakwanda nu Kwisa kwakibili kwa Kristi, fyooosa fya ikyeene fisimbigwe nkati mula.

22 Polelo i Bāngéli ilyakukōnga ili lyāsimbígwe, lyāli mu lyālabwe, likukōlelígwa “mapiramidi.” Kyāla alinkusimba mu mapiramidi. Linga ugwe kufūnda agēne, kētésya isyambukulu isyaiyolo na ma bwīte, mūmo agēne gāyengelígwe bo bukāli ubonangike bwa mōgesyo.

23 Ilyabutatu lyāsimbígwe pa kalatasi, i Bāngéli, panongwa ya kīsu ikikulumba, ikyamahala iki kikwísága. Lilino, mūno Kyāla ēndíle ukusuluka ukukīnda i ngulilo, uswe tuli pa Leo i ngalamu. Uswe tuli pa kufwik’ikitili kwa piramidi. Uswe tuli mwa Buku gwa Busetuli, ku ntu gwabumalíkisyo. Sayansi yikuti uswe tuli kuli na maminiti matatu bo kukafika kilo-pakati. O, inogona isya kūko uswe tuliko.

24 Kangi kētésya, unko uswe twēge i piramidi, iyēne yo mbepe. Iyēne yikwēnda mu luko ngati mwa mbafu-tatu.

25 Akabalilo kako uswe twali paasi apa ukwānda ku ngulilo ya kipanga, ukufuma ku Butendekesi nkabalilo ka Luteri, itolo u mūndu ukuyoba umwēne āli Nkristi, pamo kyāsanusyága ubumi pamo ubufwe bwāke. Abēne bāngogága umwēne panongwa ya kuyoba itolo umwēne āli Nkristi. Polelo ukubūka ukukīndamo mu kufwīmígwa. . . Ingulilo yiliyōsa, ukukīnda akabalilo kāke, kwālipō ukufwīmígwa. “Bosa aba bikwitugasya mbunyakyala mwa Kristi Yeso bisakukubilwaga ubufwīmígwe.” Mu ngulilo ya Luteri, ikyēne kyāli kinyali ukuyoba “gwaLuteri.” Ugwe gwegigwaga ukuya mumilisi, kangi gwābagile ukubīkígwa ku bufwe. Utubalilo twīngi abēne babagogaga abēne pa lwēgo, ukubōkya abēne, na filifyōsa ifingi, ku baLuteri.

26 Polelo ikipānga kilinkufīnyisígwa, bo ngati i piramidi. Ikyēne kilinkwīsa mu likato ilingi ilya ipyāna, iki kyo kyāli kukemesígwa. Akabalilo ka Wesley, akabalilo kāko umwēne ākemíle ikipānga kya Anglican, alinkumanyisya ukukemesígwa. Ikyēne kilinkwīsa mbunini kāngi, polelo abēne balinkukōlelígwa ikipāmbō kya būmílisi.

27 Balinga nkati muno aba bāli baMethodisti, pamo bāli, pamo balūngisígwa ni kipānga kya Methodisti? Sinda gwa umwe. Ngimba mumenye ukuti ikipanga kya Methodisti kyāli kifuki ukuya na Mbepo Mwikemo akabalilo kamo? Une mbukileko ku fipānga fya Methodisti nukubakēta abēne bikugwa pāsi pa kipālo, nukusopa amīsi mu kisyo fyābo nukubakupukulila abēne nifikupukupu, ukupīnga Mbepo Mwikemo ukuti āngisága pa bēne. Uko ko kutalusya. Lilino, ubu bo bwanaloli, kuli mu fyāmba fya Kentucky kūko uswe twāli na baMethodisti. Umwe bamiana mwe bingila kipanga panja apa. Uswe twali na baMethodisti kunyuma kula, na baBaptisti. Uswe tubūkíle pāsi ku kigemo nukutikana yumo kunnine ku nyuma mpaka uswe tuli ni kindukimo. Uswe twisíle ukukīnda, uswe twītūgésye nubukīndāne ukufuma pala.

²⁸ Loli ugwe kwisa itolo pala kangi kubika ingamu yako pa buku nukuyoba, “Une ndi gwa Methodist.” Kangi ukwēga ikiyugānīlamūnyu nukunyāfila utwīsi utunini pa ugwe, kangi ikyo kyōsa kya ikyēne. Ukukīndilīla nukufwāla ibūndu, ukwipakapaka, ukubopesya ukubopa kwa falasi, ukulagusya, injuga, ukukina amakina aganjuga na filisyōsa ifīnine, pōpe umMethodisti unnunu, muketile. Uyo akabagila ukuya mMethodisti. Uyo yo itolo mwingila kipanga. Uko ko kutalusya. Baptisti, injila yilayila, baPresibeteri, ukukīndilīla injila yilayila.

²⁹ Bo mūmo David duPlessis āyobīle, “Abīsukulu, Kyāla akaya na bisukūle balibōsa.” Kyāla akālīmo siku na bisikūlu. Umwēne ali nabo abana lōli komma abīsukūlu. Uko ko kutalusya. Ugwe. . .kangi abandu aba bikwīsa mu kipanga ba Methodist, pamo ikipanga kya Pentekosti, pamo ikipanga kya Baptisti, panongwa ya māma pamo tāta gwāko āli mPentekosti pami mBaptisti, polelo ugwe gwe mwīsukūlu. Abēne bāli bāna. Ugwe gwe mwīsukulu, muketile. Popāpo Kyāla akaya nakyo nakimo bo ikyo. Ikipānga kali nafyo bīngi ba ikyo, loli komma—loli komma—komma i—komma. . .Kyāla atikuya.

³⁰ Lilino, kētésya ifi, nkyēni ukusuluka mpaka ikyēne kikwīsa pāsī lilino, bo ikyēne kikwīsa ku bunini, i kipānga. Ingulilo ya Pentekosti yālisīle mula. Yila naloliloli yātūmwīle amagengelemia ga mīngi. Polelo ngimba ikyēne kyābōmbīle fiki? Ikyēne itolo kyālekīle abaMethodisti na baLuteri bōsa kunyuma.

³¹ Lilino u Mbepo Mwikemo ālyēndīle itolo nkyēni ukusōkamo ukufuma mu ngulilo ya baPentekosti. Ngimba abene bābombile fiki? Abene balinkwipangania, balinkwitēdeka bēne, “Uswe twe ba Assemblies of God.” “Uswe twe ba Oneness.” “Uswe twe ba Twoness.” “Uswe twe ba Church of God.” “Uswe twe *iki*, pamo *ikyo*. Ugwe ukayamo nkipanga, ugwe ukabagila ukubūka ku Mwānya mpaka ugwe ubīkége ingamu yāko mwa būku gwītu.” O, bo butoyofu buki! Une ndikupasya kali ugwe guli gwa Baptisti, m’Methodisti, m’Presbeteri, ugwe bika ingamu yako pa Buku gwa Bumi akabalilo kako Kyāla ikubika iyēne pala. Linga ugwe gwabikilīgwe ngāni ku Bumi Bwasyēpwa, Kyāla isakukukōlēla ugwe mu njila yimo, mulimosa, yimo—yimo injila pamo iyīngi. Umwene naloliloli isakubōmbāga. “Bosa aba Tata ambele Une bisakwisaga kwa Une.” Kali kyo kipānga kiliku iki ugwe gwingile, ikyo kikanakyo nakimo ikyākabombapo ni kyēne. Lōli ikipānga-kipāgūke kitisamo siku ukubōmba akāndu kamokēne kwa ugwe, lōli kibagīle ukukupīnga ugwe fīyo ukukīndilīla na Kyāla, lōli ikyēne kisa—ikyēne kitisamo siku ukubōmba nakimo ikīngi. Ukubalūndīka umwe palikimo mu kipāmbō kya bitiki na basitakwitika. Naloli, ugwe kutika ikyo kulikōsa ugwe kubūka, kangi abēne bāli nakyo kōpe na Kumwanya. Popāpo, ikyēne kyo kinunu mōsa, lōli ugwe kusūbila

ku kipānga-kipāgūke kyāko. Keta kwa Yeso, Umwene yo Yuyo ugwa kuketako.

³² Lilino bo uswe tukwīsa palapala pāsi ku...abēne bālinakyo...Ngimba balīnga...une ngusubila u nkīkūlu uyu apa āfyūsise ikiboko kyāke, ukuti ugwe gwāfundīle amapiramidi. Ugwe umenye, ipiramidi yikafwīkīgwēmo ikitili, bule iyēne? Nasiku kikabikīgwēmo iibwe-kitili pamwanya pa lyēne. Abēne nasiku, bātōlīgwe nukukyāga ikyēne. Abēne bakamanya iki kyābombīgwēmo siku ku kyāne. Fiki? Nongwa ya fiku ibwe-kitili likābikīgwēpo pamwanya pa lyēne, ibwe-ntu, pamwanya pa ilyēne? Panongwa yakuti Umwēne āpīkīgwe akabalilo kāko Umwēne ālīsīle. Umwēne āli yo Ibwe ilipīkīgwe. Uko ko kutalusya. Lōli ilyēne lisakufwīkīgw'ikitili. Uko ko kutalusya. Kangi polelo amabwe gala aga gikufwāna ukusyungutila Ibwe-ntu lila, gisakuyaga mabwe aga gisakuyaga lōsa gākufwāna ngati Ibwe lila, mpaka gisakufwānikisya ni lyēne, kilūngisyo na pōsa—palikōsa. Ipiramidi lyo lipetelesye fīyo ugwe ukabagila ukubopesya ulūbo lwa lezala pakati pa gēne, palapala amabwe gala gikwāgana palikimo. Ubukeka-mabwe ubumogi bwa luko. Gamo mwa gēne gābagīle ukuya masito bamia ba ma tāni mmwanya mu mbepo, kangi nubupelelesyo fīyo gabīkīgwe palikimo.

³³ Iyo yo njila Kyāla ikutwāla i Kipānga Kyāke. Uswe nukufwanikisya tulungisenie palikimo, indumbula yimoyēne kangi ukukolelelāna kumokwēne. Lilino yumo ikuyoba, “Mulimosa, abaLuteri kunyuma kula bakāli nako nakamo.” Komma umwe ukwītīka ikyēne. AbaLuteri bisakwiisa panja mu busyuuke itolo nukufwana bo babaangi aba bisakwiisa panja mu busyuuke. AbaBaptisti, abaPresbeteri, kangi boosa a bana ba Kyala, bisakwiisa panja mu busyuuke bula. Kangi iyo yo nongwa umwisyugu abandu bikuyoba, “O, ena, kwisakuyako ulusasano ulwakupyaagila ulu lwisakubuuka panja apa nukupoka amamiliyoni mia yumo ga baPentekosti. Abeene boosa bisakupokīgwaga kangi ukweene kwisakuyangako u Kunyakiligwa.” Ugwe gusobile. U Kunyakiligwa kula kwisakuya bamia ba maelifu, uko ko kutalusya, loli abeene bisakubuumbigwa ukufuma ku fyinja maelifu ntāndātu ga bupoki boope, ifyinja maelifu ntāndāni kunyuma. U mundu ikweenda mu Lumuli bo u Lumuli lukwiisa ku mweene, umweene ikukilania amalulalo akabalilo kaako umweene ikwiisa ku gene. Lilino, linga umweene ikupiika Ulweene, polelo umweene ikulekigwa mu ngisi. Loli linga umweene ikumilisya ukukiindilila nkyeni!

³⁴ Lilino, ketesya, akabalilo kako u Kwisa kwa Ntwa Yeso kuli kifuki fiyo ku kiboko mpaka u Mbepo ukufuma kubutali paasi apa...itolo panandi ubwiitikisigwe, ukukemesigwa, ulosyo lwa Mbepo Mwikemo, kangi lilino mulamula mu kabalilo la kwiisa kwa Ibwe-ntu. I Kipanga kikufimbilisigwa ukuya nubupelelesye

ngati Kristi mpaka Kristi ni Kipanga fibagiile ukwilungisya palikimo, u Mbepo yumoyweene. Kangi linga Mbepo gwa Kristi ali mwa ugwe, Umweene ikupela ugwe ukuya mumi u bumi bwa Kristi, ukuboombela ngati Kristi, ukubomba imbombo sya Kristi. “Umwene uyu ikwitika mwa Une, imbombo isi Une ngubomba isakubombaga yope.” Yeso aayobile ikyo. Muketile? Lilino uswe tukuyaga pa kuya, uswe tuli nubutumigwe bukwiisa ubu bo itolo katikati ngati bumi bwa Kristi. Ngimba ubutumigwe bula bukulingania fiki? U Kwisa kwa Ntwa.

³⁵ Keeta ikyeene nkiiisu umwisyugu, kangi keetesya iki Khrushchev ikuyoba, fyosa ifindu ifikulumba ifiingi ifi, kangi inganikano ingulumba isya nkisu-kyapasi papapa kifuki, pa kabalilo kalikosa, kibagile ukubuuka kubufu i sekondi yiliyosa. Uko ko kutalusya. Kangi linga ikyo, uswe tumenye ukuti ikyo kyo kifuki fiyo. U mundu aligwesa gwamahala abagiile ukubala mu fikalatasi fya nongwa pamo ukupilikisya pa rediyo, kangi bikumanya ukuti ikyo kyo kili kifuki. Ena, kumbukilaga, Kristi ikwisa ku Kipanga Kyake bo ikyo kikaali ukuboneka. Popaapo ngimba kuli kifuki lelebule u Kwisa kwa Ntwa Yeso? Lumo bo ulukomano ulu lukaali lukamalika ikilo iki. Uswe tuli kukabalilo kabumalikisyo. Naloliloli syabwanaloli.

³⁶ Keetesya ikipanga bo ikyeene kisile, bo ikyeene kikweenda. Itolo ega ikyeene mu linogono lyaako, umwe basyambukulu mwe mukufuunda isyambukulu. Keeta i kipanga kya baLuteri pasi pa Iwitikisigwe, bisile itolo nubupupwe ukufuma ku Kikatolika, keta ikyeene kikweenda. Polelo keeta Wesley ikwiisa kifukiko panini, ukubuuka mbukemesigwe, ukwiiluka mu Masimbo. Keeta palapala pakati, aba Wesley. Polelo ikikoonge iki kikwisa mula yaali ngulilo ya Pentekosti. Kangi i ngulilo ya Pentekosti nu lupyantikisyo lwa fikuungilwa, ifikuungilwa fyamwambepo. Lilino, keeta ku ngulilo yikwiisa lilino kulakula kumwanya ku Ibwe-ntu. Mukuketa iki une ngasanusya? U Kwisa kwa Ntwa, kuteendekiigwe ukumanyigwa. Kyala ni fipeligwa fyosa kikuguulila ikipanga ukubwaaga pamwenepamwene ubuyo bwaake.

³⁷ Ulutamio umwiisyugu, une...kifuki aligwesa une naalyaagene. Une na baaluliigwe panja, uswe twegaga... Une ngufiimbilisigwa ukuya nulugelo lwa mumbili, umwe mumenye, linga uswe tukubuuka mfishu fyapanja, umwe ba misyoni na ba bosa bo abo mumenye ikyo. Akabalilo kaako une naageligwaga mu mbili abeene baalindweele panja pa kyumba kimo kula, une nanwaga kila ikyaiyolo...kyabonekaga kwa une ngati litapa, pamo kindongwa, pamo ikindukimo, kangi une—une nanwaga ikyeene. Une naakeetile ukukilania kula, ngwitugasya paasi, ukuguulila kwa sinda gwa sala nukukeeta ukuti kali ikyeene kyaasokilemo muunda mmyangu pamo mma. Une naakeetile ukukilania kula, kangi kula aaliko unkikulu unnini, aabonekaga ngati kindu kimo ikipelakisa aali kifuki ukufwa.

Umwēne āli fiyo . . . utulūndi utunini kangi utukōngi utunini. Kangi une ndikūmilisya ukwendendeka ukufuma ku nnyambala uyu ukubūku ku nnyambala yula, unnyambala uyu ukubuka ku nnyambala yula, ngusegelela ku mweene unkiikulu, mpaka une naafikile kuuko umweene aaliko. Umwēne aabonekaga ngati kindu ikinini ikipelakisa kyāli kifuki pakufwa. Kangi une ndikufika kifuki nu mweene, une ngikuyoba, “Nswaga une, mama.”

Umwene alinkuti, “Mwabomba ndaga?” O, umwene aali mbine fiyo!

Kangi une ndinkuti, “Ngimba fiki fitamisye?”

³⁸ Umweene alinkuti, “Une naabuukile ku Tucson ukunjaatila umwana gwaangu undindwana. Une ndinkubina, abeene bikutoligwa ukukyaaga iki kitamisye.”

³⁹ Une ndinkuti, “Ikindu kimokyene une ngulonda ugwe ukulalusya.” Une ndinkuti, “Une ndi ndumbilili gwa Nongwainunu. Ngimba ugwe gwe Nkristi? Ngimba ugwe gwhiteendekisye ukubuuka linga isala yila yikwiisaga?”

Kangi umweene alinkuti, “Une ndigwa kipanga *kyakuti-na-kyakuti*.”

⁴⁰ Une ndinkuti, “Ilyo likaya lyo lilaalusyo une nakulaalusisye ugwe. Ngimba ugwe gwe Nkristi gwisusigwe na Mbepo gwa Kyala kangi gwhiteendekisye ukubuuka akabalilo kaako Umweene ikukukoolela ugwe?” Unkikulu yula akaameenye nukumanya iki une naayobelaga. Muketile? O, kyo kyakuboneka ikipelakisa nki ikiisu kilimo!

⁴¹ Lilino, “ukuteendeka ukumanyisigwa kwa uswe isyakubutiitu sya bwiigane Bwaake,” u kwiisa . . . Unko une mbabalile umwe ikindukimo. Une nabalaga ukukilania . . . Unko uswe tusanukile kula lilino ku “ikyakubutiitu kya bwiigane Bwaake.” Unko uswe tusanukile ku Bahiburi apa itolo i miniti, untu gwa 7 gwa Bahiburi, une ngusuubila ikyeene kili. Kangi une nguloonda ukubabalila umwe ikindukimo iki kisakubateendekaga umwe ukwiipilika kanunu fiyo akabalilo kaako uswe tukwinogona isya uswe ukwiituugasya palikimo mabuyo Gammwanya. Bahiburi, untu gwa 7.

*Kabuno u Melekisedeki uyu, (Lilino keetesya.)
umwalafyale gwa Salem, umputi gwa Kyala
gwapamwanya unkiinde, . . .*

⁴² Ngimba ikyakubutiitu kyo fiki liliko? Apa pa kilipo ikyakubutiitu, keetesya iki. Ngimba u Mwinitu uyu yo ywaani, “ikuteendeka, ukumanya, ikyakubutiitu kya bwiigane Bwaake,” uyu Melekisedeki? Une nguguulila kuli aligwesa apa, i Baangeli likaali likusanuka. Bahiburi, untu gwa 7, Pauli ikuyoba, unnyambala yulayula ugwa Bagalatiya.

Kabuno Melekisedeki uyu, mwalafyaale gwa Salem, mpuuti gwa Kyala ugwapamwanya unkiinde, . . . aalyaagene na Abraham ikugomokako ku bubuute bwa banyafyaale, kangu alinkunsaya umweene;

Kwa yuuyu yoope Abraham aapeele i kiyabo, ikiyabo kyakalongo kya fyoosa; ikiyākwānda ukuya ubusanusi, mu busanusi Mwalafyale gwa bugolofu, . . . ukufuma apo . . . Mwalafyale gwa Salem, (Yo ywaani u Mwinitu uyu?), uyu yo, Mwalafyaale gwa lutengano;

Kisita taata, kisita maama, kisita luyungu, ukusita kuya kali bwaandilo bwa masiku, pamo ukumalisya kwa bumi; . . .

⁴³ Ngimba yo ywani u Nnyambala uyu? Ngimba yo ywani Umweene? Umweene akaalimo siku na taata, Umweene akaalimo siku na maama, Umweene akaalimo siku ubwaandilo, pamo akaalimo siku nako akabalilo Umweene isakufwamo siku. Umweene aalyaageene na Abraham ikiwiisa ukufuma ku bubuute bwa banyafyaale. Ngimba umweene aabomaga fiki? Umweene aabuukile ukwakummwega Loti, ukundwe gwaake unsobi, ukuntwaala umweene ukungomokesya. Kangi umweene aabuutile abanyafyaale; iki, abanyafyaale bala baabuutile; une ngwitikisya kalongo pamo kalongo na bahano abanyafyaale, kangu ifitaangala fyaabo. Loli Abraham alinkubafwiika ifyaabwiite abaambombo bake nukubuuka ukundondeesya umweene, ukwiipaagula mweene nkilo, muketile, akabalilo kaako umweene aalinkolile umweene nkabalilo ka nkilo. O, nkundwe uswe tukubomba mu ngisi, u Lumuli lyeene ulu uswe tuli nalo lo Lumuli lwa Nongwainunu. Loli umweene alinkwipaagula mweene, nukunkola umweene nukuntwaala umweene ukungomosya. Kangi pa nsebwe gwaake ukugomokela, bo ubwiite bumalike!

⁴⁴ Unko uswe tubuuke ku Bwandilo 14, itolo i miniti, ukweega akapango ukupilikisigwa kanunupo. Unko uswe tubuuke kula apa mu Bwandilo, gwabuna- . . . Une ngusubila ugweene go gwa 14, Bwandilo 14. Ena, unko uswe tweekege Bwandilo 14:18, ukwanda. Unko uswe itolo twaande itolo panyuma pa ikyo. Unko uswe, ena, ukwanda, 18, Bwandilo 14:18, “Kangu Melekisedeki . . .” Lilino, uyo yo Abraham ikugomokela ukufuma kubugoge bwa banyafyaale. Aagomokiile, pa nswebwe gwaake ikugomokela, ikuntwala ukugomosya Lot, abandu boosa aba abeene baanyakile. Boosa!

⁴⁵ Ngati Davidi, uyu aabuukile nukwakweega i . . . Ngimba Davidi aabombile fiki? Aalyeegile akafyaata akanini, alunkubuuka panja nukukamanda akang’osi akanini aka ukufuma mu ndomo gwa ngalamu. Inogona isya fyaata, ukuloondesya akang’osi. Ywani nkisu abagiile ukuboomba ikyo? Mbula yo mundu nki muno isakuboomba ikyeene, fyusya

ikiboko kyaako. Une ngukubulaga ugwe mbibimbibi itolo ukuti ugwe gwe nsobi. Ugwe ukaalimbweene une ngufyusya ikyaangu. Umma, une ngaabagiile ukukwandondesya umweene na kandusu ka malongo-matatu-nakimi-ntāndātu, nakamo. Loli umweene alinkunkonga umweene ni fyaata, akapatu akanini ka kipapa ngati, ni milisi mibili pa keene, ukusyugusya akeene ukusyungutila. Panongwa...Kangi akabalilo kaako akene kaalisile akabalilo ukuti Goliati ukuteendeka ukwiitufya kwaake, umweene alinkumfwiima Goliati, kangi umweene alinkuti, “U Kyala gwa ku Mwanya anyitikiisye une ukuponesya akang’osi ukufuma mu ndomo gwa ngalamu, ukufuma mu ndomo gwa kiindiingo.” Umweene aamenye akeene kakaali kafyaata mma. Ageene gaali maka ga Kyala aga gaabuukile nu mweene. Umweene aali yo Yula uyu agomokiisye akang’osi.

⁴⁶ Kangi ikyo kyo iki uswe tukuyoba umwisyugu. Kyala aali nabo abaDavidi balipo ukusyungutila, ena nkulumba, aba bo bikulisya ing’osi sya Tata. Kangi apa na apo akabalilo kaako ilyuulu likwisaga, pamo u kansa ikwisaga, pamo ikindukimo, kangi akunyeela pabutali ukufuma maboko ga ngaanga. Ikyo kitisakwimika u Davidi yula, umweene isakubuuka itolo nkyeeni panja pala ukumfwima mwinitu yula, na kafyaata akanini, ka, “Suma kalikoosa mu Ngamu Yangu, akeene kisakupiigwaga.” Une ndikupasya, abagaanga babagiile ukuseka, kangi aligwesa uyungi abagiile ukumuugiila umweene, umweene ikumfwimaga umweene mulimosa, ukutwaala ing’osi ukugomokesya ku kibaga. Ena, nkulumba. “Umweene yo mwana gwa Kyala, sosyaapo ikiboko kyaako pa mweene!” Ukutika ingalamu iyi paasi, polelo ingalamu yilinkufyuuka, umweene alinkumamanda umweene mu ndefu nukungoga umweene; akalumiana akanini akanandi fiyo, lumu ubusito mapaundi malongo lwele pamo malongo lweele na limo.

⁴⁷ Keetesya. Melekisedeki, u Mwalafyaale gwa Salem iki kyo kuti Mwalafyaale gwa Lutengano, iki naloli Salem alambalele ukukilania pa kaamba. Umwene yo Mwalafyale gwa Yerusalemu, Yuyo ikyeene kyaaali. Ikyo kyo katikati iki Yuyo aali, Mwalafyale gwa Yerusalemu. Iki, Yerusalemu pakwaanda akoleligwaga Salemu, iki kyaali luteengano; ikyo kyo aali Yerusalemu pakwanda, bo ikyeene kikaali ukukooeligwa Yerusalemu. Umwene aali Mwalafyale gwa Yerusalemu. Umwene aali yo Mwalafyale gwa bugolofu, u Mwalafyale gwa lutengano, u Mwalafyaale gwa Salemu. Umweene akaali na tata nayumo, Umweene akaali na mama nayumo, Umweene akaali nu bwaandilo bwa masiku, Umweene akaali nabo ubumalikisyo bwa bumi, Umweene akaali nalo uluyungu. O, o, o! Ngimba yo ywaani u Mwinitu uyu? Nketeesya Umweene. Bo ubwiite bumalike, ukufuma paapo ubuponjoli bwaaponjoliigwe, ketesya iki Umweene aayobile. “Kangi Melekisedeki,” ilinandi lya 18, untu gwa 14, Bwaandilo.

Kangi Melekisedeki mwalafyaale gwa Salem alinkutwaala panja unkati nu bwaalwa: kangi umweene aali mputi gwa Kyala ugwapamwanya ukukinda.

Kangi umweene alinkunsaya umweene, kangi alinkuti, Asayigwege ayege Abram ugwa Kyala ugwapamwanya unkinde, mwenenakyo gwa myaanya ni kiisu:

Kangi asayigwege ayege Kyala ugwapamwanya unkinde, uyu aboombile apefifye abalugu baako nkiboko kyaako. Kangi umweene alinkumpa umweene ikyakalongo kya fyoosa.

48 Unko uswe tukiindilile ukubala.

Kangi u mwalafyaale gwa Sodomu alinkuyoba kwa Abraham, Mbapo une abaandu, kangi ega ifyoombo fiyege fyaako.

Kangi Abram alinkuyoba kwa mwalafyaale gwa Sodomu, Une mfyusisye ikiboko kyaangu kwa NTWA, u Kyala ugwapamwanya unkinde, umweenenakyo gwa myaanya ni kiisu, (Pilikisya muumo umweene aatumuliile kila, hum, muumo umweene aakipeeliile ku mweene!)

Ukuti une ndisakwegamo ukufuma ku ndisi mpaka na ku lugoye ya kilato, kangi une ndisakwegamo nakamo kalikosa, komma kalikoosa aka . . . kangi bagile ukuyoba, kangi ikyo kya kyaako, usulwe usayobege, Une numpelile Abram ukuya nkabi:

Ukupāgulápo kyeene kikyō abanyaambala abakeke balile, . . .

49 Keetesya u Melekisedeki uyu akabalilo kaako Umweene aalyaagene na Abraham ikwisa ukufuma ku kugoga kwa banyafyaale. Ikyakubutiitu kya Kyala lilino kibiikigwe pabwelu! Ngimba aali yo ywani Umweene? Nayumo . . . Abeene bikutoligwa ukusyaaga isyambukulu isya Mweene, panongwa yakuti Umweene akaali nagwe u tata aligwesa, Umweene akaali nagwe u mama aligwesa, Umweene akali nako akabalilo kalikosa aka Umweene aalyaandile, Umweene akaalimo siku na kabalilo kalikosa Umweene aafwilemo siku, popaapo kali siku Umweene ali yo Ywani aakali aali mumi. Umweene akalimo siku nu bwandilo bumo, popaapo Umweene akaabagiile ukuya yumo uyungi loli El, Elah, Elohim; unjepo-mwene, untugasye-mwene, Mwenemaka Kyala!

50 Yeso aali na Tata, Yeso aali na mama; Yeso aali nu bwandilo bwa masiku, Yeso aali nu bumalikisyo bwa bumi bwapakiiisu. Loli u Mundu uyu akaali nagwe pamo tata pamo mama, ameni, nayuma tata pamo mama. Yeso aali nabo bosa-babilo Tata na mama. U Nnyaambala uyu akaali nagwe pamo tata pamo mama.

Ameni. Kangi ngimba Umweene aabombile fiki, bo ubwiite bumalike, ukufuma paapo Abraham aalyeegile ubuyo bwaake?

⁵¹ Ukufuma paapo i Kipanga kikwiituugasya pa buyo Bwaake, uswe tukukooleligwa ku bufwiikigwe bwa bana, mwa Mbepo Mwikemo. Kangi akabalilo kaako aligwesa u nnyaambala ikwima pa buyo bwaake, iki Kyala ankooliile umwene ukubomba, nu kwiima mpaka bumalikisyo bwa nsebwe, ukufwima abasobi.

⁵² Ikyakwanda, Pauli ikweega ulutende loosa ukufuma mu kyeene, popaapo lilino, “Linga ugwe ukooleligwe, linga ugwe ukaya itolo uyuganisigweemo mu linogono lyaako ukwisila mu luko lumo lwa bufundakyala, linga ugwe nalolili upaapigwe mwa Mbepo, polelo Kyala aakubiikiile-ngaani ugwe bo lukaaligwa ulwaalo lwa kiisu, ukubiika ingamu yako pa Buku gwa Kang’osi gwa Bumi, kangi lilio uswe tukwisa palikimo ukwituugasya mabuyo Gammwanyamwanya mwa Kristi Yeso. A baandu abikemo, ikikolo ikiikemo, abandu abaswiigisye, ubuputi bwabunyafyale, ukupa amakemo gamwambepo kwa Kyala, iki kyo, ifipaso fya milomo gyiitu ukupa ulutufyo ku Ngamu Yaake.”

⁵³ Abandu bikwisa kangi nukuti, “Abandu batoyofu.” Naloli abeene bali; amahala ga Kyala bo butoyofu bwa mundu, kangi amahala ga mundu bo butoyofu kwa Kyala. Ifyeene fikukanikana, kimo ku kinine.

⁵⁴ Loli ikipanga ikisusigwe-na-Mbepo ikyanaloli, kiiswiile na maka ga Kyala, kiituugesye palikimo mmabuyo Gamwanyamwanya, kikupa amakemo agamwambepo, indufyo kwa Kyala, u Mbepo Mwikemo ikwendeka pakati pa beene, ukumanyila-ngaani ubutulwanongwa nukukoolela panja ifindu ifi fili pakati ba beene ifi fisobi, ukugolosigwa mosa nukuteendeka ikyeene ukuya kili kitenenefu kangi kipelelesye. Panongwa ya fiki? Akabalilo koosa mu Kuyapo kwa Kyala lilipo i Likemo lyalilopa.

⁵⁵ Lilino kumbukilaga, uswe twabukile ukukinda ikyene ulubunju ulu. Ugwe ukaapokigwe ukwisila mu Lilopa mma, ugwe *kukyūngigwa* mpokigwe ukwisila mu Lilopa. Loli ugwe gwaapokiigwe ni lipyana, ukwisila mu lwiitiko, ukwitika llyeene. Kyala aakung’usisye ku ndumbula yaako panongwa yakuti Umweene akubiikile-ngaani ugwe. Ugwe ulinkukeeta mwanya kangi ugwe gwaaliitike ikyeene, ukwitikisya ikyeene. Lilino i Lilopa likuteendeka uluhombe panongwa ya mbiibi syaako. Kumbukilaga, une naayobile, “Kyala atikuntobesya untulwanongwa panongwa ya koonanga mma.” Umweene yo ntulwanongwa ukwanda itolo. Umweene ikuntobesya u Nkristi panongwa yakoonanga. Kangi polelo panongwa yakuti Umweene antobiisye umweene, Kristi aalyegile ubutobesigwe bwiitu. Polelo bukayapo nabumo ubutobesigwe kwa bene

aba bali mwa Kristi Yeso, aba batikwenda ukukongesya umbili'mma, loli bikukoongesya Mbepo. Kangi linga ugwe kubomba akandu kamo, ikylene kikaya kyabwiiigane mma. Ugwe utikoonanga nubwiiigane mma. U mundu uyu ikoonanga nubwiiigane, ikubuuka panja nukoonanga nubwiiigane, akisamo siku mu Mbili gula nalino. Loli u mundu uyu akabalilo kako ali mula, umweene yo mfwe, kangi ubumi bwaake bufisiigwe mwa Kyala, ukwisila mwa Kristi, afungiligwe nu Mbepo Mwikemo, kangi u mohesi akabagila nukumwaaga umweene, umwēne ali kubutali fiyo kunyuma nkati mula. Umwēne isakufimbilisigwága ukusóka panja pa pala bo mohesi abagile ukunkolamo siku umwēne. “Kabuno ugwe uli mfwano!”

⁵⁶ Mbula u mundu umfwano umweene yo nsyobi kangi keeta iki kikuboneka. Mubaya umweene pa lubafu kangi yoba, “Ugwe gwe lisyobi lyaiyolo, ugwe,” umweene atisakuyoba ni lisyu limo. Kangi ikyo kyo kutalusya, umweene isakulaambalala itolo pala.

⁵⁷ Kangi u mundu uyu afwiile mwa Kristi, ugwe ubagiile ukunkolela umweene lisyobi, ukunkolela umweene kalikosa ugwe kulonda, umweene atisakufyukamo siku mmwanya ukufwana ni kyeene. Linga kalikosa, umwene isakusokapo ukubuuka pabuyo bungi nukwakukwiputula ugwe. Uko ko kutalusya. Loli, o, bamo mwa beene bo baabumi fiyo. Ikyo kyo une ngwinogonela, uswe tubagisenie ukusyila abandu abafwe. Bala baabo bafwiile mwa Kristi, uswe tukubasyila abeene mmisi. Utubalilo tumo uswe tukusyila abandu bingi fiyo aba buumi, akabini nukulwana kwingi fiyo, kangi balipo bingi fiyo nkipanga. Loli uswe tukabagila ukupaagulania ikyo, loli Kyala ikubomba. Umwene amenye abandu Bake. Umwene amenye ing'osi Syaake. Umwene amenye ilisyu lililyosa. Umwene amenye bana Bake. Umwene amenye yuyo Umwene abagile ukunkolela panja, Umwene amenye yuyo Umwene asungulilengaani. Umweene amenye yuyo Umweene apele ifindu ifi, iki Umweene ikwiteendeka Mwene ukumanyigwamo. Mumo Umweene . . . Kyala abagile ukubiika ulusubilo mu bana Bake, pa kyakubomba, amenye ukuti abeene bisakubomba ikyeene katikati.

⁵⁸ Ngimba umwe mukwitika Kyala ikubomba ikyo? Fiki, Setano aayobile kwa—kwa Yobu ilisiku limo . . . alinkuti kwa Kyala ilisiku limo, “Ena, Ugwe uli nagwe u mbombi.”

⁵⁹ Kyala alinkuti, “Akayamo nayumo nkiisu bo umweene. Umweene yo nnyambala umpelelesye.” Aali ni lusubilo mwa umweene.

⁶⁰ Setano alinkuti, “O, ena, umweene ali nafyo filifyosa mbupepe. Nyitikisya une nje nagwe umwene akabalilo kanini kangi une ngunteendekaga umweene ukuhelula Ugwe pa kisyo Kyako.”

61 Umwene alinkuti, “Umwene ali mmaboko gako, loli komma ugwe ukwega ubumi bwake.” Muketile? Kangi umwene abombile kilikyosa loli ukusitakweega u bumi bwake.

62 Loli, o, Yobu, mbuyo bwa . . . ngimba umwene aabombile fiki? Ngimba umweene aalinhelwile Kyala akabalilo kako Kyala aalyegile abana bake, akabalilo kako umweene aaboombile ifindu ifibibi fyosa ifi ku mweene, kangi filifyosa? Yobu akalilamwilemo. Umweene alinkugwila pa kisyo kyaake nukwiiputa. Haleluya! Alinkuti, “Untwa aapele kangi Untwa egile, yisayigwege i Ngamu ya Ntwa!” Mwaketa lelo umwe.

63 Kyala âménye ulusúbílo Lwāke mwa Yobu. Kyala amenye bo bwingi buki Umwene abagile ukukusubila Ugwe. Umwene amenye bo bwingi buki Umwene abagile ukunsubila une. Loli iki uswe tukuyobelapo lilino ko kubīka mbuyo umwanike uyu.

64 Lilino, akabalilo kāko i Bāngeli . . . Akabalilo kāko u bwīte bumalike bōsa, akabalilo kāko kilikyōsa kimalīsígwe, polelo ngimba iki kyo kindu kyakukōnga kyo fiki? Ngimba kyo kindu nki uswe tukubōmba ukufuma pāpo ubwīte bumalīke? Ngimba umwe mumenye iki uswe tukubōmba? Uswe tukwāgāna na Melekisedeki. Unko uswe tusanusye Matai 16:16, nakalinga itolo, tukeete linga ikyo kyo kitalusye pamo mma. Mwikemo Matai, untu gwa 16 kangi ukwanda ni linandi lya 16. Une nsisimikisye ukuti ikyo kyo kotalusya, Matai 16:16. Matai ntāndat- . . . Umma, ikyo kyo kusoba, kikāgile ukuya kifuki. 26:26. O, 16 apa, Umwēne ikuyoba kwa Simon Peteri; nhobokela, une ngāsānwisye ukuyoba ikyo. 26:26, ’nongwa yakuti itolo ifyakulya fyakugonela ifyabumalikisyo, ikyo kyo iki une ngugela ukufikako. Matai, untu gwa 26 kangi ilinandi lya 26. Lilino uswe tummwagile umwēne, apa uswe tuli, ku fyākulya fyakugonela ifyabumalikisyo.

Kangi bo abēne bikulya, Yeso alinkwēga unkati, kangi alinkusaga ugwēne, kangi alinkunyosola ugwēne, nukupa ugwēne ku bafūndigwa Bāke, kangi alinkuti, Ega, ilya; iki kyo mbili gwāngu.

Kangi umwene alinkwēga ikikopo, kangi alinkupa amapalo, nukupa ikyēne ku bēne, ikuyoba, Inwa umwe kyōsa kya ikyēne;

Kabuno ili lya lilopa lwa lwitikano ulupya, kuli ili lyonekelígwe bīngi ku bomoligwe bwa mbībi (m-b-ī-b-i, mbībi, Bakristi aba bikubōmba ifindu nubusobi).

65 Syosa silikanunu, “Loli—loli . . .” Pilikisya, ilinandi lya 29.

. . . Une nguyoba kwa umwe, Une ndisakunwa ukufuma umwisyugu ikya i kipaso kwa mpesa, mpaka ilisiku lila akabalilo kāko Une ngunwa ikyēne mbupya na umwe mu kitangalala kya Tāta.

⁶⁶ Kiliku? Ikindu kilakila Melekisedeki ābōmbīle ukufuma pāpo Abraham ālyēgile ubuyo bwāke. Alinkubīka abanyāmbala bāke mbubāmbike, nukupōnjola ubwīte, kangī ālisīle ku kāya, kangī Melekisedeki alinkwīsa panja nu nkati nu bwālwa. Ukufuma pāpo ubwīte bumalīke, polelo uswe twisakulya i Fyakugonela Fyābwēgi nu Ntwa Yeso nkīsu ikīpya. O, yisayigwege i Ngamu ya Ntwa. Umma ndaga.

⁶⁷ “Ifyākubutītu fya bwīgāne Bwāke, ukufwāna nu bwīkyéle Bwāke ubununu,” ukugomokela nyuma kāngi mwa Baefesi, 9, “kīkyo Umwēne iganīlepo pa Mwēne.”

Ukuti mu kabalilo ka bwīkute bwa kabalilo . . .

⁶⁸ Kangī kumbukilaga ikyo, uswe itolo tukilēnie pamwanya pa kyēne. Baefesi, untu gwa 1, ilinandi lya 10.

Ukuti mu kabalilo ka bwīkute bwa kabalilo . . .

⁶⁹ Lilino, uswe twāmanyīle ukuti ubwīkute bwa kabalilo bukugūlīla fiki? Ubwīkute bwa kabalilo kōsa, akabalilo aka bo ubutulwanongwa bwisakwīmisīgwa, akabalilo kāko ubufwe bwisakwīmisīgwa, akabalilo kāko ububine bwisakwīmisīgwa, akabalilo kāko ubutulwanongwa bwisakwīmisīgwa, akabalilo kāko bosa bwa buniongafu (kila ifindu ifiniongasigwe, iki mōhesi aniongēsye) bwisakwīmisīgwa, akabalilo kāko akabalilo kēne kisakwīmisīgwa. Kētēsya.

Ukuti mu kabalilo ka bwīkute bwa kabalilo ukuti umwēne lumo abagīle ukubūngania . . . mu kimo mwa findu mwa Kristi, fyosa-fibili ifi fili kumwanya, kangī ifi fili pa i kīsu; mope mwa umwene:

⁷⁰ “Ukubūngania ifindu fyosa ukwisila mwa Kristi.” Bo une njobile ulubunju ulu, tosa utubwe utunini utu uswe tukutwāga, ifi ifikulumba ifindu ifinini, ugwe ubagīle ukugūsa utwēne mu Bwāndilo, ugwe ubagīle ukutugūsa utwēne mu Ukusōka, ugwe ubagīle ukutugūsa utwēne mwa Levi, kangī tutwāle utwēne ukukīndamo, kangī mu Busetuli utwēne twisakumalikisyaga ukuya Yeso. Ugwe ega Yosefu, ugwe ega Abraham, ugwe ega Isaki, ugwe ega Yakōbe, ugwe ega Davidi, ugwe ega aligwesa gwa tubwe tula, abanyāmbala bala ba Kyāla, kangī kēta linga ugwe utikumbona Yeso Kristi ikubonesīgwa mwa aligwesa pamwene gwa bēne. “Ukuti Umwēne abagīle ukubūngania ifindu fyōsa mwa Yumo, Kristi Yeso.”

⁷¹ Lilino, ukukīndīlīla panandi lilino, lilino ilinandi lya 11.

Mwa yuyo uswe nuswe tukabile ikilingo kimo, . . .

⁷² O, “i kilingo.” Yumo ikufīmbilisīgwa ukukulekela ugwe ikindukimo, ukwingila ikilīngo ikyēne. Ngimba uko ko kutalusya? I kilingo! Ngimba kyo kilingo nki uswe tuli nakyo? Ngimba kyo kilingo nki une nāli nakyo? Une ngalinakyo na kilikyōsa. Lōli Kyāla ālindekīle une i kilingo akabalilo kāko

Umwēne ābikīle ingamu yāngu pa Buku gwa Kang’osi gwa Bumi bo lukāligwa ulwālo lwa kīsu.

⁷³ O, ugwe kuyoba, “Lilino, gulila panandi, nkundwe, Yesu ābōmbīle ikyo akabalilo kako Umwene ākufwīlīle ugwe.” Umma, Umwene nasiku. Yeso alinkwisa ukūla i kilingo kila kya une. Bala lilalila ilikōnge ilina- . . . lulalula ulukindi ulukōnge.

*Mwa yuyo uswe nuswe tukabile ikyakuboneka . . .
tukabile i kilingo, ukuya tusunguligwe-ngāni ukufwāna
nu lubīngilīlo lwa umwēne yuyo ikubōmbabōmba ifindu
fyōsa ukufuma pa lufundo lwa bwīgāne bununu bwāke
mwēne:*

⁷⁴ Kyāla, bo lukāligwa ulwālo lwa kīsu, bo mūmo uswe tusulwīke ni kyēne ukukīnda mu kamanyisyo, umwe bāndu, mūmo uswe tumbwene Kyāla āli njepo-mwēne, mūmo fikuti mwa Umwēne mwāli lugano. Mwa Umwēne mwayaga pakuya Kyāla; kukālipo nakimo ukummwīpūta Umwēne. Mwa Umwēne mwāyaga pakuya u Tāta; pala pāli . . . Umwēne āli pa Yūmwōnga. Mwa Umwēne mwāyaga pakuya u Mpoki; nakimo ukuyōnga. Mwa Umwēne mwāyaga pakuya u Mbumbulusi. Ifyo fya fyakūmbagīla ifya Umwēne. Kukālīko nakimo kula. Polelo Ubwake Bwake Mwēne, ubwifūnde Bwāke Mwēne ubununu bulinkutwāla ifindu ifi, ukuti Umwēne abagīle ukwisila mu Nnyāmbala yumoywēne ntiga, Kristi Yeso, ukubūngānia ikyēne kyōsa palikimo kāngi. O! “Ikisige kikaketa, imbulukutu yika . . .” Yo nongwa ikyēne kyo kindu kyakubutītu!

⁷⁵ Kēta, “atusūngulīle-ngāni uswe ku kilingo iki.” Linga une ne kilingo ikyanaloliloli ikya kindukimo, linga Kyāla ikukung’usya ku ndumbula yāngu nukuyoba, “William Branham, Une nākukōlīle ugwe iyolo fiyo, bo lukāligwa ulwālo lwa kīsu, ukulūmbilīla i Nongwainunu,” une ndinakyo i kilingo, i kilingo kya Bumi Bwasypwa. Lilino, Kyāla ātumīle Yeso ukutēdeka i kilingo kila kiyege kyanaloliloli kwa une, panongwa yakuti kukālīko nakimo une nābagīle ukubōmba uku—uku ukwīngilāpo pa kyēne. Une ngāli nako nakamo, ikyēne kyāli naloliloli, kikayako nakimo une nābagīle ukubōmba. Lōli mu bwikute bwa kabalilo Kyāla alinkutuma, nkabalilo Kāke Mwēne akanunu, Yeso u Kang’osi, abūtīgwe ukufuma ku lwālo lwa kīsu. Ililopa Lyāke lyālyōnike ukuti une mbagīle ukubūka ku kilingo kyāngu. Ukuya fiki? I kilingo kiki? Ubwān’ubulmiana, ukuya mwanundumiana gwa Kyāla.

⁷⁶ Kangi lilino Iki kibagīle itolo ukubapīta umwe pammilo ku bufwe. Lōli ngimba umwe mumenye ukuti abanyāmbāla aba bo banabalumiana ba Kyāla bo bakyāla bānīke? Balinga aba bakimenyemo siku ikyo? Balinga bamenye ukuti Yeso āyobīle lululo? Ili Bāngēli, Yeso āyobīle, “Ngimba ululagīlo lwīnu lukāyobīle, lwēne, ukuti umwe mwe ‘bākyāla’? Kangi linga umwe mukubakōléla abene bākyāla . . .” Iki, Kyala aayobile

mu Bwandilo 2 ukuti abene baali bākyaāla, panongwa yakuti abene baali, bāli nubulagili ubwisusye pa bulagili bwa kisu. Umwēne alimpele umwēne ubulagili pamwanya pa findu fyosa. Kangi umwēne alinkutāga ubwākyaāla, umwēne ātāgile ubwānubulumiana, umwēne ātāgile ikitāngalala kyāke, kangi Sētāno alinkwingilapo ukupoka icyēne. Lōli, nkundwe, uswe tukugūlila kuli bu bubonekelo bwa banabalumiana ba Kyāla aba bisakugomokelāga nukwingilāpo ukupoka kāngi. Tukugūlila u bwikute bwa kabalilo, akabalilo kākō i piramidi yikufika pamwanya, akabalilo kākō abanabalumiana ba Kyāla abīsūle bisakubonekelāga, akabalilo kākō a maka ga Kyāla gisakwēnda panja (haleluya) kangi gisakwēga amaka galigōsa aga Sētāno āpokile ukufuma ku mwēne. Ena, nkulumba, agēne gāke umwēne.

⁷⁷ Umwēne yo Logos uyu ābūkile ukufuma kwa Kyāla, ikyo kyo kyabwanaloli, yula āli yo Mwānundumiana gwa Kyāla. Polelo Umwēne alinkupela u nnyāmbāla yula u kyāla unnini. Kangi Umwēne alinkuyoba, “Linga abēne bikubakōlēla bala bābo i Lisyu Iya Kyāla Iyālisileko, abasololi, linga abēne bikubakōlēla abēne ‘bākyaāla’ aba i Lisyu Iya Kyāla Iyālisileko...” Kangi Kyala āyobīle lūlo, Mwēne, ukuti abene baali bākyaāla. Umwēne ālimbūlīle Mōse, “Une ngutēndīke ugwe kyāla, kangi nuntēndīke Aroni nsololi gwāko.” Ameni. Whuu! Une lumo mbagile ukubombelo bo kisyutantu gwabwiputi, lōli une ngaya mma. O, akabalilo kākō ifisige fyāko fikwīgūka nukukēta ifindu ifyo. Umma ndaga. Umwēne ātēndīke u nnyāmbala ukuya kyāla, u kyāla mu kitangalala kyāke. Kangi ikitangalala kyāke kikubūka ukufuma ku nyānja ukubūka ku nyānja, ukufuma kukiloboko ukubuka kukiloboko; umwēne ali nu bulagili bwa icyēne.

⁷⁸ Kangi akabalilo kākō Yeso ālisīle, ukuya yo Yula Kyala unsita butulwanongwa, Umwēne alinkusisimikisya icyēne. Akabalilo kākō imibelo gikupūta, Umwēne alinkuyoba, “Lutēngāno, yaga kimyemye!” Ameni. Kangi akabalilo kākō u mpiki, Umwēne alinkuyoba, “Nayumo nu mūndu ikulyaga ukufuma kwa ugwe.”

⁷⁹ “Naloli, Une nguyoba kwa umwe, mwe muli bākyaāla banini, linga umwe mukuyoba ku kyāmba iki, ‘Sāmāga,’ kangi mutikwīlāmwa mu ndumbula yīnu, lōli mukwītīka ukuti iki umwe muyobile kisakubonekaga, umwe mubagīle ukuya nakyo iki umwe muyobile.”

⁸⁰ Būka kulakula kunyuma ku Bwāndilo, ku kyapabwandilo, ngimba icyēne kyo fiki? Lilino ikīsu kangi ikipeligwa kikukoloma, ukukūta, kilikyōsa kikwēnda. Fiki? Panongwa ya kubonekela kwa banabalumiana ba Kyāla, akabalilo kākō abanabalumiana abābwānalōli, abanabalumiana abakupāpīgwa, abanabalumiana abisusīgwe bikuyoba kangi ilisyu Iyābo likutūligwa. Une ngwitika uswe tuli pa mpaka gwa

ikyēne lululu lilino. Ena, nkulumba. Yoba ku kyāmba iki, unko
ikyēne kiyege lūlo.

⁸¹ “Nkundwe, une—une ngunyonywa *kyakuti-na-kyakuti*,
ikindu kimo kikubōmbígwa. Une ne mwitiki mwa Yeso Kristi.”

⁸² “Une ngupaga ikyene mu Ngamu ya Ntwa Yeso Kristi.”
Ameni. Ikyo kyo bubonekelo.

⁸³ “O, nkundwe, ifyakubyala fyāngu fikupya panja kwisilya.
Une ngaya nayo ifula yiliyosa pa kabalilo.”

⁸⁴ “Une ngukutumilága ugwe ukutima, mu Ngamu ya Ntwa.”
Kula umwēne ifula yikwīsa. O, ukugūlīla, ikipeligwa kilikyōsa
kikugūlīla ku bubonekelo bwa banabalumiana ba Kyāla. Kyāla
ākītikīsyē ikyēne ku bwāndīlo. Umwēne ālimpēle u nnyāmbala i
kitāngalala.

⁸⁵ Umwene apele Yeso Kristi, kangī Yeso alinkupa ikyene mu
Ngamu Yake, nu busisimikīsyē ubu, “Suma Tāta kalikosa mu
Ngamu Yāngu kangī Une nisakubōmbága ikyēne.” O, Nkundwe
Palmer! Ukugūlīla ku bubonekelo bwa banabalumiana ba Kyāla,
ubuyo, i Kipanga!

⁸⁶ Mūmo une njobīle, Būku gwa Baefesi yo Būku gwa Yoswa,
kangī Yoswa ukubīka mbuyo abāndu kūko abēne bikulōndígwa.
Lilino, linga abēne balinkusita ukwīma kimyemye, kangī
umwēne alinkumbika Efraimu *apa*, kangī ukukilania apo
ikīsu kya Manase, kangī *uyu* yula ābagīle ukugomokela
ikumana nukusēba, bulebule abēne bisakwisangamo ukwendela
palikimo? akabalilo kāko yumo ikuyoba, “Une ne mBaptisti, une
ne mMethodisti, une ne mPentekosti, une ne gwa Oneness, une
ne gwa Twoness, une ne *Mwakuti-na-gwakuti*.”

⁸⁷ Ngimba ugwe kubombaga bulebule ikyene? Imaga
kimyemye! Kyala yo ikulonda ukubīka mbuyo i Kipanga Kyāke,
abanabalumiana na banabalindwana ba Kyala. Kyāla, unko
une njege mūmi ukukēta ikyēne, lo lwīpūto lwāngu. Kifuki fiyo
mpaka une mbagīle itolo ukwipilika ikyēne mmaboko gāngu
kifuki, kikuboneka ngati. Ikyēne kili papapa apa. Ikyo kyo iki
une nyonyilwe ukukēta, ukugūlīla ku kabalilo pāpo ukwēnda
ukusuluka ulukīndi, pala alāmbalēle undemale alambalele pala,
ukufuma mūnda mwa nna, “Siliva na golidi une ngaya nafyo
nafimo.” O, ukugūlīla kuli bubonekelo bwa banabalumbiana ba
Kyāla, haleluya, akabalilo kāko Kyāla isakwitēndeka Mwēne
ukumanyigwa, akabalilo kāko abēne bisakwimika ububine,
abēne bisakwīmika kansa, abēne bisakwimika imbungo.

⁸⁸ Ngimba umwe mukwīnogona kansa kyo kindukimo?
Ili Bāngēli lyāyobīle kakwīsa akabalilo pāpo abanyāmbála
bisakubolága mulamula mu nyama syābo, kangī abakihōbe
bisakulyaga ukufuma mu mifimba gyābo bo bakāli abēne
nukufwa. Kansa yo kubaba kwa līno ku iki kikwīsa. Lōli,
kumbukilaga, ikīndu ikinyali kila kyākānisígwe mu lisiku lila
ukupalamasya bala bābo bāli ni Fungilo ya Kyāla. Ikyo kyo iki

uswe tukusukila lilino, ukwĩngĩla nkati nukubĩkigwa pabuyo pamwenepamwene mu Kitangala kya Kyāla bo sikāli ukutika imbungo inyali isi. O, bo bununu buki! Ubutali bwa kabalilo, ubwĩkũte bwa kabalilo, i kilingo.

Mwa yũyo uswe nũswe...tukabile...kilingo, ukuya twasũnguligwe ngāni...

⁸⁹ Ngimba ikilingo kyĩtu kyapēgĩgwe bulebule kwa uswe, ukwisila mu fiki? Ukusũnguligwa-ngāni. Ukusũnguligwa-ngāni ku kumanyigwa-ngāni. Ngimba Kyāla amanyaga bulebule Umwēne ābagĩle ukukusũbila ugwe ukuya ndũmbilili? Ukumanyila-ngāni Kwāke. “Komma umwēne uyu ĩganĩle pamo umwēne uyu ikubopa, pamo umwēne...Umwēne yo Kyāla uyu ikunāngĩsya ikisa.” Uko ko kotalusya, ukusũnguligwa-ngāni. Umwēne āmēnye iki kyāli mwa ugwe. Umwēne āmēnye iki kyāli mwa ugwe bo ugwe ukāli nukwĩsa pa kĩsu. Umwēne āmēnye iki kyāli mwa ugwe bo kukāli ukuyako i kĩsu ukuti ugwe gwĩsēpo. Uyu yo—uyo yo Umwēne. Uyo yo Kyāla unsitampaka, unsitampaka. Uswe tuli nu mpaka, uswe tubagile itolo ukwinogona numpaka.

⁹⁰ Ikyēne kifumile ukuya kinywāmu fiyo kwa une, ukufuma pāpo kila iki kyābonĩke kwa une. Une ngamanya. Akabalilo kākō une ngwĩnogona kula, akabalilo kākō une nālĩmĩle kula pa tubalilo tunini utwabusangulufu tula, nukwĩnogōna, “Kukayako nayomo kilabo.” Akālĩko nayumo mmayolo, kukayako nabumo ubumine, bukayako ubusulumanie. Kukayako ubusāngalũfu bwa panini, polelo bu bwĩngi bwa busāngalũfu; ubwēne bo bōsa busāngulũfu. O, mwe! O, akabalilo kako une nimege pala kangĩ une ndinkuti, “Ngimba kyo fiki iki?”

⁹¹ Lila i Lisyu linkuti, “Ulo lo lugano ulupelelesye, kangĩ kilikyosa iki ugwe gwakiganilemo siku kangĩ kilikyosa iki kyakuganilemo ugwe siku kili kuno na ugwe lilino.”

⁹² “Kangĩ ugwe kwisakututwāla uswe kwa Ntwa Yeso akabalilo kākō Umwēne ikwĩsa, ukuya fyabupōnjoli fya butumigwe bwāko.” Une nābabwēne abakĩkũlu abamogi bala bimile pala, bōsa bikungamanda une nukuywēga, “Ugwangu umpala, nkundwe nganigwa!” Nābabwēne abanyāmbāla bala ni nywĩli nyĩngi ukusyũngutila amakosi gābo apa, bikubōpa, ukungamanda une nukuyoba, “Ugwĩtu nkundwe unganigwa!”

Kangĩ une ndinkwinogona, “Ngimba iki kikusanusya fiki?”

Umwene alinkuti, “Abene bo bandu bako.”

⁹³ Une ndinkuti, “Abandu bangu? Kula bakābagĩle ukuyapo abaBranham bingi bo ulo, balipo maelifu-elifu.”

⁹⁴ Umwēne alinkuyoba, “Abēne bo bapĩnduke bāko!” Haleluya! “Abēne bo bapĩnduke bāko. Abēne bo bābo aba...” Ukuyoba, “Ugwe nketa yula uyu imile pala?” Unkikũlu ummogi

ukukĩnda uyu une ngetilemo siku. Alinkuyoba, “Umwēne ākindilepo ifyĩnja malongo mahano na mana mbukusi akabalilo kākō ugwe gwālindongolile umwēne kwa Kyāla. Yo nongwa umwēne ākūtāga, ‘Ugwāngu nkundwe nganigwa.’” Alinkuti, “Umwene atisakuyamo nkangale kangi mma. Umwēne akĩndile ukufuma kula. Umwēne yo bwĩkyéle bwa butubwa. Umwēne imile pala. Umwēne akabagila ukunwa a mĩsi gakunwa amatalalifu, umwene akagafũmbwa agēne. Umwēne akabagila ukulāmbalala pāsi nukugona utulo, nongwa yakuti umwēne atikukatala mma. Kukayako kilabo, komma mmayolo, pamo nakimo. Uswe tuli mwa Syēpwa lilino. Lōli ilisiku ilyalwĩmiko limo u Mwanundumiana gwa Kyāla isakwĩsa, kangi ugwe kwisakulongigwa ukufwana ni Lisyu ili ugwe gwālũmbilile ku bēne.” O, nkundwe!

Une ndinkuti, “Ngimba Pauli isakufĩmbilisigwāga ukutwāla ikibugutila kyāke?”

“Ena, nkulumba.”

⁹⁵ Une ndinkuti, “Une ndumbilile Ilyene katikati itolo bo yu Paulo aayobile Ikyene. Une ngēpukāmo siku, une ngēgamo siku ukubĩka nkipanga kilikyosa ifimanyisyo pamo kalikosa akangi. Une nasyele yulayula.”

⁹⁶ Kangi bosa ba abēne balinkuywēga nu kwitikisania kumobwene, “Uswe tumēnye ikyo! Uswe twēgamile nu busimikisye.” Alinkuti, “Ugwe kwisakututwāla uswe ku Mwēne, kangi polelo uswe twēsa twisakugomokela ku kĩsu, ukuya bũmi bwilanabwila.” O, mwe!

⁹⁷ Itolo pala une ndinkwanda ukwĩsa ku. Une nākētĩle, gulāmbalēle pala pa kitala, kangi une ndinkukēta umfimba gwāngu unkāngale apa gukukāngāla kangi gwānginya, kangi gusepetwike mōsa kangi—kangi gwāmbũngo mōsa kangi gutikuligwe pāsi, kangi une nāketĩle amaboko gangu kunyuma ya ntu gwāngu, kangi une ndinkwinogona, “O, ngimba une ngufĩmbilisigwāga ukubũka ku kindu kila kāngi?”

⁹⁸ Kangi une ndinkũmilisya ukupilika i Lisyu lila, “Umilisyaga ukugũtila nkyēne! Umilisyaga ukugũtila nkyēne!”

⁹⁹ Une ndinkuti, “Ntwa, une akabalilo kōsa une nĩtĩke mu bubũbulũsyo Bwamwakyāla, une ngũmilisya gwa ukwitika ubwēne. Lōli une ngugũtilāga panongwa ya myoyo, polelo ndula une. Une nguyaga nabo bĩngi fiyo kula une nisa. . . Unko une njemũmi, Ntwa, kangi une ngwisakubikāga abāngi elifu-elifu nkati mula, linga Ugwe kwĩsa itolo unkunyitĩkisya une ukuya mũmi.”

¹⁰⁰ Une ndikupāsyā yo lāngi nki, kyo kimanyisyo nki, kyo kikolo nki, iki abēne bali, abēne bo bamobēne akabalilo kākō abēne bikufika kula, kangi imikolofwa ya mipaka gila gikĩndile. O, une mbagile ukukēta abakĩkũlu bala, bamogi fiyo; ngakētāmo siku. . . gāli pāsi, inywĩli indali mpāka pāsi

ku nyuma syābo. Ama siketi amatali mpaka pāsi. Abēne bakafwēle ifilato. Ukukēta bala abanyāmbāla ni nywili insito ukusyūngutila amakosi gābo, imitu imikeseifu, imitu imititu, ni lāngi syōsa ingīndānekīndane. Kangi abēne bāsopāga ingongi syābo ukusyungutila une. Une nābagīle ukwipilika abēne. Une nipilikāga amaboko gābo. Kyāla yo Ndongi gwāngu, kangi ili Būku ilikemo ili līgwiķe. Une nābagīle ukwīpilika abēne itolo lūlo une ngwipilikīla ifiboko fyāngu pa kisyo kyāngu. Abēne bāsopāga ingongi syābo ukusyungutila une, kisita kwīnoga kwa bakīkulu bo mūmu kukuyīla lilino. Une ndikupāsyā kali ugwe uli mwīkemo bulebule, ugwe gwa ywāni, lo luko luki ulwa ndūmbilili ugwe guli, umpūti pamo kilikyosa ugwe ubagīle ukuya, akayapo u nnyāmbala nayumo abagīle ukundeka unkīkūlu asopege ingongi syāke ukūbatila umwēne, kisita kuya nu bwīpilike bwakinyonywo ubwābundu. Ubo bo katikati bwanaloli. Lōli, nkundwe, akabalilo kāko ugwe kukilania pakati pa apa na kwīsilya, ukwēne kukaya injila yila kula. O, mwe! Ikyene kyo fīyo...O, kula ko...Ikyene kyo kisitakubōmbīgwa. Ulwēne lo mōsa lugāno. Kilikyōsa kyo nkundwe gwānalōli kangi kilikyōsa kyo kalumbu gwānalōli. Bukayako ubufwe, nabumo ubusulumanio, nakamo akabini, nakumo nakimo, nakimo kubagīle ukwīngīla kula. Ikyēne kyo itolo bupelelesye. Ikyo kyo iki une ngwīyulīla. Ikyo kyo iki une ngubīkīla pabuyo.

¹⁰¹ Une ndinkuyoba, “O Ntwa, ikyo kyo iki une njilīle apa pa kipanga, ukugela ukubīka i kipānga ndubātiko.” Ukubabūla umwe, nkūndwe na kalumbu, kilipo itolo ikindu kimokyēne iki kibagīle ukwīngīla kila, ikyo kyo lugāno ulupelelesye. Komma panongwa yakuti ugwe kusūbilīgwa ku Branham Tabernacle, pamo ikipanga kya Methodisti pamo ikipanga kya Baptisti. Fila fyo mōsa finunu, ugwe ubagīle ukuya. Lōli, o, bīnāngu, umwe mukufimbilīsīgwa...Komma panongwa yakuti umwe mwāyobīle mu ndimi, mwāmogīle mwa Mbepo, panongwa yakuti umwe mukagīle pānja abōhēsi pamo musāmīsyē ifyāmba nu lwītīko. Ifyo fyo fyōsa fili kanunu, kabuno ikyo kyo kili kanunu kyōsa, lōli pōpe pene pāpo ulugāno ulupelelesye lula lulimo nkati mula. Kula ko kūko ulugāno ulupelelesye lwāli. Kangi ikyo kyo kindu kyēne iki kisakukwītīkīsyā ugwe nkati mula. Ikyo kyo kindu kyēne iki kibagīle ukwītūgasyā kula, ikyēne kyo kindu kyēne kyāliko, kula. O mwe! Ukwēne ko kufwīkīgwa. Kyāla, bo lukālīgwa ulwālo lwa kīsu!

¹⁰² Lilino, unko uswe tuye bēngo, unko uswe tugwāge ugu untu gumogwene ukumalīsyā, mulimosa, linga kyākubōmbīgwa, mu mamnīti kalongo aga gīkwīsa.

Kwa yuyo uswe tukabile ikilīngo... (Uswe tukwīngīla ikilingo nki? Bumi Bwasyēpwa)... ukuya basūngulīgwe-ngāni... .

Bulebule? Ngimba alīgwēsa ikupilikīsyā ikyo? Ngimba ugwe

gwākōlīle Kyāla? Umma, Kyāla akukōlīle ugwe. Abāndu bamo bikuyoba, “O, une itolo nālindondile Kyāla, kangī nālindondīle Kyāla.”

Ugwe ukābōmbīle mma. Nayumo umūndu ālindondīlemo Kyāla. Ikyēne yo Kyāla ikundonda u mūndu. Yeso alinkuyoba, “Nayumo umundu abagile ukwisa ku Myangu penepapo Tata Gwangu ikunkwaba umwene tāsi.” Muketile, ikyene kyo bupeligwa bwa mundu ukubopa ukufuma kwa Kyāla. Kangi ugwe kuyoba lilino. . .

¹⁰³ Ikyo, ikyo kyo iki kukundamia une, palema, ukulūmbilīla kwa umwe bāndu; mutikusyāla ukukīndilīla nkayīlo kalakala umwe mwabūkangāmo, pinduka lilino! Mbilika une bo une nguyoba, ISI SYO IKUTI U NTWA. Une ngikōlelāmo nimwēne iki, une ngaya mma. Lōli umwe mukungōlēla une nsololi gwīnu, pamo u nsololi. Ikīsu kikwītīka ikyo, ikīsu ukusyungutila, ma miliyoni na mamiliyoni na mamiliyoni ga bāndu. Une njobile nukutalula kangī mukusitakutalula ku mamiliyoni kalongo pamo—kalongo pamo kalongo na mabili, pamo ukongelelāpo, ukuyoba mubutalule. Une ngētīle malongo ga maelifu ga mboniboni ni fimanyilo ni fiswīgo, kangī komma yimo mwa syēne sitolīgwēmo siku. Kangi uko ko kotalusya. Umwēne āmbūlīle ngāni ifindu ifi fikatoligwāmo siku ukuboneka itolo katikati. Une ngummwēgāga unnyāmbala aligwesa ku lugelo panongwa ya iki. Uko ko kotalusya. Une ndikwīyobela ukuya nsololi, lōli umwe mbilikisya une.

¹⁰⁴ ISI SYO IKUTI U NTWA, ikyēne kisa kwēgēla ulugāno ulupelelesye ukukubīka ugwe mbuyo bula, kabuno ikyo kyo kyōsa kyāliko kula. Kali syo hela nki, bo bwingi nki bwa bubonesi bwa bwīputi, syo mbombo ilinga innunu ugwe ubōmbīle pamo kalikōsa aka ugwe ubōmbīle, ikyo kitisakubaligwa nakamo pīsīku lila. Ikyēne kisakwēgela ulugāno ulupelelesye. Popāpo kilikyosa ugwe kubōmba, ugwe lāmbalīka pa lubafu filifyōsa ifingi mpaka ugwe gwe itolo mwisusīgwe fiyo nu lugāno lwa Kyāla mpaka ugwe ubagīle ukubagāna aba bikukubēnga ugwe.

¹⁰⁵ Une ne itolo, bo mūmo une njōbīle ulubunju ulu, une nātendekīgwe, ubūmbe bwāngu bōsa bo ipyāna. A bāndu bīngi bikuyōba, “Lilino, ugwe ndunako inyuma yāngu kangī une nisakutunaga iyāko. Ena, ugwe kubōmba ikindukimo kuli une kangī une ngukubōmbelaga ikindukimo ugwe.” Ilyo likaya ipyāna mma. Ipyāna kokuti, linga inyuma yāko yikunyegēla, une nisakutuna ikyēne mulimosa, kali ugwe kutunaga iyāngu pamo mma; ugwe ubagīle ukungoma ni lipi pa kisyo, nukuyoba “inyuma yāngu yikulōndīgwa ukunyege. . . , pamo, yikulōndīgwa ukutuna,” une nisakutuna ikyēne. Muketile? Ikyo kyo kīkyo, bōmba ikindukimo. Une ndikwītīka mu mbombo. Une ngwītīka ukuti imbōmbo lo lugāno. Imbombo yo—imbombo ko kunāngisya ukuti ilipyāna libonīke. Une

ndikwītugasya gwābwanaloli ku nkasi gwāngu panongwa yakuti une ngusūbila umwēne ikunsōsyāga une linga une ngāligwabwānalōli, une ngwitūgāsya gwabwanaloli ku mwēne panongwa yakuti une nunganīle umwēne.

¹⁰⁶ Une ndikulūmbilīla i Nongwainunu panongwa yakuti une ngwinogona une ngubūkāga ku gehena linga une ndikulūmbilīla, Une ngulumbilila i Nongwainunu panongwa yakuti une nunganile Umwene. Naloliloli. Umwe mukwīnogona une angali ngukilania inyanja syamibelo sila, kangi indēge sila sikubeluka mmwanya na pāsi, kangi injasi sikumulika ukusyūngutīla, kangi—kangi filifyosa ifingi, kangi kifuki iminiti yilyōsa . . . kangi aligwēsa ikukūta, kangi “aba Tukukuponia Maria” bikukīndilīla mōsa mu ndēge, na filifyōsa? Abāndu bala bikwisyūsyā mu milisi gwakuponela gila, kangi u pailoti ukuyoba, “Amafuta gakufwana ukumālisya amaminiti kalongo na mahano ukongelelāpo, tukamanya kūko uswe tuliko.” Ngimba umwe mukwīnogona une mbagīle ukubōmba ikyo itolo—itolō panongwa ya busangulufu ubwa kubōmba ikyēne? Huu! Ngimba umwe mukwīnogona une nābagīle ukugomokela kula mmatēngēle kūko ba kiJeremani bafīmibilisigwāga ukubīka ifilwīlo fyābo ukusyūngutīla une bo *ulu* ikilo kilikyōsa nukunyēgēla une nkati nu kusōka mu lukomano, mpaka Mbepo Mwikemo ikwanda ukubōmba ifika? AbakiKomyunist bitūgesye na fyakukētēla pakilo, ukulōnda ukundusulīla une ukufuma i mailo yimo pabutali. Ngimba umwe mukwīnogona une angali ngubōmba ikyo itolo panongwa ya busangalufu bwa ikyēne? Panongwa yakuti ikindukimo mwa une kikugana; abēne bo bāndu aba Kristi āfwīlīle. Pauli āyobīle, “Une kukākuti ngigana itolo ukubūka ku Yerusalemu, lōli une ngubūka kula ukwakukōmelīgwa. Une ngubūka ukwakufwa. Une ngubūka kula ukwakufwa panongwa ya Ntwa.” Ikyēne kyo kindukimo, ulugano ulu lukukufīmibilīsyā ugwe, ulu lukukutēndēka ugwe. Uko ko katikati kotalusya.

¹⁰⁷ Linga une nālūmbilīle i Nongwainunu panongwa ya hela, linga ikyēne kyābagīle ukuya, une āngali ngaya ndinago ma dola maelifu malongo mabili ikilo iki isyakumelēlīgwa, une āngali ngaya mu kumelelīgwa mma. Umma, nkulumba. Panongwa yakuti une āngālī mbikile pa lubafu simo mwa—simo mwa ma miliyoni aga gapēgīgwe kwa une. Unnyāmbala yumo, unnyāmbala ātumīle ababombi ba FBI ni kikalatasi kya cheki kya ma dola miliyoni yumo-na-bāmia-bahano ihela. Kangi une nāyobīle, “Gomola iyēne kula.” Komma panongwa ya hela! Isyēne sikaya hela. Une ndikulūmbilīla i Nongwainunu panongwa ya hela. Komma panongwa ya ikyo!

¹⁰⁸ Iyene yo nongwa ya ulugano lula. Ikindu iki une ngulōnda ukubōmba, kyo, akabalilo kāko une ngukilania ulutūyo lwabumalikisyo kwisilya, iki kibagīle ukuya mu maminiti mahano ukufuma lilino, ikyēne kibagīle ukuya mu sala ibili

ukufuma lilino, ikyēne kibagīle ukuya ifyīnja malongo mahano ukufuma lilino, une ngamanya akabalilo nki ikyēne kisakuyaga. Lōli akabalilo kāko ikyēne kikubombigwaga, une ngufika kula, une ngulōnda ukukēta ugwe mbumogi bwa butubwa, mukubopa, nukuywēga, “Nkundwe gwangu unganigwa! Nkundwe gwangu!” Ikyo kyo iki kili mu ndumbula yangu. Iyo yo nōngwa. Une ndikugela ukukanikana na umwe ukuya—ukuya nkīndāne, lōli une ngugela ukubabīka umwe pa nsebwe ugu go nталusyе. Iyo yo njila yakwīngilīla. Komma ikipānga kyāko, komma ikipānga-kipāgūke kyāko, lōli ubupāpīgwe bwāko mwa Kristi. O, mwe! Whuu!

Mwa yuyo...uswe tukabīle...ikilingo, ukuya tusūngulīgwe-ngāni ukufwāna nu lubingililo lwa mwēne yūyo ikubōmbēla ifindu fyōsa ukufuma ku lufūndo lwa bwīgāne bwāke mwēne:

¹⁰⁹ Pilikisya. Uswe tukwīgalāga mu maminiti manandi. Pilikisya kifuki lilino bo uswe tukāli ukwīgala.

Ukuti uswe tubagīle ukuya ku ndūfyo sya lwīmīko lwāke, yūyo āsūbile ukwākwānda...Kristi.

Mwa yūyo umwe nūmwe mwāsūbile,...

¹¹⁰ Kētēsya iki lilino, kifuki. Fwāla amajekete gīnu, amajekete ga Nongwainunu. Kolelela imbulukutu syīnu siguke, pilikisya kifuki. Une ndi pa linandi lwa 13.

Mwa yūyo umwe nūmwe mwāsūbilemo, ukufuma pāpo umwe mwāpilīke...

“Ulwitiko lukwisa nu...” [Ikilundilo kikuyoba, “Kupilika.”—Nsimbi] “ukupilika i...” [“Lisyu.”] “Lisyu lya...” [“Kyala.”]

...ukufuma ukuti umwe mu lisyu lya bwanaloli,...

¹¹¹ Ngimba Bwanaloli bo fiki? I Lisyu lya Kyāla. Ngimba isyo ndalusye? Yohani 17:17, umwe mwe mukusimba a Masimbo, Yeso āyobīle, “Bakemesyāga abēne, Tata, ukwisila mu Bwanaloli. I Lisyu Lyako lyo Bwanaloli.”

...ukufuma...umwe mwāpilīke i...ubwanaloli, i nongwainunu ya bupoki bwīnu:...

¹¹² Ngimba bo bupoki buki umwēne āgelāga ukubabūla abēne? Ukusūngulīgwa bo lukāligwa ulwālo lwa kīsu (Ngimba ikyo kitalusyе?), ku bufwīkīgwe kwa banabalumiana, basungulīgwe-ngāni ku Būmi Basyēpwa. Lilino, ukufuma pāpo umwe mukwīsa mu Būmi Syēpwa, ukufuma pāpo umwe mupokīgwe, ukemēsīgwe, mwīsusīgwe na Mbepo Mwikemo, umwe mwe banabalumiana. Lilino Kyāla ikulōnda ukubabīka umwe pamwenepamwene, o, ukuti umwe mubagīle ukubōmbēla i Kitangalala Kyāke ni lwīmīko Lwāke.

113 Iyo yo Nongwainunu. Ukuya, ikyākwánda, pilika i Lisyu, “Pinduka, kangi osigwága mu Ngamu ya Yeso Kristi kubómole bwa mbíbi.” Ukusosyamo syosya imbibi syako, ukukóléla pa Ngamu ya Ntwa Yeso Kristi, panongwa ya Kisu ikifíngigwe. Ulufíngó luli kwa mwendanjila aligwésa uyu ali pa nsebwe. Linga ugwe gwasókilepo pa kâya ikilo iki, ntulwanongwa, kuyoba, “Une ngubúkága kula ku Branham Tabernacle,” Kyála ikukupa ugwe ulusako ikilo iki. Kilipo ikindu kimo kilipo pakati pa ugwe ni Kisu ikyâlufíngó. Ngimba i Kisu ikâlufíngó kyo fiki? U Mbepo Mwikemo. Iki kyâlipo pakati pa Yoshua ni kisu kyâlufíngó áli Yorodani. Katikati kotalusya.

114 Mōse, ukuya kyakwegelela kya Kristi, alinkubalóngoléla abána kula ku kisu kyâlufíngó, polelo Mōse akábégíle abána nkisu kyâlufíngó. Yoshua yo ályégíle abāndu mula nukuyabania ikisu. Yeso áhōmbíle untengo, alinkubalóngoléla abéne kula kwa Mbepo Mwikemo. Kyála alinkutuma Mbepo Mwikemo pási kangi Umwéne yo pamwenepamwene alinkubíka ikipānga ndubátiko, u mūndu aligwésa, ukummwísúsya umwéne nu Kuyapo kwa Būndu Bwáke. Umwe mukukéta iki une ngusanusya? Fyōsa mwa Kristi Yeso, mūmo Kyála ásungulile ngāni iki ku bukólélo bwa Nongwainunu iyi!

115 Pauli, Bakalatiya 1:8, alinkuti, “Linga u Gwāndumi ikwísa ukulūmbilíla kilikyosa ikíngi, unko umwe ayege ngunigwa.” U Bwānalóli, i Nongwainunu. Lilino pilikisya kifuki bo uswe tukukīndilíla ukubala, ukumalisya ilināndi.

...i nongwainunu ya bupoki bwīnu: mwa yūyo nūmwe... (Pilikisya kifuki)...ukufuma pāpo umwe mwālītike, umwe mwafungiligwe na Mbepo Mwikemo gwa lufingo,

116 Mmasiku gabumalikisyo, i Bāngéli lyāyobíle, lilino kētésya, mmasiku ga bumalikisyo pisakuyapo ifibukutíla fibilí fya bāndu. Kimo mwa fyéne fikuyaga ni Fungilo ya Kyála, ikíngi kila ubung’wale bwa kinyamana. Ngimba uko kotalusya? Balinga bamenye ikyo? Ena, linga Ikimyatiko kya Kyála kyo Ikimyatiko kya...Linga Ikimyatiko kya Kyála yo Mbepo Mwikemo, polelo kisita Mbepo Mwikemo bo bung’wale bwa kinyamana. Kangi i Bāngéli liyobile ukuti imbepo sibili sisakuyaga kifuki fiyo palikimo ukwene kwabagile ukusyoba Abasaligwa balabala linga ikyene kyaali kyakubagila. Ikyene kitisakubombag’imbombo ikyene, panongwa yakuti abene baali basungiligwe ku Bumi Bwasyēpwa. Muketile?

117 Ikipanga ukubūka, itolo bo ukumanya balipo abafūnde kalongo bābūkíle panja ukwakwágána nu Ntwa, bōsa bakemesígwe, bōsa bíkémo, aligwesa gwa bēne bakemesígwe. Bahano báli bakwílamwa kangi balinkusileka inyale syābo sikusima. Bahano báli na mafuta mu nyāle syābo. “Kangi, kéta i Nnyāmbála ikwísa!” Kangi abahano aba báli na mafuta

mu nyāle syābo balinkwīngila mu Fyābugonelo Fyābwégi. Kangi abangi bālekīgwe panja kūko kwāliko ukukūta nu kulila nukusya amīno. Yaga mwtēndekesye, kabuno ugwe ukamannya ko kabalilo nki u Ntwa ikwisa. Yaga na... Ngimba amafuta gikwīmilīla fiki mwi Bāngéli? Mbepo Mwīkémó.

118 Lilino kwa umwe umwīsyūgu, umwe bakūndwe ba Seventh-day Adentist mwe mwāyobīle ilisiku lya kihano-na-mabili lyo Fungilo lya Kyāla, twāla i Lisimbo limolyēne ukusisimikisya ikyēne. Ili Bāngeli lyāyobīle ukuti Ikimiyato kya Kyāla yo Mbepo Mwīkémó. Ketesya iki. “Iki . . .” Ketesya ilinandi lya 13 lilino.

. . . ukufuma pākuti umwe mwālītike, umwe mwafūngilīgwe na—na yu Mbepo mwīkémó gwa lufingo.

119 Sanukila ku Baefesi 4:30, une ngwitika ikyo kyo kyēne. Keta linga uswe tutikumwaga 4:30, keta linga iki kikaya kilakila. Baefesi, untu gwa 4 kangi ilinandi lya 30. Ena, apa ikyene kili, 4:30.

Kangi somma ukunsulumanisya Mbepo gwa Kyala, kuko umwe mummyatikigwe mpaka ilisiku lwa kutabuligwa.

120 Mpaka na ndili? Akabalilo kāko ugwe naloliloli, naloliloli kwāmbilīla Mbepo Mwīkémó, ngimba bo butali buki Umwēne ali ukumalika mwa ugwe? Mpaka ulusasanio ulukōnge, mpaka u mwīsukulu ikukukalalisya ugwe, mpaka u bwāna ikukūmanila ugwe? Mpaka ilisiku lwa kutabuligwa kwīnu! Haleluya!

121 Ukufūma pāpo ugwe ufwīle, ukufuma pāpo ugwe ulobwīke ukubūka nKīsu kila, ukuti ugwe gwīmīle kula na baganigwa bāko, ugwe ukālī gwīsusīgwe na Mbepo Mwīkémó. Lisimbo! Ugwe gwe itolo guli mūmo uyīlīle lilino, pene kukuti ugwe uli ni... ugwe usāmīle mu mbili ugūngi. Ugwe usanwisye itolo inyūmba. Iyi yālīsīle ukuya ngangale, ugwe ukābagīle ukwingisyāmo ifigelekelo pa yēne kāngi mma, amatapwa gāfikile pakubola. Uko ko kotalusya. Popāpo ugwe itolo gwatāgīle ikindu ikikūlu panja nukukileka ikyēne kikīndilīle ukubola pāsī, nukusāmīla mu yimo imbya. Ngimba uko ko kotalusya? “Kabuno linga ikitēmbe ikyamfu iki kikwēngeluka, uswe tuli nakyó kimo kikugūlīla.”

122 Ugwe mukukumbukila ilisiku limo, ukukīndamo mu ikyo? Akabalilo kāko umwāna unnini ikubūmbīgwa mūnda mwa māma, kangi iminnyofu iminnini igi gikubāya nukunyela nukukīndīla. Lōli itolo nakalīnga itolo pāpo māma ikugwīsyā umwāna yula kangi u mwāna ali ku kīsu, ikindu kyākwānda, gulipo umbili gwamwambepo ukunyaka akambili akanandi akakipeligwa kala. Lumo u ngānga akipele ikyene aka... [Nkundwe Branham ikukuba ifiboko fyake—Nsimbi] bo ulo, pamo ikindukimo ukukayugānia akēne, polelo, “Ng’wee, ng’wee, ng’wee!” Kangi nakalinga palapala ku libēle lya nna lila akēne

kakubūkága, “um, um, um,” kakwínúsyá akatu káke akanini mmwanya na pásí pamwanya pa libéle lya nna, ukupela indepa sya lupyú sila ukutwála ulupyú.

¹²³ Akangwāta akanini, nakalinga itolo linga akēne kagwīle ukufuma ku nna, akēne kakusumukága mmwanya pa tufundo twāke utunini ukufuma pa maminiti manandi. Ngimba akēne kakubōmbága fiki? Ukwēnda kulakula ukutalula kunyuma ukusyūngutíla, ukunkolelela u máma yula, nukwānda ukuyugānia untu gwāke unnini mmwanya-na-pási bo lula, nukulwága ulupyú lwāke. Haleluya! Ena, nkulumba.

¹²⁴ Akabalilo kāko umbili gwakipeligwa ugu gukwīsa mwa umwēne, gulipo umbili gwamwambepo gukugúlíla kuli ugwēne.

¹²⁵ Kangi akabalilo kāko umbili gwakipeligwa ugu gugwīsyígwe pāmfu, haleluya, gulipo gumo ugūngi gukugúlíla kwīsílýa! Uswe itolo tukusāma ukufuma mu gumo ukubūka mu gūngi, uswe tukwandula amabuyo gītu ga kwītugasyámo. Ugwakufya ugu gukufimbilisígwa ukufwála ubusitakufwa, ugwamwambepo ubu; ububolano ubu ukufwála ubusitakubola. Ugu ugwaiyolo ugwāngínya, gusepetwíke, umbili gwinēme mósa, lōli ugwe gutisakwānduka ububonekelo bwāke napanandi, une ngusanusya ukuti akabalilo kāko ugwēne gukufika kwīsílýa kula, ugwe pōpe kwisakuyaga nu mbepo yilayila.

¹²⁶ Unko une mbapepo umwe akandukamo akanini aka kakupilikigwa kakuniemba kwa umwe, lōli akēne ko i Bāngéli, polelo une nisakubapa umwe kamo aka kīsakwābulága ubuniembe ikyēne kuli umwe. Kētésya kimo iki. Akabalilo kāko ugwaiyolo Sauli, u—u mwalafyāle, u—u gwaiyolo undumbilili unywāmu ugwaiyolo gwakipānga-kipāgúke pásí pala akabalilo kala, umwe mumenye, uyu āli nu ntu ni fibega pamwanya pa bēne bōsa, kangi āli nu lutēnde, abēne bakāmenye nakimo ikya Kikindekipeligwa. Davidi afimbilisígwe ukwīsa nukuponesya akang’osi ukufuma nkanwa mwa ngalamu, ukugoga Goliati. Kētésya umwēne. Umwēne alinkubūka kubutali fiyo ukufuma kwa Kyāla, umwēne alinkfika ku kumbēnga uyu undumbilili umbunguluke-mwíkemo. Kangi mbuyo bwa kuya kuli umwēne, ukugela ukuntūla umwēne, umwēne alinkusanuka kukulwāna nu mwēne. Linga ikyo itolo kikaya kyakubonekela katikati, katikati kyakubonekela! Ukusāmbuka itolo ukufuma ku mwēne!

¹²⁷ Balinga bāli muno akabalilo kāko une nsōkengépo pa bwēndo bwāngu ubwākwānda, kangi nālūmbilíle, “Davidi ukugoga Goliati,” akabalilo kāko une nsōkengépo? Bīngi, bāmo, banandi ba kabalilo kaiyolo. Une nitēndekísya ukusōkápo kāngi pa iki. Kumbukilága iki, kēta iki itolo kyālisíle apa Pandungu ugu gwākīndága? Ikyēne kikwēndela itolo mulamula mu kiyabo ikīngi. Ulusasanio lwa Davidi ulwa kibili, ikiyabo kya kibili

kwa butumigwe bwāke. Ikyo kyo katikati kotalusya. Iki, polelo umwene alinkuya mwalafyale pamwanya pa Israeli. Ketēsya u butumigwe lilino bukwēndela pānja mu kiyabo ikinywāmupo, ukusōka panja mbukulumbapo. Momūmo yōpe Davidi. Une ngukētesua iki bo umwēne ikwīsa, Davidi, o, akabalilo kāko Kyāla alintēndike Davidi ukusōka panja pala nukugoga u ngalamu, kētesya, kangī ukugoga ikīndingo, polelo ukugoga u mFilisiti. Lilino, pala palīsilēpo akabalilo apa Kyāla āpēle imbepo inyali kula ku mwanundumiana ugwaiyolo uyu. Kangī ikya . . . Ku fiki? Ukumbēnga Davidi. Kangī une ngwītika . . .

¹²⁸ Lilino, amatepi aga. Lilino pilikisya, bakundwe, umwe mwe muli pa matepi aga, linga umwe mukukānikāna na une, nswāga une. Muketile, une mbaganīle umwe. Une nguyaga pakwāgāna na umwe kula kwīsīlya mulimōsa, muketile, 'nongwa yakuti linga ugwe gwe mūndu gwa Kyāla une nguyaga pakwāgana na ugwe mulimōsa. Loli, une ngulonda ukuyoba iki, apa iyi yo nongwa: Itolo panongwa yakuti Sauli ākētīle ukuti Davidi āli nakyo ikindukimo iki umwēne akāli nakyo. Polelo fiki fyābonike?

¹²⁹ Akanini akaiyolo “akafīte,” i Bāngēli lyāyobīle ukuti umwēne āli “mfīte.” Yula akāli mwāna ummogi fiyo mma, “mfīte” kokuti itolo unnini ugwaiyolo u luko lwa unōngafu ugwa mwīnitu. Kangī umwēne ābūkīle panja pala, kangī Sauli, fiki, umwēne alinkufwāla ifilwīlo fya Sauli pa mwēne, kangī une mbagīle ukwinogonela ikwākusīga kyālīsīle mpaka na pāsī pamwanya pa njayo syāke. Kangī umwēne alinkuti, “Sosyāpo ikīndu iki ukufuma kwa une. Une—une ndi . . .” Lumo umwēne ālimpēle umwēne idigrii ya dokotala, i Ph.D. pamo L.L.D., pamo ikindukimo, umwe mumenye. Mūmo umwēne āyobīle, “Une ngamanya nakimo isya kīndu ikyo, panongwa yakuti une ngakisisimikisya ikyēne. Unko une njenakyo iki, kīkyo une mmenye iki une ngubōmbelāga.” Ena, nkulumba. Umwēne alinkwēga ifyāta.

¹³⁰ Kangī abēne bātēndike Davidi ukuya nkalale panongwa yakuti abānabalīndwāna, ifipānga, ifipānga fīmbāga, “Sauli, ābagīle ukuti āgogīle amaelifu gāke, lōli Davidi agogīle agāke amalongo ga maelifu.”

¹³¹ Polelo umwēne alinkuya gwakabini, “Ikyēne kyo kila ikyaiyolo ikīndu kya Ngamu ya Yeso, kikayako nakimo ku Kyēne.” Uko ko kotalusya. Kangī ngimba fyo fiki Kyala abombile ku mwene? Kyāla ātumīle i mbepo inyali pa mwēne, ukumbēnga Davidi, kangī umwēne ālimbēngīle Davidi kisita nongwa.

¹³² Davidi ābagīle ukuniongotola amakosi gāke akabalilo kanandi kosa. Umwēne ābagīle, lōli umwēne alinkukileka ikyēne kibūke. Umwēne akāyobilēpo nakimo. Umwene naloliloli āngālī ābagīle ukubomba ikyene. Umwēne alinkukilania kula nukutumula unswīgāla gwa kijāsī kyāke, ikilo kimo,

ukugomokela, alinkuti, “Kêta kuno, umwe mukêfîle!” Ena, nkulumba, umwêne ângali abagîle ukubômba ikyêne, lôli umwêne itolo alinkundeka umwêne pamwêne. Umwêne âbagîle ukubongotola ikilündilo kyâke môsa nukubabalanía abêne, nukwânda ikipângânio ikya yûmwêne linga umwêne âlôndâga. Lôli umwêne akâbômbîle ikyêne, umwêne alinkundêka Sauli ukukîndilîla. Ukundeka Kyâla abômbé u kulwa. Ena, nkulumba.

¹³³ Popâpo bo umwêne âkîndilîle nkyêne panja kangî ulusasano lwâmâlîke pala, kangî ukufika pala, imbepo inyali yila yâfikîlepo nukuti Sauli alinkutoligwa ukuya nu kwâmuka nakumo ukufuma kwa Kyâla. Ukukîndapo akabalilo umwene. . . Mbepo gwa Ntwa aasokilemo ukufuma mwa mwêne. Kangî Samuéli, yûyo uyu abêne bâlimpîkîle, yûyo uyu naloliloli âli Lisyu lya Kyâla ku bêne, yûyo uyu âyobîle ku bêne bo abêne bakâli nukulônda ukubômbela ngati kîsu. . .

¹³⁴ Ngimba ikipânga kikulônda bulebule ukubômbela ngati kîsu? Nongwa ya fiki Pentekosti, bôsîgwe, gwa Methodisti umwendelamo na Mbepo Mwikemo, na ba Baptisti, kangî ba Presbeteri bikulônda ukubômbela ngati kîsu? Nongwa yafiki abêne bikubômba ikyêne? Une ngamanya. Une—une itolo ngutoligwa ukukipilikisya ikyêne. Ugwe kuyoba, “Ena, ikyêne kyo kyakusangulusya fiyo ukukina injuga, itolo panini panandi panongwa ya busangulufu, itolo injuga panini ya kanini itolo,” kilikyôsa umwe mukukikôlela ikyêne. Iyêne yo mbîbi. Ugwe ulingasulwa ukuya nafyo ifindu fila mu nyumba yâko. “Fiki, ikyêne kikaya kyakufulasya ukunwa itolo akakopo akanini kanandi ka bwâlwa. Uswe itolo tukunwa tunandi. Une nu nkasi gwângu tukunwa tunandi ku namayolo.” Kangî ikindu kyâkwânda umwe mumenye, abâna bînu bikunwa panandi. Naloli ikyêne kili.

¹³⁵ Kangî umwe bakîkûlu, hum, môhési yo itolo atêndîke i. . . Ikyo kyo iki umwene âbômbîle mbwandilo, kangî umwene naloliloli atêndîke ikyakutikapo ukufuma pa umwe bâkalumbu. Umwêne itolo ikubômba ikyo itolo uku. . . nongwa yakuti umwêne amênje iki umwêne abagîle ukubômba. Umwêne abagîle ukusyôba unkîkûlu kaelifu nakalîngâpo ukukînda unnyâmbâla. Une mmenye ikyêne kikufulasya ubwîpîlike bwîne, lôli ikyo kyo Bwânâlîli. Ikyo kyo katikati. Ikyo kyo iki umwene aabombile mu ngunda gwa Edeni. Umwêne abagîle ukutêndêka. . . Lilino, umwêne âli gwanaloli-ndumbula, umwêne âli gwâkwîyûla, lôli umwêne âsyôbîgwe. “Adamu akâsyôbîgwe mma,” i Bângéli lyâyobîle. Umwêne akâsyôbîgwe mma, lôli umwêne unkîkûlu âsyôbîgwe. Popâpo umwêne abagîle ukunusyôba umwêne unkîkûlu. Kangî pôpe abatimi bisakubûka itolo kulakula panja nukubîkamo abalûmbilili bakîkulu, ukubabîka abêne panja pamwanya pa filündilo bo ulo, kangî i Bângéli ili likukânîsya ikyêne ukufuma ku Bwândilo ukubûka ku Busetuli. Ugwe kuyoba, “Mulimosa, ikyene kyôsa

kili kanunu. Ikyene kyosa kili kanunu. Abene bali... Abene babagile ukulumbilila itolo lulalula bo ulo.” Une mmenye ikyo kyo kotalusya.

¹³⁶ Ngati yumo ālyāndīle ukuyoba mi ndimi akabalilo kamo, une ndinkukīndilīla ukulūmbilīla kangī akabalilo kāko une nālisile pānja... .

Unkīkūlu āyobīle ku mwanundumiana gwāngu, alinkuti, “Une ndinayo indumi iyakuti m’mbē kilabo nkilo,” alinkuti, “akabalilo kāko ugūso ikwīsa pa kigemo.”

Alinkuti, “Ena, Nka., ngimba ugwe kusanusya fiki?”

¹³⁷ Kangī ikilo kila akabalilo kāko ikyēne kyafikile ukwītēndekēsya, akabalilo kāko une nālītēndekīsye ukutēndēka ukukōlēla kwa pakigemo, umwēne alinkutendekesya inywīli syāke mōsa nukukwābīla mmwanya amastokeni gāke na filifyōsa, alinkwitendekēsya, alinkunyēla pala pakati pa kipālo nukwanda ukunyelanyela, alinkuyoba mu ndimi nukusolola. Une ndinkukīndilīla ukulūmbilīla, ukutēndeka ukukōlēla kwāngu kwa pakigemo. Akabalilo kāko une ngakigīndikemo ikyēne napanandi, ikyēne kikāli kitalusye. Popapo lelo, ena, i Bāngēli liyobīle komma ukuti, lyāyobīle, “U—u Mbepo gwa basololi go gwākwlāmbika ku nsololi yula.” Kyala ali pa... Kyala ikuyoba ku kigemo, ndeke Umwene ayobe. Pauli āyobīle, “Linga ikīndukimo kisetuligwe kwa yumo, unko umwe umwēne ikolege mulutēngāno lwāke mpaka uyungi yula amalīsīsye.” Uko ko kotalusya.

¹³⁸ Lilino, akabalilo kako une nālisile panja, abandu aba balinkuti, ikibugutula ikinywāmu kya bandu, balinkuti, “Ugwe unsulumanisye Mbepo Mwikemo ikilo iki.”

Une ndinkuti, “Ngimba kiliku iki? Une āngali ngubombaga fiki?”

¹³⁹ Balinkuti, “Mulimosa, akabalilo kāko u kalūmbu yula āpēle i ndumi yila, haleluya,” balinkuti, “kila.”

“Fiki,” une njobile, “Une nalumbililaga. Umwene yo āsōkilēpo pa lubātīko.”

¹⁴⁰ “O,” balinkuti, “kila kyāli kipya itolo ukufuma pa Kikota. Kila kyo kipya ukukīndāpo iki ugwe gwālumbililāga.” Uu!

¹⁴¹ Lilino, ikyo itolo kikunāngīsya i... ikyo kikunāngīsya pamo iki, kangī une nguyoba ikyēne ku lugīndīko lwīnu, pamo ubusyutano, pamo ukusitalugīndīko, pamo ulumanyīsyo ulusitabumanyi aba bakamanya ikyakukīndapo nakimo ukufwana na Kyāla ukukīnda u kalulu amenye isya filatofyāmatalāla. Lilino, ikyo, une ndikuyoba ikyo ukuya u—u buyobelo bwabutoyofu, panongwa yakuti ubu bukaya buyo nabumo ukupulīsunga. Lōli ikyo kyo—ikyo kyo katikati bwānalōli. U mūndu uyu ābagīle ukumanya ukuti Kyāla akaya yo mwāti gwa bufuluganikano mma. Umwe yo gwa

lutēngano. Ili Bāngéli abēne bakamanya. Fyōsa ifi abēne bāmēnye akabōmbelo kyo kunyelanyela, ukuyoba mu ndimi, nukuyoba, “Une ndinagwe Mbepo Mwikemo. Haleluya!”

¹⁴² Une nimile nukukēta, mu Africa, ungānga ugwabulosi ni findu ikuyoba, pankyēni pa maelifu mahano aga bēne pa kabalilo kamokēne; ikunyelanyela, ililopa pōsa pa fisyo fyābo, bikuyoba mu ndimi, nukunwa ililopa ukufuma mu mpaya gwa mūndu; ukukōléla pa mōhési, nukuyoba mu ndimi.

¹⁴³ Kangi pōpe ukuyoba mu ndimi yo kikūngilwa kya Kyāla, lōli ikyo kikaya busisimikisye busitakutoligwa bwa Mbepo Mwikemo. Unko une mbabūle umwe kila lilino. Une nalōli ngwītika ukuti bōsa abikēmo abapakigwe bikuyoba mu ndimi. Une ngwītika u nnyāmbala utubalilo tumo akabalilo kāko ugwe kufika ukupakigwa fiyo na Kyāla mpaka ugwe kuyoba ni ndimi. Une ngwitika ikyo. Loli une ndikwitika iki mma ukuti ikyo kyo kimanyilo kilikyosa ugwe guli na Mbepo Mwikemo. Ena, nkulumba. Une ngusubila utubalilo tulipo akabalilo kāko ugwe uli nu lwītiko, umundu, ugwe gwabagile ukwēnda palapala pānja nukubika amaboko pa mwānike unnini uyu ali na kānsa, akabalilo kāko abālūmbilili malongo mahano batalile bākīputile akēne kangi akēne kābagile ukubūbuluka panongwa yakuti u māma yula ali nu lwītiko kuli umwānike yula. Kyāla akapēle akēne ku mwēne, umwēne yo kiyabo gwa Mbili gwa Kristi. Ena, nkulumba. Une ngwītika ikyo. Une nkibwēne ikyo kikubōmbigwa kangi une mmenye ikyo kyo kwabwanalōli. Lōli iki ikyēne kili, kyo bika ikipānga ndubātiko, bika ndubātiko ukuti uswe tubagile ukubōmba.

¹⁴⁴ Lilino unko uswe tumalīsyē ilisyāle lya linandi ili apa bo tukāli uswe ukubūka.

...ukufuma ukuti umwe mwāmbilile, umwe mwafungiligwe na Mbepo mwikēmo gwa lufingo.

¹⁴⁵ “Fūngilo!” Ngimba i Fūngilo kyo fiki? Ngimba i Fūngilo kyo fiki? Ikifūngilo kyo, ikindu ikyākwanāda ikyēne kikunāngisya yo mbombo iyi yimalīsige, imbombo imalīsige. Ikindu ikyakukōnda ikyēne kikunāngisya bo bwenenakyo. Kangi ikindu ikikōnge ikyēne kikunāngisya ko kuponesigwa, ukukyūnga ikyēne.

¹⁴⁶ Tuyobe, ukwegelela, une nālisibile ukubombela ku Pennsylvania Railroad, une nābōmbāga na tata gwāngu pa nsebwe gwa sitima. Uswe twasōndāga amagali. Kangi uswe twabikāga nkati pāsi apa ku kampani yalusōndo iyi, uswe twābikāga nkati mfitini, kangi twābikāga gamo pamwanya *apa* kangi gamo pāsi *apa*, kangi gamo mmwanya injila *iyi*. Bo iligali lila bo likāli nukufungiligwamu siku, unkētēsi ikwisa ukukinda pala, kangi umwēne āgūtāga pa lyēne, ukusōpa pa limo *ili*, āyūgénie limo *lila*. “Aa! Tāga ilyēne! Agēne gisakubōngotōka

mu tupatu bo agēne gakafika kula. Tāga icyēne! Sosyāpo agēne. Andisya ukufuma kubwāndilo.” Unkētési ātāgāga iligāli.

¹⁴⁷ U Mbepo Mwikemo yo Nkētési. Umwēne ikukuyugānia ugwe panandi, kangi ugwe kuywēga bo ngwāya. “Ngimba ugwe kwitika i Lisyu lyōsa ilya Kyāla?”

“Une ndinkwītika ifindu fyaiyolo fila fya Ngamu ya Yeso.”

“Tāga icyēne. Ugwe gwe ngwāya.”

“Une ndikwītika mu bubumbulusyo Bwamwankyāla pamo ni findu bo ifyo.”

“Pōpe ngwāya. Basōsyāmo abēne pānja.”

“Ngimba umwe mukwitika Yeso Kristi, yo yuyo mmayolo . . .?”

“Eee, mu njila yimo.”

“Ugwe kungwāya. Kisōsyāpo icyēne panja, muketile, icyēne kikāli kikaya kyakwītendekésya mma.” Ēna, nkulumba.

¹⁴⁸ Nkundwe, akabalilo kako icyene kitendekisye ukuyoba, “Ameni!”

“Ngimba umwe gwambilile Mbepo Mwikemo?”

“Ameni!”

“Ngimba kilikyōsa kimalisígwe?”

“Ameni.” Polelo ngimba u Nkētési ikubōmba fiki? Kilikyōsa kipanganisígwe nkati kanunu kangi kikāmandéne, kīswīle ni Nongwainunu. O, i Lisyu lya Kyāla lililyōsa lili kanunu. Kilikyōsa kili kipelelesye. “Une ngwitika i Lisyu lililyōsa. Ameni! Ameni! Ameni!”

“Ngimba ugwe kwitika ukuti Kyāla akāli ikubūmbulusya?”

“Ameni.”

“Ngimba ugwe kwitika Yeso, yulayula mmayolo na bwilanabwila?”

“Ameni.”

“Ngimba ugwe kwitika u Mbepo Mwikemo yo itolo bo gwanaloliloli bo mumo Umwēne āyilélémo siku?”

“Ameni.”

“Ngimba ugwe kwītika u Mbepo yulayula āgwīle pa Pauli, ikugwa pa uswe?”

“Ameni.”

“Ngimba ugwe kwītika Umwēne ikubōmba ifindu filafila pa uswe, Umwēne ābōmbile pa bēne?”

“Ameni.” O, o, umwēne ikukāmandana lilino. Um-hum, ikuya nkāmandāne lilino, uswe twītēndekísya ukwīgála ikifigo. Umma ndaga.

149 Polelo u nkētési ikwígála ikifigo. Ngimba umwēne ikubōmba fiki? Umwēne ikubikapo ifūngilo pa kyēne. Polelo umwēne ikufika pāsi apa nukwēga mmaboko fila ifipinyilo fya playala ifya kīndu, ikufika ukukilania kula pa kindu ikinini iki nukufūnga kila. Ugwe kinunupo ulingābulāga ikyēne. Linga fila, ilīgāli, ubufikilo bwāke yo Boston, ikyēne kikabagila ukwīguligwa. Ubwēne bukuyaga busobi bufūdīgwe ukwīgula ifūngilo yila mpaka ikyēne kikufika ku Boston. Kangi u nnyāmbala yu ali nu bulagili abāgile ukwīgula ifūngilo yila, kangi umwēne popāpo. Uko ko kotalusya. Ikyēne kiyile kya *yakuti-yakuti* kampani ya nsebwe-gwa-sitima. Iyēne yo fūngilo yābo. Ikyēne kyo busisimikisyo bwābo ukuti ilīgāli ili lipanganisigwe, ilīgāli ili litēdekisye. Ilyēne lyābo abēne. Abēne bakābagile ukubika i “B&O” pamwanya pa “Pennsylvania.” Ugwe kufimbilisigwa ukuya mfūngigwe, kangi akabalilo kāko ikyēne kifūngigwe.

150 Kangi akabalilo kāko u Nkristi apanganisigwe ni Nongwainunu, ĩsusigwe nu bununu bwa Kyāla, ifindu fyōsa ifya Kyāla fitūgésye mu mwēne, ni ndumbula inyígúke, itēdekisye ukubōmba, ĩganile ukubikigwa pamwēnepamwēne mbuyo, ukubōmba kalikōsa aka Mbepo Mwikemo ikumbula umwēne ukubōmba, akilēnie ukufuma ku bufwe ukubūka ku Būmi, akemesigwe ukufuma ku findu fyōsa ifya nkīsu, ikwēnda mu Lumuli bo u Lumuli lukwīsa ku mwēne, ikubūka nkyēne, umwēne itēdekisye. Polelo Kyāla ikwígála ikifigo ikya kīsu kunyuma kwa mwēne, kangi ikukukoma ikyēne palikimo bo lula, nukufūnga umwēne nu Mbepo Mwikemo gwa lufingo. Haleluya! Butali buleble? Mpaka ku bufikilo. Komma ukumbika umwēne panja pala pa nsebwe gwa sitima nukwānda ukwīgula ikyēne nukukēta linga kilikyōsa kili kanunu kangi mma. Ikyēne kili kanunu mōsa, itolo kileka ikyēne pakyēne. U Nkētési abōmbile akikētesisye ikyēne. Ngimba ugwe ufūngigwe mpaka ndili? Mpaka ilisiku lya butabuligwe. Bo butali bulabule ugwe ufūngigwe.

151 “Ena, akabalilo kako ugwe kufwa, polelo, Nkundwe Branham, bule linga ugwe kufuma pāpo ugwe kufwa, ugwe kuti ugwe ukaali uli nakyo Ikyene?” Ugwe uli nakyo Ikyēne kwabwilababwila. Ngimba ku kūgu kūko u Būmi bukwāndila? Ku kigemo. Palapala pala ugwe kukēta akayabo akanini aka nsyūngulu. Ugo go nsyūngulu, i Fūngilo ya Mbepo Mwikemo. Poleli ugwēne go nsyūngulu gwa misyūngulu gya misyūngulu, bo mūmo une nāyobīle ilisiku ilīngi. Lōli akabalilo kāko ugwe kufwa, ugwe kūmilisya ukīndamo imisyūngulu gila mpaka ugwe kwīsa ku bubūndāle, ukufuma ku bubūndāle ukubuka ku kanyībūko akanini akatōnye, ukufuma ku kanyībūko akanini ukubūka ku kasōko, ukufuma ku kasōko ukubūka ku kisōko, ukufuma ki kisōko ukubūka ku nyānja, muketile, iya lugano lwa Kyāla. Ugwe gwe itolo mūndu yulayula.

152 Kēta kuno. Ugwaiyolo Sauli, ungomokelakunyuma ugwaiyolo, umwēne alinkutōlígwa ukwisa kwa Kyāla, na pāpo umwēne akāli ntāyígwe mma. Umwene naloliloli akāli mma. Umwene aali nsololi, loli kukuti itolo umwene ali panja pa Kyāla. Iyo yo nongwa, bakūndwe, une ndinkuti, “Ugwe ukaya ntāgígwe mma.” Popāpo polelo kumbukilāga, umwēne itolo asōkile pānja pa bwígāne bwa Kyāla, popāpo polelo ikindu kyākwānda umwe mumenye, umwēne—imwēne alinkusita kwitikisya. Lilino, lumo une ngābagile ukuyoba ikyo. Umma ndaga, une ne itolo ngubūka nkyēni panongwa ya kilūdilo ikihobofu ikilo iki. Popāpo polelo, umwe mumenye, kangi ikindu ikyākwānda, o, mwe, kokuti i . . .Umwene ābūkile ku—ku Yurimu Tumimu.

153 Umwe mumenye iki Yurimu na Tumimu kyāli, ikyēne kyāli sahani ya pakipāmbāga, i efodi iyi—iyi Aroni āfwālāga. Kangi ikyēne kyāli akabalilo kōsa, Kyāla akabalilo kōsa āli yo Kyāla unkindakipeligwa ikwāmula mu njila ingindakipeligwa. Kangi akabalilo kāko u nsololi āsolwile, kangi sila imuli isyambutitu sikālisile ukukilania kila Yurimu Tumimu, umwēne āli nsōbi. Akabalilo kāko ungowanjosi āyobīle injosi kangi ikyēne kikāmulike pamwanya pa Yurimu Tumimu yula, une ndinkupāsya nubununu buki iyēne yāpilikigwāga, iyēne yāli nsōbi. Uko ko kotalusya.

154 Kangi une ndinkupāsya itolo katikati go ma digri malinga aga dokotala ugwe uli nago kangi ikipanganio kyāko kinywamu bulebule, akabalilo kāko ugwe kusolola pamo kulūmbilīla, ikyēne kikaya kyakufwāna ni Lisyu ili, ugwe gwe nsōbi, nkūndwe. Ugwe gwe . . .Uyu yo Yurimu Tumimu gwa Kyāla. Abalilo kāko ugwe kuyoba ugwe ukamanyilígwe ngāni bo lukālígwa u lwālo lwa kisu, umwēne atisakumulika, panongwa yakuti i Bāngēli lyāyobīle ugwe gwāli. Akabalilo kāko ugwe kuyoba ukuti ugwe ubagile ukōsigwa mu ngamu ya “Tāta, Mwanundumian, Mbepo Mwikémo,” ikyēne kitisakumulika, panongwa nayumo mwī Bāngēle ālyōsigwémo siki mu njila yila. Mwēne mu Ngamu ya Ntwa Yeso. Ikyēne kitisakumulika, popāpo kilipo ikindukimo kisobile pa buyobumo.

155 Popāpo Yurimu Tumimu akābagile ukwāmūla Sauli ugwaiyolo, kangī umwēne alinkutoligwa nukuya ni njosi. Umwēne ābūkile ku butali fīyo mpaka umwēne ātoligwāga nukuya ni njosi yimoyēne. Popāpo umwe mumenye iki umwēne ābōmbīle? Umwēne ābūkile kula ku ndōsi, kangī u ndōsi gwaiyolo uyu, u ngānga ugwaiyolo ugwamōhēsi ukusuluka kula, ungānga undōsi. Kangi umwene alinkuti, “Ngimba ugwe ubagile ukulagula?”

156 Umwēne alinkuti, “Ena, lōli Sauli āyobīle umwēne ikugogaga aligwesa ikulagusya.”

157 Umwēne alinkuti, “Une nisakukuponesya ugwe,” afwēle bo

mundu mwendapāsi. Umwēne alinkuti, “Ndagusila kuli une kangi ndwālila kuno ukufuma ku kisu kya bafwe aba bakīndīfīle ukufuma kuno.” Lilino pilikisya iki. “Ndwālila une u mbepo gwa Samueli unsololi.”

¹⁵⁸ Kangi umwēne alinkwīngīla mula uku—uku lagūla. Kangi, bo umwēne abōmbīle, umwēne alinkugwa pa kisyo kyāke, umwēne alinkuti, “Une ngukēta abakyāla bikwīsa kuno.” Muketile, umwene āli mwiputafifwani, “bakyala,” babili pamo batatu ba abene, bo ba Tata, Mwanundumiana, Mbepo Mwikemo, pamo ikindukimo bo ikyo, ugwe umenye. Umwene alinkuti—umwene alinkuti, “Une nguketa abakyala bikwisa mmwanya.”

¹⁵⁹ Alinkuti, “Ndīngānie umwēne. Umwēne ikuboneka bulebule? Umwēne ikuboneka ngati fiki?”

¹⁶⁰ Alinkuti, “Umwēne yo nsekele kangi umwēne ali ni kikingo ukukilania pa fibega fyāke.” Umwēne akālyāndwīkemo na panini.

¹⁶¹ Umwēne alinkuti, “Ikyēne yo Samueli. Ntwāla umwēne nkyūmba iki, ntwāla umwēne pankyēni pa une.”

¹⁶² Kangi kētésya akabalilo kāko Samueli ikwīsa pankyēni pa Sauli, umwēne alinkuti, “Nongwa ya fiki ugwe ungōlīle une, namanga ugwe gwīsīle ukuya ndugu gwa Kyāla?” Kangi kētésya. Fikuti umwēne ākāli āli Samueli mwēne mma, umwēne ākāli ālyumilīsyē i mbepo ya busololi. Yoba ikyēne kisōbi, unko yumo ayobe ikyēne kyo kisobi. Ikyēne kyo Bwanalōli! Umwēne ākāli āli nsololi. Kabuno umwēne alinkuti, umwēne alinkusolola nukuti, “Ubwīte bukubūka ululwana na ugwe kilabo, kangī ugwe na bāna bāko mwisakugwa mbwīte, kangī pa kabalilo aka kilabo nkilo ugwe kwisakuyaga na une.” Ngimba isyo ndalusye? Umwene ākāli āli nsololi!

Lilino ugwe kuyoba, “O, loli uyo āli yo ndōsi ābōmbīle ikyo.”

¹⁶³ Umma ndaga, une ngukubūlāga ugwe Yumo uyu akāli ndōsi. Yeso ālyēgīle Peteri, Yākóbo, na Yohani, kangī ābūkīle pamwanya ku Kyāmba Lwanduko akabalilo kamo, kangī ālimīle pala pamwanya pa kyāmba. Kangi, Yeso, Kyāla afwīkāga u Mwanundumiana Gwāke; ngati mūmo ngugela iki. . . nāli nakyo ikilo ikingi, ukufwīka u mwanundumiana. Kangi akabalilo kāko abēne bābōmbīle, abēne balinkukelēngānia nukusyāgānia ukuti pala ālimīle Mōse na Eliya. Abēne bāyobāga, ukuyobesānia. Komma utundēmbēla utwēlu utunīni tukwēlēla ukusyūngutīla, pamo utubīngu utwēlu utunini, tutigi, tukwēlēla ukusyūngutīla. Lōli abēne bāli banyāmbāla, bikuyoba. Mōse āsyīlīgwe mu lipūmba ilisitakusīmbīgwa ku fyīnja bamia lwēle. Kangi Eliya ābūkīle ku Kāya mu gilēta, ifyīnja bamia bahano. Kangi apa bosa-babili bālīpo, bakāli itolo nukuya būmi mūmo abēne bālīmo siku būmi, bimile pala bikuyoba ku Mwēne bo Umwēne

akáli ukubūka ku Kalvari. Haleluya! “Fungigwe mpaka ilisiku lya butabulo bwitu!”

¹⁶⁴ Une nguyaga mwēngo, kangi polelo uswe twisakwīgalága ’nongwa yakuti ukwēne kwīlile, kangi une ngwīputilaga ababine, kifuki amaminiti mahano aga kongeleláo. Ilinandi lya 14, bala, unko une mbale ilya 13 kangi, lyága ilyēne, ulwālo.

Mwa yūyo umwe. . . mwāsūbile, ukufuma pāpo umwe mwāpilike ilisyu lya u bwānalóli, inongwainunu ya bupoki bwīnu. . .

¹⁶⁵ Lilino kumbukilaga, ngimba bupoki buki abēne bali nabo? Aba bāli—aba bāli Bakristi ba Efesi. Abēne, lilino kēta, ngimba umwe mwāketesísye a Bakorinti? Umwe akabalilo kōsa āfimbilisigwága ukubabūla abēne, “Akabalilo kāko une ngwīsa pakati pa umwe, yumo ali nu lulimi, yumo ali nu lulimi, yumo ali nu lwīmbo, yumo ali nu busololi, yumo ali. . .” Muketile, umwēne alinkutoligwa ukubamayisya abēne nakimo, ’nongwa yakuti abēne akabalilo kōsa bānyonywága *iki, kila* pamo *ikingi*. Abāndu aba bāli ni kīndu kilakila, lōli abēne bāli nakyo ikyēne ndubātiko. Umwēne akāmanyisyémo siku a Bakorinti nakimo bo iki, umwēne akābagīle, ikipānga kikāli ndubātiko ukukimanyísya ikyēne. Lilino, umwēne ābagīle ukubamanyisya abāndu aba ifīndu ifyanalóli.

. . . iki, ubupoki bwīnu: mwa yūyo yōpe ukufuma. . . umwe mwālītike, umwe mwāfungilígwe nu Mbepo mwīkémó gwa lufīngo,

Iki kyo kikoleléla-ngāni. . . (O, unko une ndingakīsāniaga ikyo.) . . . ikikoleléla-ngāni kya kilīngo mpaka. . . butabulo bwa bukabi ubuhōmbigwe, ku lutūfyo lwa lwīmiko lwāke.

Whuu!

¹⁶⁶ Ngimba u Mbepo Mwīkémó yo fiki? Lilino, polelo une ngubalaga ili lisyēle ilya ilyēne nubwēngo linga umwe mukwikasyága na une panandi. Ngimba uswe twāli kūgu ikilo ikingi, Nkundwe Mike? Kūko abēne bāli lōsa basangalufu, o, kilikyōsa kyāli kutēngāno, lūla lwāli lugāno ulupelelesye. Lilino, akabalilo kōsa ugwe kwīsa injila *iyi* ugwe kugwa pāsi panini, ukugwa. Ugwe akabalilo kōsa ugwe kutēndéka ilikato, ugwe kwīsa amainchi kifukiko. Akabalilo kāke ikyēne kikufika pāsi pa kīsu, ugwe uli nago u nsyūngúlu gwa nsyūngúlu gwa misyūngúlu. Lilino, ubu bo bwīngi bwa Mbepo Mwīkémó ugwe uli nagwe mwa ugwe. Ulo lo lugāno. Lōli, o, ugwe kūmīlflwa ku kīndu kimo.

¹⁶⁷ O, bābagile mma abāndu abaiyolo, abāndu abaiyolo. . . Mūmo une ngulōndéla ukugomokela nukuya kalongo na fihano kāngi, malongo mabili! O, une mbagīle ukupa kalikōsa. Ngimba kyo kinuku nki ikyēne kikubōmbága lwa une? Une mbagile ukuya kalongo na fihano nukufwa pōpe ikilo iki.

Ukwēne kukaya kususimikisígwe. Bule linga ugwe gwāli kalongo na fihano ikilo iki, ngimba ugwe kumānya bulebule ukuti kali māma āngáli mūmi, nkabalilo aka ugwe kufikága ku kāya, pamo mma? Ngimba ugwe kumanyaga bulebule ugwe kufikága ku kāya? Ngimba ugwe kumanya bulebule ugwe kuyaga mūmi kilabo linga ugwe uli ni fyinja kalongo na fibili mbukūsi, ubukafu ubupelelesye? Ugwe lumo kugogigwága mu kupūlana, ukugwa mfwāno, kalikōsa kabagile ukuboneka kwa ugwe. Kisitakusisimikisígwa, muketile. Kikayapo nakimo apa ikisisimikisye. Lōli ugwe kunyonywa kila. Ikyene kyo fiki? Ikyene kyo mmwanya Kula ukupela ugwe ukunyonywa ikyene.

¹⁶⁸ Lilino, ugwe kwēnda mu Iki, polelo ugwe uli nu Būmi Bwasyēpwa. Lilino ngimba fiki iki ikyēne kikuboneka? Ikyēne kyo “kikoleléla-ngāni.”

¹⁶⁹ Ngimba yo fiki ihela ngoleléla ngāni pa kalikōsa? Linga une ngwīsa kwa ugwe ukūla iligáli, une nguyoba, “Ngimba silinga iligáli lila?”

¹⁷⁰ Ugwe kuyoba, “Iligáli ili, Nkundwe Branham, likukwēgelága ugwe amadola maelifu matatu.”

“Ngimba isyakuhōmbako tāsi syo silinga?”

“Ena, une ngūkwtikisyága ugwe uye nalyo ilyēne pa madōla bamia bahāno.”

¹⁷¹ “Umma ndaga, apa yilipo amadola bamia bahāno. Une nisa—une nisa kutwāla isyāle ya iyēne kwa ugwe ukabalilo kamo, nakalīnga mūmo une mbagile. Ugwe koleléla iligáli.” Une ngukupa amadola bamia bahano, ikyo kyo kyakukoleléla-ngāni. Ngimba uko ko kotalusya?

¹⁷² Lilino, koleléla iyo, iyēne yo “kikoleléla-ngāni,” ukwēne ko “kuhōmbako panini.”

. . . ukufuma pāpo umwe *mwafūngilígwe* nu . . . Mbepo gwa *lufingo*, i . . . Mbepo gwa *lufingo*, . . . ukufuma pāpo umwe *mwafūngilígwe* . . .

Iki kyo . . .

Fiki? Ngimba i Fungilo ya lufingo yo fiki, Mbepo Mwikémo gwa lufingo?

Iki kyo kikoleléla-ngāni kya kilingo mpaka . . . butabulo bwa bukabi ubuhōmbigwe, . . .

¹⁷³ Ngimba ikyēne kyo fiki? Ukwēne ko kuhōmbako panini. Kangi, nkundwe, o, o, o, o, o, balūmbilili! Linga uku ko kuhōmbako panini, ngimba ikyēne kikuyaga fiki akabalilo kāko uswe tukugika kula! Ngimba ukwēne kukwakuyaga fiki? Linga iki kyo . . . Linga iki kyo iki uswe tukwīkyéla lilino, nukuya basangalufu fiyo mpaka . . . une mbabwéne abanyāmbála ifyinja malongo mahano na mana itolo ukwīsa pala . . .

174 Une mbabwēne abalūmbilīli abakāngāle aba basumwīke mmwanya ikilo kimo. Umwēne ikusōka pānja, umwēne alinkuti. . . Bo *iki*, ukusōka ukufuma ku kigemo. Kangi une ndinkuti, “Unnyambala uyu ikuyaga pakulumbilila?”

175 Umwēne alinkuti, “Ena, sayaga u Ntwa.” Unkāngāle umwinitu ugwālāngi, ikijāsi ikikulumba ikinywāmu ikyaiyolo ikitali afwēle.

176 Une ndinkuti, “Ngimba nongwa ya fiki abēne bakabalekāga bala abalūmbilīli abakeke ukulūmbilīla? U nnyāmbāla unkāngāle yula, ngimba umwēne abagile ukulūmbilīla bulebule?”

177 Umwēne, “Mulimōsa,” umwēne alinkuti, “bakūndwe,” umwēne alinkuti, “umwīsyūgu une nāpilikāga abakūndwe bikulūmbilīla ilisiku lyōsa ilitali,” umwēne alinkuti, “isya ifi Yeso ābōmbile pa kīsu. Une nguyaga pakubabūla iki Umwēne ābōmbile mMwanya.” Umwene alinkuti, “Une ngwegaga ilisimbo ikilo iki ukufuma kwa Yobu 7:27,” alinkuti, “akabalilo kāko ikyēne kyāli kubutali kunyuma kula bo lukāli ulwālo lwa kīsu,” alinkuti, “akabalilo kāko Umwēne āyobīle indondwa syakulubunju syālīmībile palikimo kangi abanabalumiāna ba Kyāla balinkuywēga mbusangulufu.” Ukwānda bo ulo. Alinkuti, “Umwe mumenye iki, kalipo kābūkile akandukamo aka kabōmbigwāga kunyuma kula.” Umwene alinkuti, “Umwe mumenye. . .” Kangi umwene alinkwānda ukutwāla nkyēni iki kyābonīke pa buyo mMwanya. Umwēne alinkukitwāla ikyēne pāsī ikipingafula ikilāmbalale mu Kwīsa kwakibili. Kifuki akabalilo kala, Mbepo Mwīkēmo alinkuntika umwēne. Lilino, abene balinkufīmibilisigwa ukundongosya u mwinitu unkāngāle uyu, umwēne āli ni fyinja malongo-mahano-namana-na fihano mbukusi. Umwēne yo itolo ali bo *iki*, inēme mōsa, kangi itolo akakolofwa akanini aka nywīli, umwe mumenye, bo *ulu*. Alinkufika panja pala kangi umwēne alinkwānda ukulūmbilīla, alinkuti, “Whuupi! Haleluya! Lwīmīko!” Alinkwānda ukunyelanyela bo lula. Alinkuti, “O, umwe mukaya ni fwāsi iyakufwāna apa ukuti un ndumbililēpo.” Kangi alinkwāndako, pāsī pa kipālo bo lula, nubukafu mūmo umwēne ābagile ukubūka. Kangi ikyo kyo itolo kikolelēlangāni. O!

178 Ngimba u Mbepo Mwīkēmo ikubōmba fiki? O, apa bulipo ubuyo ubununu, unko une mbāle ilinandi lya 1 ilya ntu unkōnge. Ngimba une mbagile ukubomba ikyo? Ngimba ikyēne kili kanunu? Yoba, “Ameni.” [Ikilundilo kikuyoba, “Ameni!”—Nsimbī] Umma ndaga, ilinandi lya 1 ilya ntu gwa 2 nakalinga. Pilikisya:

Umwe, mwe mwāli. . . umwe. . . Kangi umwe mwe umwēne anyenyemwīsye, mwe mwāli yumo. . . mwāli bafwe mu ngilanio ni mbībi:

179 “Umwe Umwēne abasūmwīsyē.” Ngimba *abasūmwīsyē* kokuti fiki? “Atēndike ukuya būmi.” Itolo kifuki kimalike, lōli Umwēne āsūmwīsyē ugwe itolo ni hela ingolelēla-ngāni. Ngimba ikyēne kisakuyaga bulebule akabalilo kāko ugwe—akabalilo kāko ugwe naloliloli kukaba fyosa ifiyabo fihōmbigwepo? O! Kisita kuswīga Pauli, anyakilīgwe mu mmwanya mwabutatu, alinkuti, “Ikisige kikakēta; imbulukutu yikapilika; pamo fikuti ikyēne kikīngīla nkati, ukwīngīla indumbula ya mūndu, ifi Kyāla alī nafyo kuli abēne (mbukyūngilo) aba bānganīle Umwēne.” Ngimba ikyēne kisakuyaga fiki! Ugwe kuyoba isya busangulufu ubusitakuyobigwa kangī ukwisula nu lwīmīko! Whuu! Uhm! Umwe mwe akabalilo kamo mwāli bafwe mu mbībi ni ngilanio Umwēne asūmwīsyā palikimo ukwisila mu nsyūngūlu gwa nsyūngūlu gwa misyūngūlu. Ngimba ukwēne kwisakuyaga fiki akabalilo kāko ugwe kwīsa ku nsyūngūlu gwa misyūngūlu ukwingila mu nsyūngūlu, u nsyūngūle polelo mu kasōko, a kasōko nkisōko, i kisōko mu nyānja?

180 Kangi ngimba ikyēne kyo fiki akabalilo kāko ugwe uli pa njila panja pala mu butabulo, nu mbili umpya lōsa, ugwe gwāndwīke ukugomokela ku nnyāmbala untubwa mōsa kāngi, pamo unkīkulu untubwa, ugwe utisakufwāmo siku kangī mma? Kangi ugwe kukēta pa kīsu, nukwīnogona, “Une nābagīle ukwīkyēla imipesa gimo kangī na mīsī amatalalifu gamo, lōli, umwe mumenye, une ngakifūmbwa ikyēne kuno. Lōli ilisiku limo Yeso ikwīsa, kangī ugu umbili gwabāndūmi, ugu umbili gwabunyakyāla ugu une ngwītugasyāmo...” Gutisakwīsila mūnda mwa nkīkūlu kangī mma, ugwe gutisakwīsila nkinyonywo kya kugonana kangī mma; lōli panongwa yakuti Umwēne apāpīgwe kisita kinyonywo kya kugonana, une nisakusyūsigwāga kisita ugwēne, kangī Umwēne isakuyoba ilisiku limo kangī abafwe mwa Kristi bisakusyūka, kangī umbili gula ugu une akabalilo kamo nālītūgesyēmo gwisakusyūka ukuya mbili gwālwīmīko, kangī une nisakwēnda kangī une nisakuyoba, kangī une nisakwītūgāsyā kangī une nisakwīkyēla (haleluya), une nisakwītūgāsyā ukukīnda mu ngulilo Syasyēpwa isi sikwīsa, ukwisila mwa Yeso Kristi u Ntwa gwītū. Whuu! Mwakēta lelo umwe, nkundwe, iyo yo Nongwainunu!

181 “Panongwa ya iki une nīne,” Pauli yo itolo ukutubūla lilino iki umwēne ali. Une nisakubalāga ikisyāle kya iki kangī polelo uswe tukwīputilāga ababine. “Mpaka ifyabukabi, iki kyo kuhōmbako-ngāni mpaka ifyakukaba, ku ndufyo sya lwīmīko Lwāke.”

Yōnōngwa une nīne, ukufuma pāpo une nāpilīke isya lwītīko lwīnu (Une nāpilīke ukuti umwe mukwītīka ifīndu ifi, une nāpilīke ukuti umwe naloliloli mwālītīke mu kumanyila-ngāni, Būmi Bwasyēpwa, kangī ubupoki, na fyosa bo ifyo) *mwa Ntwa Yeso, nu lugano*

kwa mwēsa . . . abikémo,

Ndikulekelesya mma ukugwa ulupi kwa umwe, ukutēndéka ukuyobelapo isya umwe mu nyīpúto syāngu;

Ukuti u Kyala ugwa Ntwa Yeso Kristi, Tāta gwa lwīmiko, abagile ukupa kwa umwe u mbepo gwa mahala nu busetuli . . . ubumanyi bwa umwēne: Itolo ikūmilīsiya ukwisetula Mwēne kwa ugwe akabalilo kōsa, ukukula ukufuma ku lipyāna ukubūka ku lipyāna, ukufuma ku maka ukubūka ku maka, ulwīmiko ukubūka ku lwīmiko. Komma ukugwīla kunyuma; kangi, lōli ukufuma ku lwīmiko ukubūka ku lwīmiko, ukūmilisiya ukwēndela nkyēni. Une ngūmilisiyāga ukubīpūtīla umwe.

I kisige—i fisige fya kupilikisiya . . .

¹⁸² Hum! Umwe mumenye, mwi Bāngēli lyāyobīle ukuti ugwe gwāli mfwamaso kangi ukamēnye ikyēne. Lōli apa Pauli āyobīle, “Une ngwīpūtāga ukuti ifisige fyīnu fya kupilikisiya . . .” Ugwe kupilikisiya ni ndumbula yāko. Ikyo kyo iki umwēne ikuyobelapo. Ugwe kuketa ni kisige kyāko, loli ugwe kuketesya ni numbula yako. Ugwe umenye ikyo. Umma ndaga. “Uyo yo Kyāla gwa Lwīmiko . . .” Unko uswe tukēte, ilinandi lya 18.

Ifisige fwa kupilikisiya kwīnu ukuya fimulikigwe; ukuti umwe mubagile ukumanya iki kyo lusūbīlo lwa kukōleligwa, kangi iki kyo bukabi bwa . . . lwīmiko lwa kilingo kyāke mu bīkēmo,

Kangi iki kyo bukulumba ubukīnde ubwa maka gāke kuli ulubafu lwītu . . . (whuu! Abēne bikuti amaka gakīndīle? Amaka gakāli gakafika nukufika mma tāsi) . . . aba bikwītīka, ukufwana nu bubōmbelo bwa maka gāke amakulumba, (Umwe mwe mwītīke ku bubōmbélo bwa maka Gāke amakulumba, Une ngusuma itolo ukuti Kyala isakonenelaga itolo amaka Gake pa ugwe. Muketile?)

Iki umwēne ābōmbīle mwa Kristi, akabalilo kāko umwēne ālīnsyūsīsyē umwēne ukufuma—umwēne ukufuma ku bafwe, kangi ukuntūgasya umwēne ku kiboko kyāke ikitalusye mu . . . mabuyo gwammwanya,

Pabutali pamwanya . . . ubukulumba, . . . amaka, . . . maka, . . . ubulagili, kangi ukuti ingamu yilīyosa iyī yīpēgīgūwīngamu, . . .

¹⁸³ O, o, o! Gwibwe- . . . Umma, une kinunuko ndingaboomba umma. Uswe twaabagile naloliloli ukweega ikilo kyosa pa ikyo.

. . . ingamu yilīyosa iyī yīkoooleligwe, komma kweene ku kiisu iki, loli kila mu kiisu iki kikwīsa:

¹⁸⁴ Ngimba kokuti fiki yiliyosa—ngimba ingamu yiliyosa kokuti fiki? Ingamu yiliyosa ya mundu aligwesa isakupapaga Ngamu ya fiki? [Ikilundilo kikuyoba, “Yeso.”—Nsimbi] Ku Mwanya koosa kiningamu Yeso. Kyosa i Kipanga kiningamu ya Yeso. Kilikyosa kin’ingamu ya Yeso, kabuno iyene yo yeene i Ngamu iyi Kyaala aalimo nayo siku. Umweene ikukoleligwa Yehova: Yehova-yire, i Likemo ilipiigwe nu Ntwa; Yehova-rafa, u Ntwa uyu ikukubuumbulusya ugwe; Yehova, u Ntwa yo ndembela, Manase; kangi Yehova, aba Yehova abakiindane. Umweene ikukoleligwa Lutondwa Lwakulubuunju. Umweene yo Tata, Umweene yo Mwanundumiana, Umweene yo Mbepo Mwikemo. Umweene yo Alfa, Umweene yo Omega. Umweene yo Bwaandilo, Umweene yo Bumalikisyo. Umweene ikukoleligwa Lusamba. O, Umweene ikukoleligwa. . . Umweene yo itolo ikukoleligwa uluko loosa lwa mapalo, loli Umweene aali ni Ngamu yimoyene.

¹⁸⁵ Ikyo kyo iki Mwikemo Matai aayobela ngapo, akabalilo kaako Umweene aayobile, “Buuka umwe lelo kangi kamanyisye ifikolo fyosa, ukubosya abeene mu Ngamu,” komma mu ngamunyingi, “mu Ngamu yimoyene ya Tata, Mwanundumiana, kangi Mbepo Mwikemo.” Tata yikaya ngamu, Mwanundumiana yikaya ngamu, Mbepo Mwikemo yikaya ngamu. Agene go mapalo ku Ngamu. Iyeene yo Ngamu ya fyakubagilila ifi fyake Kyala. Ngimba i Ngamu Yake yo fiki? U Gwandumi aayobile, “Ugwe kunkoolelaga i Ngamu Yake. . .” [Ikilundilo kikuyoba, “Yeso.”—Nsimbi] “kabuno Umwene isakupokaga abandu Bake ukufuma ku butulwanongwa bwabo.” Iyo yo nongwa abeene boosa boosyaga mu njila yila mwi Bangeli. Iyo yo njila iyi Mwikemo Augustine alimmosisye u Mwalafyaale gwa England, ukufwana—ukufwana ifyinja mia yumo na malongo mahano, bamia babili ukufuma ku bufwe bwa Kristi, mu Ngamu ya Yeso Kristi. Umma ndaga.

*Kubutali pamwanya . . . ubukulumba, . . . amaka, . . .
maka, . . . ubulagili, ukuti—ukuti ingamu yiliyosa iyi
yikoleligwemo, komma mweene mu kisu iki, loli mope
mu kila iki kikwiisa:*

*Kangi naloli abiikile ifindu fyosa pasi pa njayo syaake,
kangi naloli ampeepele umweene ukuya ntu pamwanya pa
findu fyosa ku kipanga,*

Ugu go mbili gwake, . . .

¹⁸⁶ Lilino, linga umbili gwaangu guli na maka pamwanya pa findu fyosa, polelo iki umbili gwaangu guli kyo iki une ndi. Ngimba ikyo kitalusye? Ikyo kyo iki une ndi, ikyo kyo iki ugwe umenye une ukuya. Ngimba ikyo kitalusye? Mulimosa, polelo, fyosa ifi Kyala aali, Umweene aalyoonile mwa Yeso, kabuno Umwene aali yo bwisusye bwa Bwakyala mu mbili. Ngimba ikyo kitalusye? Kangi fyosa ifi Yeso aali, Umweene aalyoonile mu Kipanga, “Ifindu ifi fifyo Une nguboomba, mwisakuboombaga

fyosa ifindu na yuyumwe. Kangi inywamupo ukukinda isi mwisakubombaga umwe, kabuno Une ngubuka kwa Tata.”

Iki kyo mbili gwaake, ubwiisusye bwa umweene ubu bukwisusya fyosa mu fyosa.

¹⁸⁷ O, mumo une nkiganiile ikyo! Mumo une nkiganiile ikyo! Une naabalaga ilisiku limo ubuuku uyu aasiimbiigwe isya bwendo une naabuukile ukuluumbilila—ukuluumbilila mu Africa. Ngabalilemo siku akene pabutasi. Balinga aba babalilemo siku u buuku, *Nsololi Ikuyaatila Africa?* Nkati mula une naakeetaga u ndumiana gwa kiHindi. Balinga bakibweene ikipiicha kila?

¹⁸⁸ Une naapilike u ndumbilili yumo, iiputilaga ababine kifuki ifyinja kalongo na fihano pamo ukongelelapo, umwene alinkuti, “Une ngaakibwenemo siku i kiika kiboombigwemo mbumi bwangu.” Umwene alinkuti, “Une ngetile abandu aba baayobile abeene baali nuntu umbabe, babumbulwiike. Une mbabweene abandu bikuyoba abeene bali na munda mububabe, balinkuya kanunu, na fyosa bo ifyo. Loli i kika, ikindukimo iki kipeliigwe nukupela ikindukimo. . .”

¹⁸⁹ Une ndinkwinogona ukuti undumiana yula alondigwaga ukuti aalimile pala nukukibona kila. Ikilundi kya ndumiana gwa kiHindi kila kyaali itolo kifuki *ulu* ubunywamu ukusyungutula, kimo mwa fyeene. Ikingi kyaali kilindu kinunu ngati kilundi kya baandu. Kangi, linga umwe muketesya, ikyēla kyaake, pala kyalipo ikilato kyaake kifuki mainchi kalongo na mana pamo mainchi kalongo na mahanao ubufyuuke, bo ulu. Umweene aali nu lwaalo lwa kyēla paasi pa ikyeene. Ikilato kyaake kyaalitugesye pamwanya pa mayengo mabili amatali aga gaaliimile. Umweene alinkusegelela kula kuuko une naaliimile, abeene balintweele umweene pamwanya pala. Umweene aali ifyakwigemekesya fibili. Umweene alinkweega ikilato ikinywamu kyakyēla iki kangi alinkukitikila pasi bo lula. Une ndikukeeta ikilundi kyaake, ikyeene kya kifuki *ulo* ubunywamu ukusyungutula.

¹⁹⁰ Lilino, abandu bala bo gwaMuhamadi, baMuhamadi. Ngimba umwe mukukumbukila Pandungu ugu gwaakindaga akabalilo kaako une naabalile kwa umwe iki ifikalatasi fyafiimbilisigwaga ukusiimba? Une ndinakyo ikyeene papapa apa nimweene, ukufuma ku Africa, kitumigwe kw aune nu ntumigwa gwiitu uyu agomwikeko, Nkundwe Stricker. Ako ko kapango muumo Billy Graham agomokiile nyuma pa kyeene. Katikati. Abeene baalitikisye ugwa kiMuhamadi ukubaguta abeene mulamula mu nyanja. Ngimba fiki fitamisye? Abatumigwa bikusookamo mu nguunda. Ngimba yo mbombo nki iya kwituugasya kabalilo katalipo? Abene bo itolo bakomiigwe.

¹⁹¹ Une nunganile Billy Graham, kangu ngwinogona umweene yo nnyambala unnunu gwa Kyala. Loli iki Billy Graham alondigwaga ukuti angali ansitaakile umwene nakyo, ukuti, “Gulila i miniti...” linga bamo mwa aba abibiike-bakafu aba kiBaptisti babagile ukummwitikisya umweene ukubomba ikyeene, une ngwitika umweene angali aboombile ikyeene. Une ngwitika Billy Graham yo nnyambala gwa Kyala. Loli linga umweene abagile ukuyoba, “Gulila i miniti! Une ne mbombi gwa Nongwainunu. Umwe mukwitika mu Lwitikano Ulukulu, kangu umwe mwayobile Yeso akaali nakimo loli nnyambala itolo. Une ngukusasania umwe ku lukanikano.” Une ndikwiitika ukumwega u mohesi ku lukanikano, umma nkulumba, loli une angali nukanikene umweene ukugomokesya, nukuyoba, “Unko ugwe na une twise palikimo. Une ne Dokotala gwa Bunyakyala,” Billy Graham yo Dokotala gwa Bunyakyala, “unko une nganikane na ugwe pa iki, kangu unko une nsisimikisye kwa ugwe ukuti Yeso aali yo Kristi yula. Lilino, akabalilo kaako ikyeene kikwiisa ku bubumbulusyo Bwakyala, une ngaya nafyo ifikuungilwa fila, loli uswe tuli na abakuundwe bamo aba bikubomba. Lilino, linga ugwe kulonda ukubatwala abene panja pala, unko une itolo ngoolele yumo gwa abene, Oral Roberts pamo umunduyumo, umunduyumo uyu ali nu butumigwe ubukulumba uyu abagile naloliloli ukufika kula.” Gwise kulakula, kangu polelo ukukeeta iki kyaabonike pa buyo, nukuyoba, “Ikikristi kikaya iki umwe mukwinogona ikyeene kili.”

¹⁹² Lilino aligwesa ukwipilika asulumanisigwe panongwa yakuti umweene aasookilepo itolo nukundeka umweene. Tukwitikisya, lilino, une ndikwiitika mwakuti u mohesi akupege ugwe ukutaatikana. Une numfunyile amata nkisyo kyaake nine bo ulu, nukusookapo ukufuma ku mweene. Uko ko kutalusya. Loli akabalilo kaako ukweene kukwiisa ku buyo kuuko... Billy angali abagile—aabagile ukumpela u gwaMuhamadi yula ukwipilika ngati ko kalisu kanini bo ulu. Umweene angali egile i Bangeli lila nukweega Yesaya 9:6, nukuyoba, “Ngimba yo Ywaani uyu umweene ayobelaga ngapo, ‘Kwa uswe u Mwana apaapigwe, kwa uswe u Mwanundumiana apegigwe?’ Ali ywaani u Nnyambala uyu? Ali yo ywaani Uyu uyu umweene ayobelaga ngapo? Ali ywani u Nsololi uyu? Ali ywani u Mesiya uyu yuyo isaga? Nnaangisya une kuuko Umweene aalitweele Mweene mwa Muhamadi. ‘Umwene afulasigwe panongwa ya ngilanio syitu, aakuyubuliigwe panongwa ya butulwanongwa bwitu, u lufundo lwa luteengano lwiitu lwaali pa Mweene, ni filabelabe Fyaake ifya fikoti uswe twabuumbulusiigwe.’ Nnangisye ikyeene kwa une mwa Muhamadi. Ngimba Umweene akuutile bulebutu, ‘Kyala Gwangu, Kyala Gwangu, nongwa ya fiku Ugwe undaagile Une? Abeene baatobwiile amaboko Gaake ni njayo Syaake,’ ni fingi bo ifyo? Nnangisya une ukwisila mu lisyu lyiinu, ulwitikano lwinu lweene.” Fiki, umweene angali

antobiisye u gwaMuhamadi yula kibibi fiyo mpaka umweene angali akaameenye kuuko umweene aaliko. Uko ko kotalusya.

¹⁹³ Lōli akabalilo kāko ikalatasi yila yafimbilisigwaga ukusyumbutuka ukusyungutila, ikyo iki kyāfulésye, iki kyāpelile indumbula yāngu ukunýela. Akabalilo kāko iyene yāyobíle pala, “Palema nalinga Billy afimbilisigwa ukugomola kangi aténdíke ukugomola, abagile bulebule ugwaMuhamadi ukuyoba ukuti ikyēne kyāli kisobi,” yāyobíle, “akabalilo kāko Rev. William Branham ku Durban, South Africa, pa kika ukubuka pa kika ukusitakutatikigwa, Amaka Gamwakyala, akabalilo kāko abaMuhamadi maelifu kalongo bāgwíle pa fisyo fyābo pa kabalilo kamokene nukutwāla ubūmi bwābo kwa Yeso Kristi.” Naloliloli. Abēne bamenye ukufwana ni kyēne. Bala abalwālo bamenye ukufwana ni kyēne. Komma ugwe ukumbula une.

¹⁹⁴ Akabalilo kamo aalipo yumoywene uyu ikwisa kwa Yeso, alinkuti, “Rabi!” Umwe mumenye umwēne āli mFarisai. Alinkuti, “Uswe tumenye Ugwe gwe Mmanyisi gwisile ukufuma kwa Kyala. Uswe tumenye ikyene. Uswe tumenye ikyene, panongwa yakuti nayumo umundu abagile ukubomba ifindu ifi Ugwe kubōmba pene papo Kyala ayege na yumwene. Uswe tukupilikisya. Uswe tumenye ikyene. Lōli uswe itolo tukutoligwa ukufumusya ikyēne, muketile, ’nongwa yakuti linga uswe tukufumusya, ena, uswe twisakubíkigwāga panja pa kipānga kyītu. Muketile, uswe twisakutāga ulugīndíko.” Kangi popāpo Yeso alinkuyoba, ukwanda ukumbūla umwēne ikufimbilisigwa ukupāpigwa kabubili.

¹⁹⁵ Pa ndumiana yula u gwaMohamadi, akabalilo kāko umwēne imaga pala, pala kilipo ikipiicha kyāke. I kamera yitisakwegelela ubusyóbi. Pala umwēne imile pala, ikilūndi kimo kipimbapo bo ulo (kifuki mainchi kalongo na mana) ukukīnda ikīngi kila, imile pa kilato kya kyēla kila. Ndinkuti ku mwene, une ndinkuti, “Ugwe kuyoba i Kingereza?”

¹⁹⁶ “Umma, nkulumba.” Akābagíle ukuyoba i Kingereza. Unsanusi alinkuti, “Umwēne atikuyoba i Kingereza.”

“Kabalilo katali bulebule ugwe gwa mu njila iyo?” Unsanusi alinkundālúsya umwēne.

“Ukufuma kubupapigwe.”

“Ngimba ugwe ubagíle ukwēndesya ikilūndilo na panandi?”

“Umma, nkulumba.”

“Ngimba ugwe kwitika mwa Yeso Kristi?”

Alinkuti, “Une ndi gwaMuhamadi.”

Une ndinkuti, “Ngimba kumwitikaga Yeso Kristi linga Umwene isakupelaga ugwe uyege kanunu?”

¹⁹⁷ “Une ngwitikisyaga Yeso Kristi ukuya Mpoki gwangu linga Umwene isakupelaga une ukuya kanunu.”

¹⁹⁸ “Linga Umwēne isakukupelaga ugwe ukuya kanunu, ikilūndi kila kikwisa ngati ikīngi, ugwe kwisa kumwītikīsyā Umwēne?”

“Une ngumbōmbāga.”

¹⁹⁹ “Ena, Kyāla, ngimba kwisakubōmba fiki Ugwe?” Iki kyo kīndu ikikōnge; amalālūsyo gōsa gāmūlīgwe. Nkundwe Mike, uko ko kwīpilīka. Une ngugūlīla itolo i miniti ukukēta iki Umwēne āyāga pakuyoba. Une ndikukēta ukukilania kula nukukēta undumiana ikubūka, ikwēnda mula, ngati mulubafu lwa kibūmba bo ulo. Une ndinkuti, “Balinga ba umwe baMuhamadi mwisakwītikīsyā ikyēne? Apa alipo undumiana gwaMuhamadi, nketa umwēne, mwimika umwēne pamwanya pala.” Une ndinkuti, “Umwe bagānga, umwe mukulonda ukunketa umwene? Pala umwene imile.” O, ugwe kumanya pāpo ugwe ulipo lēlo. Muketile, ugwe kumanya pāpo ugwe gwīmīle. Nayumo. . . Pala umwēne alipo.

²⁰⁰ Une ndinkuti, “Enda ukukilania injila iyi, mwanundumiana.” Kangi abēne balinkummwaga umwēne, apa umwēne ikwīsa. (“Ta-lampu, ta-lampu.”) Une ndikuti, “Kikuboneka ngati kalongo na mabili, kalongo na mana mainchi kipīmbāpo. kifuki ngati *pala*.”

“Ena.”

²⁰¹ Une ndinkuyoba, “Loli Yeso Kristi u Mwanundumiana gwa Kyala abagile ukupela umwene ayege kanunu. Ngimba umwe baMuhamadi mwisakwītīka ikyēne nukwitikīsyā Umwēne ukuya Mpoki gwakonagwako?”

²⁰² Galipo amaelifu ga maboko gala amatītu galinkubūka mmwanya panja ukukīnda bo ulo. “Ena, Ntwa, lilino ko kabalilo.” Une ndinkuti, “Tāta Gwakumwanya, linga Ugwe gwāmwilémo siku, nyāmūlāga une lilino, iki kyo kwa Lwīmīko Lwāko, iki kyo kwa Ugwe. Une ngusuma Ugwe mpela undumiana uyu ayēge kanunu.” Une itolo nālīpūtīle pa mwēne bo ulo.

²⁰³ Une ndinkuti, “Fula ikilato kyāko.” Umwēne alinkungeta une nikiswīgo naloli, unsanusi. Une ndinkuti, “Fula ikilato kyāko.” Umwēne alinkwābula ikyēne. Nongwa yakuti une nābombīle nākētīle imboniboni, iki kyāyāga pakuboneka. Umwēne alinkufūla ikīndu kila. Akabalilo kāko umwēne akigomokīsyē ikyēne kunyuma nukwēnda ukukilania pala ukwisa kwa une, gōsa-mabili amalūndi itolo kanunu, bo gosa-mabili ga agēne gikwēnda ngati mapya. Une ndinkuti, “Ugwe kulonda ukwēnda ukugomokela kangi nu kwīsa?”

204 Umwēne alinkwānda ukukūta bo ulo, ukugomokela nukwisa, umwēne akāmenye ikyakubōmba. Ukwēnda bo lula, umwēne alinkuti, “O Allah! Allah!”

Une ndinkuti, “Yeso! Yeso!”

O, o, o! “O Yesu! O Yesu,” polelo. “Yesu! Yesu,” bo ulo.

Une ndinkuti, “Ngimba galipo amalālusyo galigōsa, amalālusyo galigosa?”

205 Julius Sadskev, balinga bammenye umwēne? Nkundwe Stadskev isilepo apa ku kipānga; itolo—itolō ābūkile ku Germany. Alinkuti, “Gūlila panandi, Nkundwe Branham, gulila panandi itolo.” Ukutwāla unkomapīcha nakalinga itolo. “Ngimba une mbagile ukwēga ikipīcha kyāke?”

Une ndinkuti, “Itula gwimwene.”

206 “Endela *kuno*, imika ikilato kyāko *apa*.” Umwēne alinkwīma bo ulo, alinkwēga ikipīcha kya ndumiana pala, na gosa-mabili amalūndi itolo manunu kangi gagolwike mūmo agēne gābagile ukuya. Pala kilinkwīmba ikilato kyāke ikikūlu ni fisulu fyakwigemesya, bo *ulo*, bo *ulo*.

207 Une ndinkuti, “Balinga ba umwe baMuhamadi lilino mukukāna Muhamadi ukuya nsololi, kangi ukwītīka Yeso ukuya Mwanundumiana gwa Kyala, kangi ukummwitikisya Umwene ukuya Mpoki gwakonagwako?” Amaboko maelifu kalongo galinkubūka mmwanya. Haleluya! Abēne batikulōnda i . . .

208 Abēne bikugela ukukifisa kunyuma, panongwa yakuti uswe twe “bikemo babunguluke,” abēne bikutukōléla uswe, umwe muketile. Itolo pōpe, Kyāla ikwēnda. Umwēne ikubika mbuyo i Kipanga Kyāke. Umwe ikubōmba mbukīnde, mbwīngi pamwanya pa fyōsa ifi uswe twābagile nukubōmba pamo nukwinogona. Umwēne itolo nabubwīngi yo Kyāla mūmo Umwēne alimo siku.

209 Popāpo, mwe banini binangu, unko une mbabūle umwe ikindukimo lululu ulu. Mwe bāndu bāngu baganigwa bapala, umwe muli apa mu kīsu iki, kangi abāngi mu kīsu kya tepi iki kisakuyaga kwisīlya-lya-nyanji kangi kulikōsa umwe muliko, komma ukuya bālutēnde. Filifyōsa fili kanunu. Tāta Kyāla, bo lukāligwa ulwālo lwa kīsu, āménye kilikyōsa iki kyāyāga pakuboneka. Kilikyōsa kikubōmba itolo mulamula. Umwe munganile Umwēne? Kyungāga indumbula yāko yiyege kanunu.

210 Kangi, kumbukila, akabalilo kāko umuyi ugu gukukīnda ukufuma ku būmi ubu, kwa umwe bāndu baiyolo pamo kwa umwe bandu bakeke, kangi umwe ba māma, akabalilo kāko umwe mukukēta abana bīnu abanini, yula unnini umwana undindwana uyu āfwīle akabalilo kāko umwēne akāfikile amasiku lwēle mbukusi pamo amasiku mahano mbukusi, umwēne isakuyaga nkīkūlu unkeke ummogi akabalilo kāko

umwe mukumbona umwēne. Yula ugwaiyolo Mwīsukulu āli mosa nkonyoka-nyuma fiyo, umwēne ātamigwāga ukukēta kūko umwēne ābūkāga; akabalilo kāko ugwe kumbona umwēne, mbūya, umwēne isakuyaga u nnunu ummogi unnyāmbāla unkeke, itolo bo nkeke bo kifuki fyīnja malongo mabili mbukusi, itolo mbununu bwa butubwa. Kangi umwēne isakuyaga injila yila bwilanabwila. Ugwe ubagile ukupalamasya ikiboko kyake, ugwe ubagile ukuponia ifiboko numwene. Ugwe kwisakusopa ingongi syāko ukūbatila umwēne, lōli umwēne atisakuya “ndumego,” umwēne isakuyaga “nkundwe.” O, mwe! Umwēne isakuyaga nkulumbapo fiyo ukukinda “ndumégo.” Ugwe kwinozona gwālinganile umwēne? Naloli ugwe gwābōmbīle. Lōli lula lwāli *phileo*; gūlīla mpaka ugwe kukaba *agapao*. Gūlīla mpaka lula ulwanalololi ulugano Lwakyala lukukola, kangi polelo kēta iki kili. Iki apa itolo kyo kili bo ikyaiyolo ikitagilēko ikyālyōsi, ikyēne kikaya kinunu, kikayako nakimo ku kyēne. Ikindu kyēne une ngukufūnda ugwe ukubōmba lilino, kyo iki, gwāngu—gwāngu—gwāngu mwīnāngu. . .

211 Pitasipo une nisaku. . . Ngimba umwe mubagile ukulōnda ukuti une nsande pa mitu mibili gila akabalilo kamo? U Ntwa. . . Une—une ngulondigwa ukutusya itolo panandi bo ngali ukubūka ku Chautauqua. Lilino, une ngabagile ukulūmbilīla ifindu ifi mu ngomano sila. Kula siliko nyingi fiyo insita- . . . nyingi fiyo inyītiko. Umwe muketile? Iki kyo itolo kipānga kyēne. Muketile? Une ngabagila. . . Une ndinu bwābūke ukulūmbilīla nkati muno kilikyosa une ngulōnda. Iki kyo kitembe kyangu, muketile, kangi une ngubabula umwe. Lilino, une ngwitika abandu aba bapokigwe. Ena, nkulumba, une nalolololi ngwitika ikylene. Lōli, o, bo bwīngipo bulebule ikyēne kili ukwēnda akabalilo kāko ugwe umenye pāpo ugwe kwēndēla. Bo bwīngi bule, kumanya, itolo ukumanya iki ugwe kubōmba, umwe muketile, mbuyo bwa kupepeluka, ukwītābania mulamula. Unko uswe twīme mmwānya mu Lumuli, nukwēnda mu Lumuli nukumanya yo njilanki umwe mukubūkāko. Ikyo kyo kyabwanaloli. Untwa ayege na numwe.

212 Kangi linga aligwesa gwa umwe muno lilino akabīkigwa pabuyo gakenagake! Ugwe ubagile ukuya nakimo lōli nkasi-gwa-panyumba. Ena, ugwe kuyoba, “Nkundwe Branham, une ngabombamo siku ikindu kimokyene mbumi bwāngu. Une ngaya ndumbilili yumo mma.” Ena, lumo Kyāla ākutwēle ugwe apa ukukusya ikikolo kya bāna, ukufuma ku kikolo kila kya bāna kubagile ukwisa ikikolo ikingi ikya bāna uyu isakuyaga ndumbilili uyu isakutuma imyoyo imiliyoni yimo kwa Kristi. Ugwe gwafimbilisigwāga ukuyapo apa. Ugwe uli apa pa lubīngililo lumo. Ngimba umwe mwakimenye ikyo?

213 Ena, umwe mukuyoba, “Kyosa une mbobilemo siku, kyāli, ukukumba ukukilania mmatipa gaiyolo. Kangi une nabagile ukwiyēga panja, ukulābila namayolo, ngamenye mūmo fikuti

tukubapela abāna bangu ukuya būmi. Une nabakētīle abinitu abanini abapelakisa ukuya basita filato. Une nitūgesyemo pasi nukukuta. Une ndinako akagali akakūlu, kangī une na Maw twābukaga ku kipānga.” Komma ugwe ukupāsyā, nkundwe. Ugwe umilisyaga ukungana Umwēne, Umwēne alinayo inongwa kuli ugwe. Ugwe yaga itolo mu njila iyi mulimo, itolo kīndililāga. Muketile? Ugwe lumo ukulūmbililāmo siku ubulūmbilīli nabumo, lōli ugwe ubagīle ukuya yo mwisukulu-mwisukulu gwa yumo uyu isakubōmba ikyēne.

²¹⁴ Ngimba umwe mwakimenye ukuti Kyāla ālinhōmbīle (Unko uswe tukēte lilino, ngimba ingamu yāke yali fiki?) Levi, ukuhomba ikyakalongo akabalilo kāko umwēne āli nduyungu lwa Abraham, akabalilo kāko Melekisedeki ālyāgéne nagwe? Balinga bamenye ikyo? Kangi unko uswe tukēte. Abraham āpāpīle Isāki, Isāki āpāpīle Yākóbo, Yākóbo āpāpīle Levi; uyu yo āli tāta, mwisukūlu, mwisukūlu-mwisukūlu; akabalilo kāko umwēne āli nduyungu, mu mbeyu ya mwisukūlu-mwisukūlu gwāke, i Bāngéli lyālintufifye umwēne panongwa ya kuhōmba ifyakalongo kwa Melekisedeki. Mwe, mwe, mwe, mwe! Nkundwe! O! Une ne . . .

²¹⁵ Alipo pala unnini—alipo unnini unnyāmbāla uNgereza āpīndwīke kubwa kula ikilo kimo ku England, umwene alinkuti, “Une ndinsangalufu fiyo! Une ndinsangalufu fiyo!”

²¹⁶ Ena, nhobwike fiyo ukuti ikyo kyo kyabwanaloli! Kangi ilisiku limo ilyalwīmīko, une ngamanya mo ndili ilisiku lila lisakuyaga, lōli linga yila yāli mboniboni, une ndikuyoba une nāli apa. Kumbukilaga, akabalilo kōsa yaga na iki mu linogono, abakoleléla tepi bali bōmbaga lululo. Kali une naali mu mboniboni, pamo ukupīmbāgwa mwa Mbepo, une ngamanya. Lōli ikyēne kyāli itolo bo kyābwanaloli bo mūmo une ngukoleléla u Nkundwe Neville bo *ulo*, itolo kyanaloliloli. Kangi une nābagīle ukukēta nukuyoba na bandu bala. Kangi pala pālīmīle unkasi gwāngu gwakwānda, umwēne akakōlīle “ndume gwāngu,” umwēne ātīle, “nkundwe gwāngu unganigwa.”

Pala ālīmīle undīndwāna uyi une nālisibīle ukubūka nāgwe ifyīnja ifi fikīndilēpo.

²¹⁷ Lumo bamo mwa bāndu bāke bitugesye muno, Alice Lewis ukufuma ku Utica, unnunu fiyo, nsūbilīgwa ndīndwāna Nkristi. Alyēgīge akābīle panandi mbumi, kangī āli nu mmwana gwāke gwākūwānda nukufwa mu mbāpo. Alice Lewis, une nālyēndīle mula nnyumba ya nīfwa ukunkēta umwēne. Une nāfikīle itolo ku kāya, une ndinkupīlīka umwēne āfwīle. Une nābūkīle ukusuluka kula, akālīmo nayumo nkyūmba kila, une ndinkuti, “Ngimba alipo unkīkūlu apa, Nka . . .” Ingamu yāke āli Emmerke. Kangi umwene alyegile undumiana unnunu uNkristi, kangī umwene ali ndīndwāna unnunu uNkristi. Une nāli palikimo nu ndīndwāna yula kulīkōsa, uluko losa lwa mabuyo na filifyosa. Kangi

itolo tuli bāna, kalongo na lwele, kalongo lwele na kimokyene ifyinja mbukusi, kulikosa, unnunu uNkristi, ngakamenyemo siku nakamo ukufwana nu mwēne lōli ki Kikristi ikyanaloliloli. Kangi une nāli ntulwanongwa. Loli une nālisibile ukubūka nagwe. Une ndinkwīngila mula...Kangi undume gwāke āli Nkristi umpāpīgwe-kabili, unnyāmbāla gwanaloliloli. Kangi une ngāmēnye; une nāmēnye umwēne āfwīle, une nakibwēne mu kalatasi gwa nyuzi. Kangi une nābūkīle kula kangi abēne bālimbūlīle une. Une ndikubūka ukusuluka kula ku buyo bwa Coots' kangi une ndinkuyoba, “Ngimba umwe muli nagwe u Nka. Emmerke?”

Umwēne, “Billy, umwēne ali itolo nkyumba mula.”

218 Une ndinkubūka mula nkyūmba nukwīma pala pa lubafu lya bokosi. Une ndinkwinogona, “Alice, une nendilēmo mmabuyo ga ngīsi ukukīnda, une nendilemo mmisebwe igyangisi. Ugwe na une twēndīle palikimo ukusuluka imisebwe kangi pāsi ukukilania kifuki ikisōko, akabalilo kāko abēne bālisibile ukuya na mabwāto ga kibonekesyo, uswe twitugasyāga pāsi kula nukupilikisya ikimbyoto kila kikukuba. Ukufyūka nukusuluka ntusebwe, yo nkīkūlunki ugwe gwāli! Mūmo une ngupālisya Kyāla panongwa ya būmi bwāko. Tūsyā, ilumbu gwāngu umpala, tūsyā mu lutēngāno lwa Kyāla.”

219 Kangi ikilo ikingi mu mboniboni, pala umwēne alinkwisa ikubopela kwa une. Umwēne alinkuti, “Gwe nkundwe gwāngu unsayigwa,” nukusopa ingongi syāke ukunyūbatīla une. O, o, nkundwe na kalumbu, ikyēne kinyāndwīle une. Une ngabagila ukuya yulayula kangi mma. Ikyēne kyo kyanaloliloli fiyo! Ikyēne kyo itolo—ikyēne kyo itolo kyānaloliloli bo une ngukukētēla ugwe, itolo kyanaloliloli bo ulo. Popāpo, lukayapo no lutēnde nalumo. Une mbagīle ukufwa bo ikilo kikamalika.

220 Une ngulonda ukukusya undumiana gwāngu kunyuma kula, Yosefu. Une ngulonda ukunkēta umwēne mu kīgēmo, akabalilo kāko une mbagīle ukwēga i Bāngēli ili...akabalilo kāko une ngufika ku buyo une nguketa Yosefu nkigēmo ikulūmbilīla ukuya u—ukuya nnyāmbāla nkeke isusīgwe na Mbepo Mwikemo, apakīgwe na Mbepo gwa Kyāla pa mwēne. Kangi une ngwitika umwene isakuyaga nsololi. Ilisiku akabalilo kāko une—akabalilo kāko une—akabalilo kāko une nālimbwēne ifyinja ntāndātu bo umwēne akāli akapāpīgwa, umwe mukukūmbukīla une ngubabūla umwe umwēne īsaga. Mukukumbukila iki une nālinkōlīle umwēne, palapala pala pa lubafu lwa kīgēmo, kisita kumanya iki une nāyobāga, ngwīpūtīla abāna, une nāyobīle, “Yosefu, ugwe gwe nsololi.”

221 Kangi ilisiku ilingi nimile panja pa lubingilo, umwēne ikwīsa mula kwa une, kangī umwēne, “Bāba, ngimba Yeso alinakyo ikiboko bo ikyāko?”

Kangi une ndinkuti, “Mulimosa, ena, mwanangu. Fiki?”

222 Umwēne alinkuti, “Une nālītūgésye pa njinga yāngu, nguketeléla Sarah” uyu yo ilumbu gwāke unnini, “ukwisa kukāya ukufuma ku sukulu.” Nitūgésye panja pala. Une ndisakundeka umwēne ukubūka panja pa nsebwe, umwēne ālītūgésye kunyuma bo *ulu*. Kangi alinkuti, “Une ngetile mmwanya, kangi,” alinkuti, “akabalilo kako une naabobile, pala kyālipo ikiboko bo kyāko, kifwele ikiboko kyasyati inyēlu kikungoleléla une.” Kangi alinkuti, “Ikyēne kilinkukīndilīla ukufyūka mmwanya.” Alinkuti, “Ngimba kila kyāli kiboko kya Yeso kikufyūka mmwanya?” Une ndinkukēta ku nna, unna alinkukēta kwa une. Uswe tulinkubūka kwa Nka. Wood. Kulikosa kūko umwēne aliko, itūgésye apa. Uswe tulinkundalusania umwēne, apa na apo ni njila yiliyosa uswe twābagile. Iyēne yāli mboniboni. Umwēne ākētīle iyēne. Akabalilo kāko une mbagīle ukukēta akabalilo ka Yosefu unnini ikwīma . . . Une ngusūbīla une nguyaga mūmi ukumbona umwēne mwēgi, linga Yeso ikukābilapo.

223 Kangi une ne nnyāmbāla unkāngāle, imbuha sikwelela ukusyūngutila mmakosi apa. Une ndumile . . . Une ngulōnda ukutuma imyoyo amamiliyoni mabili pamo matatu ukongelelāpo ukongelelāpo kwa Kristi linga une mbagīle nububagililo. Ubwēne bo busisimikisi bwāngu ukulūmbilīla i Nongwainunu ku nguto yiliyōsa ya kisu kya pāsi. Ena, nkulumba. Popāpo, ndula une, Kyāla, une nisakubōmba ikyēne. Polelo, akabalilo kako une mbagile ukuketa ukuti akabalilo kafikile, Nkundwe Mike.

224 Une mbagīle ukukēta ku kabalilo Mama, Meda, une ngunkōléla umwēne, nganigwa gwāngu, muketile, umwēne yo . . . uswe twandīle ukukāngāla, kēta inywīli syāke sikwāndūka mbulufu, kangi kēta uswe tukusōkāpo, tukusimilila.

225 Rebekah, une ngupalisya panongwa ya Rebekah. Ummanyisi gwāke gwakwimbakwimba ālimbūlīle une ikilo ikingi, alinkuti, “Mwe, linga umwēne ikūmilisya ikyo mmwanya, Nkundwe Branham,” ikuti, “ikyēne kikafu ukuyoba iki umwēne isakubōmba.” Muketile, ukukīndilīla mu fyakwimbakwimba. Une ngulōnda umwēne, kangi une ngulōnda . . . Une ngulonda Sarah pa orogani, Becky pa piano, une ngulōnda Joseph nkīgemo.

226 Akabalilo kāko une mbagīle ukukibona ikyo kikuboneka, kangi une na Mama tubagīle ukupepelukila nkati, une pa kangili kāngu akaiyolo, ikilo kimo, ukusuluka pāsi mula mu nsebwe, kangi une mbagīle ukukēta nkati kula nukukēta undumiana gwāngu imile pala apakīgwe na Mbepo Mwikemo, ukulumbilila i Nongwainunu yiyiyi. Une ngulōnda ukwēga i Bāngēli ilyaiyolo ili, nukuti, “Mwanundumiana, apa Ilyēne lyo ili, Ilyēne lyo lyāko. Ugwe gwime ni Lyēne, komma ugwe ukugomosyako na pa Lisyu limolyene. Ugwe gwime pa Lyēne, luuki. Komma ugwe, komma ukupāsyā, une ndikupāsyā uyu ikulwana na ugwe, yūyo

yo ikulwana, Kyāla isakuyaga kuli ugwe. Ugwe lumbilila i Lisyu lililyosa itolo mu njila Ilyēne lisimbiligwe nkati Mula, kangi Bāba isakukuketelelāga ugwe kukilania ulusōko.” Une ngulōnda ukufikila ukusyūngutīla nukummwēga umwēne mu ngongi syāngu, unkasi gwāngu, nukuloboka Yorodani.

²²⁷ Mpaka akabalilo kala, Kyāla, unko une nsyale pa ngunda, nsūbiligwa! Nyitikisya une! Une ndikupāsya iki untengo guli, pamo balinga, iki une ngubōmba, pamo *iki, kila*, pamo *ikingi*. Unko une nsyāle nsūbiligwa kangi gwabwanaloli ku Lisyu lwa Kyāla gwābūmi, ukuti akabalilo kāko ilisiku lila likwisa kangi une ndobwike kula, kangi une mbagīle ukukēta ukukilania nukuti, “Apa ugwe ulipo. O, mwināngu mpala, nkundwe gwāngu mpala, kalumbu gwāngu mpala.”

²²⁸ Ndumbilili nekeke, būkāga mu ngūnda, syālāga muliyōko. Mwēsa umwe balūmbilili bakeke ni findu, komma ukwītūgāsya itolo. Komma umwe ikwītūgāsya itolo nukubōmba nakimo. Būka pānja kula kangi kakabe u mōyo. Bōmba kimo! Būka nkyēni, andaga ukwēnda. Komma ukwīma, ndumbilili unkeke apo. Kyāla asaye indumbula yāko.

²²⁹ Umwēne ikungūmbusya une isya kabalilo kāko une nāli nu bukusi bula, une ngusakikisya, kangi lumo ndinkekepo panini ukukīnda umwēne. Une nāli itolo kifuki ifyinja malongo mabili ni kindukimo mbukusi akabalilo kāko une nālāga ibwe lwa panguto pala. Une ngukūmbukila une nālisibīle ukufwāla ilijekete lya bluu ni sulubali inyēlu, kangi nālīmīle pala nukwāla ibwe lya panguto lila kifuki ifyinja malongo-matatu-na-kimo ifi fikīndīle. Kēta mūmo une nāyīlīle nkusi, une nāli itolo ndumiana. Itolo nimile pala, ngwāla ibwe lya panguto lila. Une ngapepusyamo siku ni Lisyu limolyēne. Une ngyūngīle Ilyēne katikati munjila une nālyālīle ibwe lwa panguto lila. Kwisilya ko ubukēti bwāngu bulambalele kwisilya, kūko une nāsimbilīle ubwēne pa lyāni lyakubwīgulilo lwa i Bāngéli, nukulilepulako ilyēne nukulilāmbalika ilyēne m’ibwe lya panguto lila kangi umwēne akālī alambalele pala. kangi ubwēne bulisīmbigwāga mmāni ga Lisyu Lyasyēpwa lwa Kyāla ku Mwanya. Unko une nīme gwabwanaloli ku bumalikisyo.

Unko uswe twinamisye imitu gytu lilino itolo pakabalilo ku lwiputo.

²³⁰ Mu kwīgala kwa kilo iki, ukwīgala kwa ifi, untu gumogwēne, iki kyo kisitakwitikisigwa. Umwe mukulōndīgwa ukuya nu gūngi, na mūmo umwēne ikukīndilīla nukubika i Kipanga mbuyo Bwāke. Une nisakutwālaga ikyēne kwa umwe, Kyala itikisyege. Une ngufīmbilisigwaga itolo ukuya nu butusy’ubunini lilino bo ngāli une ngabūka mu Chautaugua kwisilya, ku lukomano ulungi ulunywāmu, polelo une ngukilania kula ukufuma kula ukubuka ku Oklahoma, ukufuma kula ukukīndilīla ku Klamath Falls, polelo ukufuma ku Klamath

Falls ukukīndilfla ukusulukīla ku California, ukufyuka mu Yakima, une ndisakuyaga ngomwīke mpaka u Ogasiti unkonge pa lya 15.

²³¹ Lōli kēta, unko une ngulālúsye ugwe ukīndukimo, linga ikīndukimo kibagīle ukuboneka kwa ugwe pamo une bo akabalilo kala kakwīsa, linga une mbagīle ukukilania kula kukisōko ukubūka nKīsu kila, pamo linga ugwe ubagīle ukukīlania bo kakāli akabalilo kala ukubūku nKīsu kila, ngimba ugwe kwīpilika ubusisimikisi ikilo iki ukuti uswe twisakwāgāna kula mu Buyo bula? Linga ugwe kubomba, fyusya ikiboko kyako, yoba, “Une ngwīpilika ubusisimikisi mu ndumbula yāngu.” Kyala akusaye indumbula yako. Kyala akusaye ugwe. Linga alipo yumo apa uyu atikwīpilika ubusisimikisi ukuti abēne bikuyaga kula, kangi bikulōnda ukuyoba, “Ngumbukilaga une, Nkundwe Branham, ukuti une njege nu busisimikisi bula,” fyusya mmwanya ikiboko kyāko, “Une ngulonda ukuyako kula, nīne.” Kyala akusaye ugwe, nkikulu. Kyala akusaye ugwe.

²³² Gwegwītu Tāta Gwakumwanya, uswe tukuwāla kwa Ugwe ikilo iki ikilūndilo iki, ikiboko kilikyōsa, mūmo une ngumanyila, kyāli mmwanya, bōsa ukupāgūla umundu yumoywēne, umoyo gumo umpala gwītūgēsye kunyuma kula, itolo bikupāsya panini ukuti kāli abēne bisakuloboka kula ku Kīsu, kūko kuliko ulwakufwana ulwanaloliloli u lugano Lwakyala mu ndumbula syābo, mu ndumbula ya nkīkūlu umpala yula, ukuti umwēne ikwīsāga ku Kīsu kila linga umwēne āfwāga ikilo iki, ngimba ikyēne kyabagīle ukukwābila umoyo gwāke unkatale ukubūka mu Kīsu Kyālufingo kya Kyāla?

²³³ Tāta ku Mwānya, bo mūmo une nimīle apa pa kigemo iki nukulūmbilīla, kangi njīle na mafuke, nukukūta, nukusūma, nukupepeka, unko une nsūme kwa Ugwe kamokene itolo, Ntwa, unko une nsūmile kwa kalumbu gwāngu kunyuma kula; Kyala, bīka nkati mu ndumbula yake, ikilo iki, lula Ulugano lwa Kyala, yula Mbepo Mwikemo gwa Kyāla, lula ulutēngāno ulu lukukīnda ukupīlikisya kōsa, ukuti uswe tubagīle ukwambilila Mbepo Gwāko, ukuya mfungigwe na Mbepo Mwikemo mpaka ilisiku lila. Une ngulonda ukunketa umwene, Ntwa, akabalilo kako uswe tukukilania palulalo. Linga ulwēne lo—linga ulwēne lo lwāngu—linga ulwēne lo lusako lwāngu ukukilania, linga kila iki Ugwe gwalināngīsye une kyāli kyanaloliloli, kangi une ngukilania ukukilania kula, une ngulōnda ukwāgana nu mwēne kula, kangi nukumbona umwēne ukubōna nukungamata une pa kiboko, kangi kuyoba, “Nkundwe gwangu umpala, ikyēne kyāli kilo kila aka i Kindukimo kyālimbūlīle une ukufyūsya ikiboko kyāngu mmwanya, akabalilo kāko ugwe gwamalīsýāga ukulūmbilīla pa Būku gwa Efesi. une nnāfyūsīsye mmwanya ikiboko kyāngu, kangi i kindukimo kyābōmbígwa kwa une ukufuma pala. Apa une ndipo. Une ndinkeke lilino kwabwilanabwila.” Kyāla paga ikyēne kwa yula umpala.

234 Bala bābo bafyūsīsyē amaboko gābo ukuti abēne bafūngígwepo nu Mbepo Mwikemo, u Mbepo gwa Kyāla ali pa bene, kangī abene bambilile Mbepo Mwikemo, abēne bafūngígwepo nu lugano lula ulwakyala mu ndumbula syābo. Mūmo uswe tukupālisya Ugwe panongwa ya bēne.

235 Tukusyāgānia, Tāta, ukuti panja nkīsu amatepi aga gisakubūka. Ifyakuyobelapo fīngi fisololígwe ukukilania pa kigemo iki, iki kyo kikusanusya ukuti amatepi gikutēndekígwa, gikusyumbutuka kunyuma kula, i Lisyu lisakubūkāga mfīsu ifikīndānekīndāne ukukilania ikīsu kyapāsi, ukusyungutila ikīsu kwapāsi, ifīsu malongo mabili pamo malongo matatu fisakupilikāga Ilyēne. Une ngwīputila umundu aligwesa uyu ikupilikaga itepi iyi, uyu akaya nalo ulusūbīlo lwa Būmi Syēpwa, aba bakaya nalo ulōsyo lwa Mbepo Mwikémo, ali isaga Umwēne ku ndumbula syābo nubunoge. Paga ikyēne, Ntwa.


236 Kangī ngusuma une, linga une ngababonamo siku abēne mbumi ubu, akabalilo kāko une ngukilania kula nKīsu kila, abēne balibopāga nu kungamata une (kangī une ngubakamata abēne, kangī abēne, uswe tukuywēga, “Nkundwe u mpala!” kwa yumo nu nnine), bikuyoba, “Une nāpilike itepi yāko pa Efesi, mūmo Kyāla āsungulile ngāni uswe ku Būmi Bwāsyēpwa, kangī ikyēne kyāli pa tepi yila ukuti une nālyāmbilīle i Lisyu lya Kyāla kangī nafūngígwe nu Mbepo Mwikemo ukubūka mu Kitangalala kya Kyala.” Tupaga ikyene, Tāta.

237 Babumbulusyāga bōsa aba bo babine na bābabigwe. Egega ulwīmīko kwa Yuyugwe kabuno uswe tukubīka kyōsa iki kwa Ugwe mu kugela kōsa mu Ngamu ya Yeso, u Mwanundumiana Gwāko. Amenī.

238 Ngimba balipo balibōsa apa aba babine kangī bikulōnda ukuti amaboko gabikígwe pa bēne ukwīputilígwa? Ngimba mubagile ukufyusya ifiboko fyinu? Umma ndaga. Ngimba umwe mubagile ukwēnda kimyemye, lilino, ku kigemo papapa apa, nukwima itolo panandī, akabalilo kako Unkundwe Neville ikwisa nu kyāke . . .

239 O, iki kuboneka ngati, kwīpūtīla ababine, itolo—itolō kikuboneka ngati ukwisa pāsi kūko ugwe umenye pāpo ugwe gwīmīle, katikati. Kyāla amēnye fyōsa ifya ikyēne.

240 Akabalilo kāko une ngupilika ulwīmbo lula . . . Kumbukilaga, linga umwe muli būmi akabalilo kāko une ngubūka, kuba ulu kwa une: *Itika Itolo*. Kumbukilāga, une ngafwa mma, une ndisakuya kubutali fiyo ukufuma kukupilikisya ulwēne. Une ngabagile ukufwa; Yeso ālimbéle une u Būmi Syēpwa; ikuyaga ukunsyusya une pisiku lyabumalikisyo; une nisakwāgāna na umwe. Kangī linga ugwe kubuka, une ngwitikaga ikīndu kilakila kwa umwe. Une ngusubila uswe twisakwāgana yumo nunnine kangī.

²⁴¹ Ngukêta, unkíkulu umpala uyu imile apa ni nywĩli isyambuha. Ugwe gwe Nkristi? Gwisusígwe na Mbepo Gwãke, kungũlĩla Umwêne ikwĩsa, itolo gwimile panja apa kugũlĩla i Bwãto ukwĩsa mula. Ameni. O, kalumbu . . . 

60-0522E Bufwikigwe #4
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org